

Genèse 1


Genèse 2

Genèse 3

Job

Genèse 4

Genèse 5



# Mukanda wa Genèse No. 3

Genèse chapita 12-21

**Abrahami**



Project Mwindā

Ministères pour Chaque Enfant

[ecmafrica@ecmafrica.org](mailto:ecmafrica@ecmafrica.org)

**Musoniki:** *Maman Lorella Rouster. MCE*

*Mukudimunyi :Rev. Bope Lobo Honore*

*Edition 2022*

Matondo na [www.freebibleimages.org](http://www.freebibleimages.org) sambu na foto

**MUKANDA WA GENESE NO. 3 -- ABALAMA  
DILESONA 38**

**TSHIENA BUALU : NZAMBI UDI UBIKILA ABALAMA**

**TEKESE : GENESE 12 : 1-3**

**KENDELE KA DIYISHA :** Kunyima kua diyisha edi, bayidi badi ne bua kujingulula ne NZAMBI udi musue kusankisha bantu bonso, ke bualu kayi wakasungula Abalama, bua mu yeye tuetu bonso tusankishibue. Bua nunku bayidi biabu basankisha (babenesha bantu bakuabo)

**NVESE WA KUYILA :**

Genèse 12: 36: « Bisamba bionso bia ha buloba, nebisanke bua bualu buebe”.

**N.B:** Nvese eyi idi ileja musangu wa kumpala udi Nzambi usungula Abalama. Bua mudimu special. Bantu badi Nzambi musungula bua kuluabu bayuda.

Bantu ba bungi badi bamona bu Nzambi udi ne kansunga nsunga, bua tshinyi udi usungula anu Abalama, muyuda.

Bua tshinyi udi usungula anu muntu umue, tshisamba tshimue, alors que yeye udi bua bantu bonso. Nzambi wakasungula Abalama bua mu yeye ke mualua muanandi kuledibua. Kuledibua kua muana eu kuvua bua buimpe buetu tuetu bonso bua kusungidibua kuetu kabidi.

**MUSAMBU:**

Abalama !Abalama!

Bua tshinyi Nzambi.udi mukubenesha:

Ayi ayi ayi ayi

Bua tuetu kabidi tubeneshibue.

**BITUHA BINENE BIA DILESONA:7**

**TSHITUHA 1.**

**TANGILA GENESE 12 : 1. NZAMBI wakambila abalama ne :**

1 . A MAKONKA :muyishi ela bayidi makonka aa:

1.A ;NIVEAU MUHUEKELE (primaire)

- YehoWa Wakenza tshinyi ne Abalama(Wakamuambila)
- Abalama wakunvua diyi dia nganyi(diyi dia Nzambi)
- 1 .B NIVEAU MUBANDILE ( secondaire)
- Titre kayi udi bible upesha Nzambi ? (Yehowa)
- Muaku eu « Yehowa » udi unvuija tshinyi ? (Muntu udi ne bukokeshi, bantu bonso badi ne bua kumunemeka)
- Mukanda wa Nzambi kawena utuleja to mushindu uvua Yehowa muambila Abalahama to. Mishindu kayi idi muakuikala possible?  
(Mu diyi didi muntu mua kunvua, mu tshilota, mu tshikena kumona, mu malu adi Nzambi uteka mutshima wa muntu etc.)

## **2. THEATRE: TSHINYI TSHIDI TSHIENZEKE?**

Bana babakaji benza bu Yehowa bamba ne, « Abalama, Abalama »

Bana babalume benza bubadi bunvua diyi. Batangila ku nseke ne nseke bamba ne « Yehowa, Yehowa »

## **3. KUIMBA NE KUJA**

Yehowa wakambila Abalama eee eee eee

Wakambila wakambila Abalama eee eee eee

### ***TSHITUHA 2.***

TANGILA GENESE 12: 1b. « Ne umuka mu musoko webe, ne kudi bana benu ne ku nsubu wa tatu' ebe »

## **1. MUYISHI ELA BAYIDI MAKONKA AA.**

### **1. A NIVEAU MUHUEKELE (primaire)**

- Yehowa wakambila Abalama bua umuka kuehi ? (umuka mu musoko wabo, kudi bana babu ne kunsubu wa tatu wandi).
- Bidi bualu bukese anyi bukole bua kushiya musoko webe ne bana beno? (Bidi bualu bukole).
- Bituikala tuya ku musoko mukuabo, netuambile badi bashala tshinyi? (Nuashala bimpe).

### **2. A NIVEAU MUBANDILE (Secondaire)**

- Mu nvese eu Nzambi udi bu udi usengelela anyi wenzeja Abalama bua kumuka? Udi umuenzeja ne yeye udi ne bua kuenza disua dia Nzambi.
- Nudi nuelangana menji kayi mu tshikondo tshidi Yehowa wambila Abalama bua kumuka ? (Misangu mikuabo Abalama wakadi ne bowa ne dibungama).
- Bua tshinyi Yehowa kakasua kunvuija Abalama bua tshinyi uvua ne buakumuka ? (Yehowa kakasua kumunvuija to bualu yeye uvua bua kusungula bua kutumikila anyi kubenga kutumikila diyi dia Yehowa).
- Udi welangana menji ne Abalama ne yita buja bua kuenza malu aa bua tshinyi ? (Bualu yeye wakateka menji ende kudi Yehowa ne wakajadika malu aa neyikale mimpe nansha bikala Nzambi kayi muajingulule bimpe mene mene.

## **3. THEATRE : TSHINYI TSHIDI TSHENZEKE ?**

Bayidi bonso benza geste (Mineku) ne bamba ne diyi dikole ne, « umuka, bashiye, yaku »

## **4. KUIMBA NE KUJA**

« umuka ku musoko webe ne kudi bana benu ne ku nzubu wa tatu' ebe »

**TSHITUHA 3**

TANGILA GENESE 12 : 1c « Ya biebe mu muaba unduala kukulesha »

**3. . MIYISHI ELA BAYIDI MAKONKA AA****3. A.1 NIVEAU MUHUEKELE (Primaire)**

- Yehowa wakalaya Abalama tshinyi ? (Muaba)
- Mbuena kuamba ne Abalama ukavua mumanye muaba au anyi ? (Nansha kakese)
- Mbuena kuamba ne Yehowa wakambila Abalama muaba au udi henyi ?  
(Nasha kakese, kadi yeye wakamulaya anu tshianana)

**3.A 2 NIVEAU MUBANDILE (Secondaire)**

- Malu kayi mahia mahia (Spécial) ikala mu muaba au ? (Yehowa yeye nkayenda neambile Abalama)
- Tshinyi tshidi Abalama mua kuenza bua kuhiana muaba au ? (Anu kuitabuja Yehowa ne kutumikila diyi didiye mu muambile)
- Kunyi kudi ne Abalama mua kumuka ne tshinyi tshidiye muakuheta ? (Udi ne bua kumuka mu musoko wabu ne bana babu ne tat' andi ne bua yeye kuya mu muaba udi Yehowa umuleja.

**4. THEATRE : TSHINYI TSHIDI TSHIENZEKE ?**

Tahulula bayidi mu tusumbu tubidi nunku ; kasumbu kakumpala : Nzambi. Kibidi Abalama ;ka Nzambi kateka tshanza tshiabakaji ha dikaya dia bana ba kasumbu ka Abalama. e diboko dia balume bamba « Ya biebe mu muaba undualua kukulesha ; bayidi badi mu kasumbu ka Abalama bamba ne bitabuja ne » « eee »

**5. KUIMBA NE KUJA**

Ya biebe mu muaba undualua kukulesha ( +mesangu ya bungi)

**TSHITUHA 4**

ANGILA GENESE 12 : 2a. « Nenkuvuishe tshisamba tshinene.

#### **4.1 MUYISHI ELA BAYIDI MAKONKA AA**

##### **4.1. A NIVEAU MUHUEKELE (Primaire)**

- Mu nvese eu Yehowa wakalaya Abalama tshinyi ?  
(Nenkuvuishe tshisamba tshinene)

##### **4.1. B NIVEAU MUBANDILE (Secondaire)**

- Yehowa wakalaya Abalama ne nealele bana bungi munyi ?  
(Babungi menemene)
- Tshisamba tshia Abalam ne tshikale mushindu kayi?  
(Tshinene)
- Tela bualu bumue bunene buakalomba Yehowa kudi Abalama ne malu abidi manene akalaya Yehowa kudiye.  
(Wakumulomba bua umuka mu musoko wabu)

2. (wakamulaya muaba ne neamuvuishe tshisamba tshinene)

#### **2. THEATRE: TSHINYI TSHIDI TSHIENZEKE?**

Bayidi benzela bianza bua kuleja milaya ya Yehowa kudi Abalama. Baleja munu umue bamba ne « Umue » Baleja minu dikumi kabidi kabidi ne kabidi ne bamba ne « Tshisamba tshinene »

#### **3. KUIMBA NE KUJA**

Nenvuije Abalama tshisamba tshinene (Imba kabidi ne kabidi) Bayidi bakangula maboko musangu udibo bimba « Tshisamba tshinene »

#### ***TSHITUHA 5***

TANGILA GENESE 12: 2b.

Nenkusankishe, nenvushe dina diebe dinene

#### **5.1. MUYISHI ELA BAYIDI MAKONKA AA**

##### **5.1. A NIVEAU MUHWEKELE (Primaire)**

- Milayi kayi yakalaya Yehowa Abalama  
(Kumusankisha ne kuvuija dina diende dinene)
- Nganyi udi wenza malu aa bua Abalama  
(Yehowa)

##### **5.A.2 NIVEAU MUBANDILE (Secondaire)**

- Elanganayi menji bimpe, bu Abalama muikala kayi mutumikile meyi avua. Yehowa mumuambile, milayi eyi uvua muakuenjibua anyi ?  
(Nansha kakese)

- Kadi nudi nuelangana menji ne Abalama wakasankishibua ne Yehowa wakavuija dina diende dinene bua tshinyi(Bualu wakatumikila diyi dia Yehowa)

## **2. THEATRE: TSHINYI TSHIDI TSHIENZEKE?**

Bayidi benza gestes baleja ne badi basankisha muntu. Kunyima benza gestes kabidi bubadi batutshila muntu bikashi.

(Bamutumbisha) bamba ne « Asankishibue, aye kumpala ».

## **3. KUIMBA NE KUJA**

Bayidi benza anu ma gestes ayi ne bimba « Asankishibue aye kumpala ».

(Kabidi ne kabidi)

## ***TSHITUHA 6***

TANGILA GENESE 12 :2c, 3a « Ne wewe neuvudishile bakuabo disanka. 3. Ne sankishe bantu badi bakuvudishila wewe disanka, nengele muntu mulau udi ukuela wewe mulau.

### **1. MUYISHI ELA BAYIDI MAKONKA AA**

#### **1.A NIVEAU MUHUEKELE (Primaire)**

- alama neavudishile banganyi disanka ?  
(Bantu bakuabo)
- Yehowa neasankishe bantu ba mushindu kayi ?  
(Badi bavudishila Abalama disanka?)
- Yehowa ne ela bantu ba mushindu kayi mulau?  
(Badi bela Abalama mulau).

#### **1.B NIVEAU MUBANDILE (Secondaire)**

- Tshinyi tshidi tshileja ne masanka a Nzambi kudi Abalama kaena ne ndekelu to ?  
(Yehowa wakalaya ne neasankishe bantu bakuabo bua yeye)
- Mushindu kayi utudi mua kusankishibua kudi Yehowa lelu eu  
(Tuenzele tshisamba tshia Abalama malu mimpe, isalele)
- Isalele kena habuihi ne congo aha to. Mushindu kayi utudi bua kubasankisha?  
(Tudi mua kubashiya mu milombo bua buimpe buabu)
- Bantu ba babungi lelu kabena balunda ba isalele to tshinyi tshidi ne bua kubalula?  
(Mulau wa Yehowa Nzambi nevikala kudibo).

## **3.THEATRE: TSHINYI TSHIDI TSHIENZEKE?**

Kasumbu kamue ka bayidi kikala Abalama ne bana bandi; muyidi umue ikale bu Nzambi. Kasumbu kakuabo kikala bantu bavudilashila Abalama disanka ne bana bandi. Pa nanku Nzambi ubasankisha bua mianda ayi.

#### **4. KUIMBA NE KUJA**

Yehowa ne « meme nensakishe badi bakusankishe »wewe Abalama”(Imba misangu ne misangu)

#### ***TSHITUHA 7***

TANGILA GENESE 12:3b. Bisamba bionso bia habuloba ne bisanke bua bualu buebe.

#### **5. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Nganyi udi wakula mu nvese eu ? (Yehowa)
- Banganyi ne basanke bua bualu bua Abalama ?  
(Bisamba bionso bia ha buloba).
- Kunyima kua bidimu bia bungi munyi, muntu kayi wakaledibua mu diku dia Abalama?  
(Bikala bayidi kabayi bamanye, muyishi abale mu Matayo 1:1, Yesu Kilisto wakaledibua mu diku dia Abalama)
- Yesu wakasankisha bantu bonso mushindu kayi?  
(Yeye wakafua ku mutshi mutshamakane bua kutusungila)

##### **1.B NIVEAU MUBANDILE (Secondaire)**

- Mu diku dia Abalama, bualu kayi bunene bua disanka bua kenzeka budi kutudi to ne lelu eu ?  
(Kuledibua ku Yesu Kilisto, udi musangidi wetu).
- Kusungula kua Abalama kudi Yehowa kuakadi kubi anyi  
(Nansha kakese, bualu kusungula kuandi kakuakila anu bua disanka diandi yeye nkayenda to, kuakadi bua bisamba bionso bia ha buloba bujima.

#### **3. THEATRE: TSHINYI TSHIDI TSHIENZEKE?**

Enzela bayidi mu bijengu (cercles) bibidi, tshimue tshikese

(Bayuda, Abalama), tshikuabo tshinene bua bisamba bikuabo bia ha buloba bonso.

Teka muyidi umue bu Abalama. Sungula muyidi umue mu tshijengu tshikese bu Yesu. Muyishi asankishe Abalama « Nzambi akusakishe », bu muekenza Yehowa. Kunyima Abalama asankishe bayidi ba mu tshijengu tshikese (Bayuda).

Yesu, udi mu tshijengu tshikese aye mu tshijengu tshinene bua kusankisha bantu bonso. Padiye usankisha bantu bonso amba ne « Yehowa asankishe baluba, bakete », Yehowa asankishe babindi, bakuba, batua etc.

#### **4. KUIMBA NE KUJA**

Mu Abalama Yehowa m’musankisha meme.

Mu Abalama Yehowa m’munusankisha nuenu

Mu Abalama Yehowa m'mussankisha bisamba bionso bia ha buloba (Imba kabidi kabidi kabidi)

### **5. DEVOIRS (MIDIMU)**

Bena kilisto bela Nzambi tuasakidila bua bulami buandi . Bela Nzambi tuasakidila bua Abalama, yeye wakubasankisha biabu.

Balomba Nzambi bua bisamba bikuabo bidi kabiyi basankeshibue « Musulman, Mormon » bua bobo kusankishibue biabu.

### **5. DIBIKILA (Invitation)**

Yesu kilisto udi musue kukusankisha biebe lelu mu Abalama bu bisamba bikuabo. Suaku umuakidile umuitabuja bu mukalenge ne musungidi webe.

Udi ne bukokeshi bua kukulengeja mu mashi andi nekukubui kidila mibi yebe.

Biwikala munange nunku, ungindile muaba eu kunnima kua deyisha edi.

## **DILESONA 39**

**TEKESE :** GENESE 12 :4-6

**TSHIENA BUALU :** ABALAMA UDI UTUMIKILA KAKESE

**KENDELE KA DIYISHA:** Kunyima kua diyisha edi bayidi bajingulula ne Nzambi neatubeneshe mu malu onso bituikala tumutumikila.

Nunku bayidi babanga kutumikila Nzambi mu malu onso adiyi ubambila.

### ***KULONGOLOLA KUMPALA***

Tuala tshilamba tshile bua kujika muyidi umue ku mesu bua kamonyi to. Neutshienzele mu théâtre.

### ***KUTANGULULA (REVISION)***

- Milayi kayi ya Nzambi yakalayaye Abalama?
- Nzambi wa kabenesha Abalama, mushindu kayi mabenesha aa adi atukuatshisha tuetu lelu eu?

### ***NVESE WA KUYILA***

EBELU 11: 8a « Bua ditabusha, Abalama hakabikidibuaye, wakatumikila bua kuyeye ku muaba wakadiye wamba kuangata bu buhianyi »

### ***BITUHA BINENE BIA DILESONA 3***

#### **TSHITUHA I**

TANGILA GENESE 12: 4 « Nunku Abalama wakaya bu muakamba Yehowa »

#### ***I. MUYISHI ELA BAYIDI MAKONKA AA***

##### **1.A NIVEAU MUHUEKELE (Primaire)**

- Abalama wakenza tshinyi hakamubikila Yehowa?



(Wakaya bu muakamba Yehowa)

- Nunku Abalama wakatumikila ne diyi edi dia Yehowa anyi ?  
(Ee, bualu yeye wakatumikila)

### **1.B NIVEAU MUBANDILE (Secondaire)**

- Tshituha kayi tshia mukenji wa Nzambi tshia katumikila Abalama?  
(Kuya mu muaba wakamba Yehowa)
- Udi welengana menji ne kutumikila eku kuvua bualu bukole anyi?, bua tshinyi?  
(Ee, bualu yeye kavua mumanye muaba au to, ne ashiye nzubu wabo ne diku diabo.

### **3.THEATRE: TSHINYI TSHIDI TSHIENZEKE?**

Suika muyidi umue tshilamba ku mesu. Teka bintu mu njila, bu nkuasa, mesa , kabasa etc.

Muyidi eu abanga kuenda bu udi uya mu njila mukwata ku bimana bia kalasa.

Muyidi mukuabo bu Nzambi umu lombola wamba ne :

Yaku ku diboko dia balume, dia bakashi, mululame, imana. Mwana musuika alonde anu mushindu udibo bamulombola to afike kundekelu kua luendu luende. Eu udi mushindu uvua Abalama mu tumikile Nzambi, kayi mulonde mesu andi, kadi ulonda anu diyi dia Yehowa uvua umulombola.

### **4. KUIMBA NE KUJA**

Abalama wakatumikila, wakalonda diyi dia Yehowa.

#### **TSHITUHA 2**

TANGILA GENESE 12: 46

Abalama kakatumikila to, wakangata lota

**4b.** Ne Lota akaya n’andi. Abalama wakadi ne bidimu makumi muandamutekete ne bitanu hakumukaye mu Halana.

**5.** Abalama wakangata mukashi wandi salai, ne lota muana wa muan’abo,

### **2.1 MUYISHI ELA BAYIDI MAKONKA AA**

#### **2.1.A NIVEAU MUHUEKELE (Primaire)**

- Abalama wakaya ne banganyi ?  
(Lota, muana wa muan’abu ne salai, mukashi wandi)
- Salai uvua mukashi wandi, yeye uvua ne bua kuya n’andi. Kadi lota bivua bimpe anyi bibi ?  
(Kabivua bimpe to, bualu Yehowa wa kamuambila bua kushiyaye bana babu ne musoko wabu ne diku diabu)
- Abalama uvua ne bidimu bungi munyi hakumukaye mu Halana ?  
(Bidimu makumi muandamutekete ne bitanu).

#### **2.1.B NIVEAU MUBANDILE (Secondaire)**

- Yehowa wakambila Abalama bua kushiya bana babu, udi we langana menji ne yeye wakangata LOTA bua tshinyi ?

(Muyishi unvue mandamuna a bayidi). Katuena bamanye bimpe mene mene to. Kubumue LOTA wakumulomba bua kuya n'andi, kubumue yeye uvua munange LOTA bikole ; kubumue uvua ne bowa, ke bualu kayi uvua musue kuya ne muan'abu umue.

- Abalama wakatumikila, ke bualu kayi Yehowa wakamubala mu bilobo bia ditabuja (Ebelu 11 :8). Kadi kaka tumikila totalement to. Kadi vuluka ne tshikondo tshiudi utumikila Nzambi, Kadi totalement to ?

(Muyishi ateleje menji a muyidi ne muyidi )

### **3. THEATRE: TSHINYI TSHIDI TSHIENZEKE?**

Bayidi benza théâtre eu ne muyidi umue ikala Nzambi. Ambila Abalama ne ashiye bana benu ne musoko wenu , luaku mu muaba unakulaya.

Muyidi umue ikala Abalama, mukuabo LOTA . Abalama ateleja Nzambi wakula. Abanga luendu, kadi angata LOTA. Kuangatshi muan'enu to, Nzambi kena muamba nanku to.

Kadi Abalama kena witaba to, udi anu wangaata LOTA bua kuya n'andi.

### **4. KUIMBA NE KUJA**

Abalama wakatumukila mu bualu bumue, disanka ! disanka !

Kadi mu bionso to to, dikenga ! dikenga !

### **TSHITUHA 3**

TANGILA GENESE 12: 5b

« Ne bintu bionso ne bantu bonso bakahetabo mu Halana bakaya mu nshila wa ku buloba bua Kanana.

### **1 MUYISHI ELA BAYIDI MAKONKA AA**

#### **1.A NIVEAU MUHUEKELE (Primaire)**

- Bintu kayi biakatuala Abalama hakahatukaye mu Halana ?  
(Bintu bionso ne bantu bonso biakaheta bo mu Halana)
- Bantu aba Abalama wakabaheta kunyi ?  
(Ku Halana)
- Bakaya mu nshila wa buloba kayi ?  
(Bua Kanana)

#### **1.B NIVEAU MUBANDILE (Secondaire)**

- Abalama uvua muhele?  
(Nansha, uvua mubanji)
- Bantu aba bakahetaye ku Halana. Bavua bahika anyi? Bikala mukanda wa Nzambi wamba ne muntu wa kenza bualu kampamba, mbuena kuamba ne Nzambi udi musue buhika?  
(Nansha kakese, mukanda wa Nzambi udi utuleja malu akenzeka, mimpe ne mabi)

### **2. THEATRE: TSHINYI TSHIDI TSHIENZEKE?**

Udi welangana menji ne bubanji kayi buvua n'abu Abalama ?

(NYama ya bungi, bimuna)

Bayidi benza bu badi bateka bintu ha nyima ha nyama bu badi baya mu luendu.

### **3. KUIMBA NE KUJA**

Bintu bionso bia Abalama

Bantu bonso ba Abalama

Yeye wakaya n'abi mu buloba bua Kanana

### **4. DEVOIRS (MIDIMU)**

Mu lumingu elu udi mutumikila Nzambi mu malu onso anyi anu ndambu? Biwikala udi mu mutumikila anu ndambu, ulomba dilekelela (Pardon), yeye neakufuile luse. Mu lumingu elu lombu bua yeye akuambuluishe bua wewe kumutumikila mu malu onso.

### **5. DIBIKILA (INVITATION)**

Muntu kena mumanye mua kutumikila diyi dia Nzambi to hikalaye kayi muanji kuitabusha Yesu Kilisto bu mukalenge ne musangidi wandi.

Hawikala musue bua kuitabusha Yesu bua abuele mu mutshima webe, tshikondo ntshiotshietshi tshindi mua kumuitabuja. Kujanguluki to. Kunyima kua diyisha edi meme enkuleje mushindu kayi udi ne bua kumuitabuja mu moyo webe.

## **DILESONA 40**

**TEKESE : GENESE 12 : 5-9**

**TSHIENA BUALU :** Nzambi udi ulaya Abalama musoko wa Kanana.

**KENDELE KA DIYISHA :** Kunyima kuadiyisha edi, bayidi badi ne bua kujadika ne Nzambi udi ne bua kukumbaja milayi yandi.

Ke bualu kayi bayidi badi ne buakuitabuja meyi andi onso.

### **KUTANGULULA (REVISION)**

Muyishi ela bayidi makonda aa:

- Yehowa wakambila Abalama bua kuenza tshinyi ?  
(Umuka mu musoko webe ne bana benu) kuya muaba undua lua kukulesha)
- Yeye wakatumikila anyi ? (Eee)
- Tshintu kayi tshimue tshiakabengaye kutumikila ?  
(Kubenga kushiya bana babu)

### **KUTANGULULA MIDIMU YA LUMINGU LUSHALE**

Mu lumingu lushale tuvua banuhesha midimu bua muyidi yonso alombe Nzambi bua amuambuluishe mu mushindu udiye bua kutumikila Nzambi mu malu onso.

Nganyi udi muteta kuenza ? Ne bivua bienzeka munyi ?

(Muyishi atua bayidi badi benza bimpe mpanda).

## NVESE WA KUYILA

IBakelenge 8:56 “Yehowa atumbishibue.....bualu waka kumba ja milayi yandi bu muakambaye

## BITUNA BINENE BIA DILEESONA 3

### TSHITUHA I

TANGILA GENESE 12: 5c

5C. Hakafikabo mu buloba bua Kanana. 6. Abalama wakahita mu buloba, wakalua ku shekeme, kuakadi mutshi wa telebinte wa mu Mole. Bena Kanana bakadi mu buloba tshikondo atshi.

### 1. MUYISHI ELA BAYIDI MAKONK AA

#### 1.A NIVEAU MUHUEKELE (Primaire)

- Abalama ne bantu ne bintu bakafika mu buloba kayi ?  
(Mu buloba bua Kanana)
- Hakafikabo, Abalama wa kenza tshinyi ? (Wakahita mu buloba)
- Wakalua ku musoko kayi? (Mu shekeme)
- Ku shekeme kuakadi tshinyi? (Mutshi wa telebinta, dina diau mole, mutshi wa mukenji uvuabo batendelela bu Nzambi wabo, lupingu)
- Mu tshikondo atshi banganyi bakadi mu buloba abu? (Bena Kanana).

#### 1.B NIVEAU MUBANDILE (Secondaire)

- Tuamba ne Abalama wakatendelela mutshi wa telebinte wa mole wakadi bantu ba Kanana batendelela anyi?  
(Nansha kakese)

### 2.THEATRE: TSHINYI TSHIDI TSHIENZEKE?

Bayidi bonso benze bu badi bedakana mu musoko wa Kanana.

### 3.KUIMBA NE KUJA

Tuakufika mu Kanana

Tuakuendakana mu Kanana

Yehowa ke udi mutulombola

### TSHITUHA 2

TANGILA GENESE 12:7

7.Yehowa wakamueneka kudi Abalama,wakamba ne, nempe tunkanunuine tuebe buloba ebu.

Abalama wakenzala Yehowa, wakamueneka kudiye, tshioshelu

### 2. MUYISHI ELA BAYIDI MAKONKA AA

#### 2. A NIVEAU MUHUEKELE (Primaire)

- Nganyi wakamueneka kudi Abalama ? (Yehowa)

- Yehowa wakambila Abalama tshinyi? (Nempe tunkanunuine tuebe buloba ebu)
- Abalama wakenzela Yehowa tshinyi hakamukenekaye kudiye (Wakamuenzela tshioshelu).
- Bua tshinyi wakenzala Yehowa tshioshelu? (Bualu Yehowa wakamukeneka kudiye).

### **1.B NIVEAU MUBANDILE (Secondaire)**

- Muaba eu shekeme wakadi muaba wakadi lupingu (mutshi wa telebinte). Abalama wakakudimuna muaba eu mushindu mukuabo kayi ?  
(Yeye wakashila Yehowa tshioshelu bua kumutendelelaye)
- Tshinyi tshidi tshileja ne ne mulayi eu wa Nzambi neakumbane mu tshikondo kumpala ?  
(Bualu Yehowa wakamba ne nempe tunkanunuine tuebe buloba ebu)\*
- Lelu bantu ba bungu badi bamba ne Isalele kena ne bukokeshi mu buloba abu to.  
Mukanda wa Nzambi udi wamba tshinyi bua bualu ebu?  
(Isalele udi bana ba Abalama, buloba abu budi bualu, bualu Nzambi n'nguakabaheshabu.

### **2.THEATRE: TSHINYI TSHIDI TSHIENZEKE?**

Kumpala bayidi bonso benza bubadi YEHOWA , benza gestes bamba ne”Buloba ebu bua Kanana ne Mbuhesha tunkanunuine tuebe

Kunyima benza bu badi Abalama, benza bubadi bibaka tshioshelu bua kuhesha Yehowa Nzambi milambu.

### **KUIMBA NE KUJA**

Ebu mbuloba budi Yehowa

Uhesha tunkanuina tuebe

### **TSHITUHA 3**

TANGILA GENESE 12: 8-9

8.Yeye wakumakaku, wakaya ku mukuna wakadi ku esete wa betele,wakashimikaku ntenta wandi; betele wakadi ku weste ne Aĭ wakadi ku esete, wakenzalaku Yehowa tshioshelu, wakabikila dina dia Yehowa.

9. Abalama wakatshidi uya ku sude.

### **1. MUYISHI ELA BAYIDI MAKONKA AA**

#### **1. A NIVEAU MUHUEKELE (Primaire)**

- Abalama wakaya kunyi? (Wakaya ku mukuna wakadi ku esete wa batele).
- Wakenza tshinyi koku?  
(Wakashimikaku nteta wandi)
- Yeye wakashimikaku ntete wandi hankatshi ha misoko kayi?  
(Betele wesete ne Aĭ ku esete)
- Wakenza tshinyi tshikuabo aku?  
(Wakenzela Yehowa tshioshelu)

- Kunyima wakaya kudi kunyi ? (ku sude). yeye wakadi mu musoko kayi? (Anu mu Kanana)

### **B NIVEAU MUBANDILE (Secondaire)**

Nudi nuelangana menji ne bua tshinyi Abalama uvua wasa tshioshelu mu miaba yonso ivuaye uya (Bua kutendelela Yehowa, kumuera tuasakidila bua muvuaye umulombola ne bua kuleja ne miaba ayi yonso neikala ya Nzambi).

### **2.THEATRE: TSHINYI TSHIDI TSHIENZEKE?**

Bayidi bamba (Baleja) sude, nunku bonso buabu baye ku kuleseke alu. Muyishi abambile bimana hikalabo bafike mu musoko BETELE. Aku benza bubadi basa tshioshelu ne baye batangila ku sude.

### **3.KUIMBA NE KUJA**

Yehowa wakupesha Kanana  
Bukadi buloba buetu!

### **4. DEVOIRS (MIDIMU)**

Enzela visuel “SILA-SALA”. Ambila bayidi ne bikala Nzambi mulaya, bidi mushindu umue ne bua kuamba ne udi wenza.

Pa naunku, mu lumingu elu, lomba Nzambi ne « Nzambi unkuatshishe bua meme kuteka moyo wanyi mujima ne wewe udi wa HABUEBUE.

### **5. DIBIKILA (INVITATION)**

Misangu mikuabo, wewe kuena muanji kuteka moyo webe mujima mu Yesu Kilisto bu mukelenge ne musungidi webe to. Yeye udi mulaya ne muntu yonso wamuitabuja, kena ufua kadi neikale ne moyo wa tshiendelele.

Biwikala wewe kuena muanji kumuitabuja, lelu eu didi dituku buebe wewe kumuitabuja ne kupeta biebe moyo wa tshiendelele.

Kunyima kua kalasa ka dia lumingi ungindile muaba eu ne meme nenkuleje tshiudi ne bua kuenza. (Muyishi aleje muyidi (Bayidi) muaba mujadika udibo ne bua kuhetangana bua kumulombola (Kubalombola)mushindu wa kuakidila Yesu Kilisto bu mukelenge ne musungidi.

## DILESONA 41

**TEKESE: GENESE 12: 10 – 13**

**TSHIENA BUALU:** Abalama ne Salai badi benza ndambu bulelela ndambu mashimi

**KENDELA KA DIYISHA :** Kunyima kua diyisha edi bayidi badi ne bua kujingulula ne Nzambi udi musue tuetu tuamba anu bulelela bonso, kimbua kuamba ndambu bulelela ne ndambu mashimi to.

### **KUTANGULULA (REVISION)**

Muyidi ne muyidi yonso amba malu atudi bayila mu kubikidibua kua Abalama. Muyidi kena mua kuamba malu akadi mukuabu muamba nansha.

### **KULONGOLOLA KUMPALA**

Tuala mulangi mutoke, ndambu mafuta mu dikopo, ne ndambu wa mayi mu dikopo kabidi. Neubienzela mu mbangilu wa diyisha. Nkutu ikalaku.

### **MVESE WA KUYILA**

MISAMBU 120 : 3

Nebakupe tshinyi, nebakutentekele bualu bukuabu kai pa mutu, wewe ludimi ludi ludinga.

### **MBANGILU WA DIYISHA**

Leja mulangi. Ela mafuta mumulangi ne amba ne « aa mafuta adi bu mashimi ». Sakidila mayi mu mulangi, amba ne : « mayi adi bu malu a bulelela ».

Ebeja bayidi ne : Tudi mua kusangisha malu a bulelela ne malu a mashimi oo kuenza tshintu tshimue anyi ? Pasha muyidi umue nkutu, muambila bua asambakaja mayi ni mafuta. Palekelayi, mayi ne mafuta ne bikuatangana bilua tshintu tshimue anyi ? Nansha kakese. Bidi bimueneka ne bulelela ne mashimi kabiena muakukuatangana to.

### **TRANSITION WA DILESONA**

Mu diyisha dia lelu ne dia lumingu ludi lulua kumpala ne tumone tshinyi tshakenzeka tshikondo tshiakasangisha Abalama ndambu wa bulelela ne ndambu wa mashimi.

### **BITUHA BINENE BIA DILESONA: 3**

**TSHITUHA I**

TANGILA GENESE 12:10

10. Tshiole tshiakadi mu buloba abu, ne Abalama wakaya mu Ejipitu bua kushikamamu bua tshiole tshiakadi tshikole mu buloba abu.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Tshinganyi tshiakadi mu buloba abu? (Tshiole);
- Abalama wakaya kunyi? (Mu Ejipitu);
- Wakaya mu Ejipitu bua kuenza tshinyi? (Bua kushikamamu).

### 1.B. NIVEAU MUBANDILE (Secondaire)

- Malu kayi manene atu enzeka pikala tshiole tshibuela mu musoko? (Mabedi, Lufu lua bantu ne lua nyama ne nyunyu, bupele, ...).

## 2 THEATRE : NTSHINYI TSHIDI TSHIENZEKE ?

Teka biakudia mu ditumba dia nzubu wa kalasa, amba ne : « Emu m’mu Ejipitu ». Bayidi bamue bikala badia. Bayidi bakuabo bikala badila badikuata mu difu bamba ne : « Nzala, nzalaa, katuena ne bia kudia to » mu ditumba dia nzubu wa kalasa dikuabo. Ambila muana umue wa mu groupe muibidi ikala Abalama, ne muana wa bakashi umue bu Salai. Bakuata mafu abu ne baya batangila mu Ejipitu, ne pafikabu mu ditumba dia kumpala, babanga kudia.

## 3. KUIMBA NE KUJA

Nzala ! Nzala ! Bidia kabienaku to

Abalama wakaya ku Ejipitu, ku Ejipitu.

### TSHITUHA 2

TANGILA GENESE 12 :11 – 12

11. Hakambabo kubuela mu Ejipitu, Abalama wakambila mukashi’andi Salai ne, tangila, ndi mumanye ne wewe udi mukashi muimpe kumona,

12. Ne hakumona Bena Ejipitu, bobo ne bamba ne, Eu udimukashi wandi ! Bobo nebanshihe meme, nebakushiye wewe ne moyo.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Salai wakadi mukashi wa mushindu kayi? (Muimpe kumona);
- Abalama wakadi ne bowa ne bena Ejipitu ne bamuenze tshinyi ? (Nebamushihe) ;
- Kadi Abalama wakalomba Nzambi bua yeye amuleja tshidiye ne bua kuenza anyi ? (Nansha kakese, yeye wakenza anu disua diende nkayende).



### 1.B. NIVEAU MUBANDILE (Secondaire)

- Abalama wakumvua bowa bua malu malelela a Nzambi anyi bua menji andi? (Bua menji andi);
- Udi welangana menji ne tshinyi tshivua mua kuikala solution muimpe bua kuehuka bowa ebu? (Kulomba Nzambi dikuatshisha anyi kumuebeja bua amuambila tshivuaye ne bua kuenza).

### 2. THEATRE : NTSHINYI TSHIDI TSHIENZEKE ?

Bayidi babidi benza bu Abalama ne Salai bowa bubakuata.

### 3. KUIMBA NE KUJA

Bowa ! Bowa ! Misangu mikuabo ne banshihe meme bua bakuangate. O, O !

### TSHITUHA 3

TANGILA GENESE 12 :13

13. Ndi nkutendekena ne, wamba biebe ne, Meme ndi muan'abo wa bakashi, bua meme mpete diakalengele bua bualu buebe, ne mutshima wanyi wikala ne moyo bua bualu buebe.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Abalama wakambila Salai ne amba munyi ? (Meme ndi muan'abo wa bakashi);
- Bua tshinyi wakelangana menji ne Salai amba nanku ? (Bua yeye apete diakalengela bua bualu buandi ne bua mutshima wandi wikala ne moyo) ;
- Bualu kayi bunene bua kahuayi moyo mu muanda ewu ? (Ne Salai uvua mukashi'andi) ;
- Udi welangana menji ne bua tshinyi wakabanga ne muaku eu « Ndi nkutendekena ne » ? (Uvua musue bua Salai kabengi to, itabuja bua kuamba mashimi aa);
- Bulanda kayi buvua hankatshi ha Abalama ne Salai ? (Bala Genese 20 :12). Bavua bana ba tatu umue kadi ba mamu bashilangane ;
- Mushindu kayi utudi tumanya ne malu avua Abalama muambila Salai adi ndambu bulelela ne ndambu mashimi ? (Ndambu bulelela bualu uvua muakunyenda wa tatu umue, kadi ndambu wa mashimi uvua muakshi wandi mene mene.

- Bantu bafike badi bele kasumuinu ne « Malu malelela adi bu kahia. Muntu kena mua kuteka kahia mu bisosa biuma to. Kasumuinu aka nkasua kuamba tshinyi ? Bualu bulelela ne mashimi kabena mua kubisokoka to. Bulelela ne bumueneka.

## **2. THEATRE : NTSHINYI TSHIDI TSHIENZEKE ?**

Bayidi balume bambile bayidi bakashi bua bamba ne « Amba ne udi muan'etu ». Bayidi bakashi bamba bu badi belangana menji mu mutshima : « Tshinyi ? Tuamba mashimi anyi ? »

## **3. KUIMBA NE KUJA**

Kuamba ndambu mashimi?

Mashimi makese?

Mashimi onso adi manene

O dikenga! O dikenga.

## **4. MIDIMU (DEVOIRS)**

Nuenu bena Kilisto nudifile bua nuenu kuenza anyi kuakula malu malelela onso. Mu lumingu elu lujima nudienzeje bua kuakula anu bulelela mu kuendakana kuenu.

## **5. DIBIKILA (INVITATION)**

Wewe muyidi kuena muanji kuitabuja Yesu mu mutshima webe nansha. Yesu udi mukunanga be. Udi musue bua wewe umuitabuja lelu bua upete biebe moyo wa tshiendelele. Yeye wakafua bua mibi yebe ha mutshi mutshiamakana. Biwikala musue bua kumuitabuja dituku dia lelu eu, neungidile aha bua meme kukuleja tshiudi ne bua kuenza. (muyishi aleje muyidi muaba mujadika udibo ne bua kuyikilangana kunyima kua kalasa ka dialumingu.

## **DILESONA 42**

**TEKESE: GENESE 12: 14 – 20**

**TSHIENA BUALU:** Malu akalua kunyima kua ndambu bulelela ndambu dishima

**KENDELA KA DIYISHA :**

Kunyima kua diyisha edi bayidi badi ne bua kujingulula ne kabena mua kunaya ne bualu bulelela to, bualu kudi kufikisha bubi. Ke bua tshinyi kabena mua kunaya ne bulelela mu matuku a moyo wabo to.

**KUTANGULULA (REVISION)**

Nganyi udi mua kutuleja mushindu uvua Abalama munaya ne bualu bulelela ? (Yeye wakambila Salaï bua amba ne yeye udi muan'abu. Abu buvua bulelela, kadi yeye uvua kabidi mukashi'andi. Kabuvua bulelela bonso to).

## KUTANGULULA KABIDI MIDIMU YA LUMINGU LUSHALE

Tuakunuhesha midimu (devoirs) bua kuamba anu bulelela. Nganyi udi muteta bua kuenza nunku ? Nganyi udi Satana muteya bua kuamba malu a mashimi anyi kudinga muntu mukuabo? Leja mushindu uvuabi bienzeke? Tuasakidilayi bua nuenu badi benza bimpe!

### MVESE WA KUYILA

DUTELENOME 32:4b

Nzambi wa kalolo, udi kayi ne bubu, udi ne malu makane a bushuwa.

### BITUHA BINENE BIA DILESONA: 5

#### TSHITUHA I

TANGILA GENESE 12:14 – 15

14. Hashishe hakalua Abalama mu Ejipitu, Bena Ejipitu bakatangila ne mukashi wakadi mulengele be.

15. Bakelenge bana ba Palô bakamumona, bakamuanyishila Palô; bakaya n'andi mu nsubu wa Palô.

#### 1. MUYISHI ELA BAYIDI MAKONKA AA

##### 1.A. NIVEAU MUHUEKELE (Primaire)

- Nganyi wakalua mu Ejipitu? (Abalama ne Salaï) ;
- Bena Ejipitu bakatangila ne mukashi wakadi mushindu kayi ? (Mulengele be) ;
- Banganyi bakanyishila Palô bulengele bua Salaï ? (Bakelenge bana);
- Bakaya ne Salaï kudi kunyi ? (Mu nsubu wa Palô).

##### 1.B. NIVEAU MUBANDILE (Secondaire)

- Nudi nuelangana menji ne bua tshinyi bakalenge bana ba Palô bakaya ne Salaï mu nsubu mua Palô? (Bua yeye alue mukashi'andi);
- Tuamba ne Abalama uvua muelangana menji a bualu ebubimpe kumpala anyi ? (To, kavua muelangana menji aa to ; kavua muelangana menji ne badi mua kumuenza bualu to. Uvua muelangana anu menji ne nebangangate bimpe bua muakunyanyi ;
- Bena Ejipitu bavua bamona ne bualu ebubimpe bubi anyi ? (Nansha, bavua bamona bualu ebubimpe (normal), bualu kabakamanya to ne uvua mukashi wa Abalama).

#### 2 THEATRE : NTSHINYI TSHIDI TSHIENZEKE ?

Muyidi umue bu Salaï, mukuabu bu Abalama, munga bu Palô. Bayidi bakuabo bu bakalenge bana ba Palô. Benza théâtre udi uleja mushindu wakenzakabi ne Salaï mu nsubu wa Palô.

### 3. KUIMBA NE KUJA

Abalama, bakukunyenga mukashi.

Bualu udi muena mashimi

### TSHITUHA 2

TANGILA GENESE 12 : 16

16. Yeye wakenzela Abalama bimpe bua bualu buandi, wakamuha mikoko ne ngombe, ne balume ba nyama ya mpunda, ne bahika balume ne bahika bakashi ne mashina a nyama ya mpunda ne tumelo.

S/T : Palô udi uhsha Abalama bintu bua Salaï.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Bintu bia kaheshabo Abalama kudi Palô mumane kuangata Salaï bivua bia mushinga mukole anyi mutekete ? (Bia mushinga mukole be).

#### 1.B. NIVEAU MUBANDILE (Secondaire)

- Udi welangana menji kayi diba didi Abalama mupeta bintu ebi bia bungi kudi Palô, uvua ne disanka anyi? (Misangu mikuabo, kavua mumvua bimpe mene mene to, bualu wakamona bu uvua muhana mukashi wandi).

### 2. THEATRE : NTSHINYI TSHIDI TSHIENZEKE ?

Muyidi umue ikala bu Abalama muikala ne bundu ne dibungama. Bayidi bakuabo bu bantu ba Palô balue ne nyama ne bantu bua kuhsha Abalama.

### 3. KUIMBA NE KUJA

Dikenga, O Abalama

Wakuhana Salaï

Bua mashimi ebe

O! dikenga

### TSHITUHA 3

TANGILA GENESE 12 :17

17. Yehowa wakakengesha Palô ne ba mu nsubu wandi ne bihuhu bikole bualu bua Salaï, mukashi wa Abalama.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Yehowa wakenzela Palô tshinyi bua bualu buakenzayi Salaï ? (Wakamukengesha yeye na ba mu nsubu wende ne bihuhu bikole).

### **1.B. NIVEAU MUBANDILE (Secondaire)**

- Mushindu kayi udi uleja ne Nzambi kena musue bua muntu kuangataye mukashi wa muntu mukuabo? (Wakaleja nunku hakamutuminaye bihuhu bikole).

## **2. THEATRE : NTSHINYI TSHIDI TSHIENZEKE ?**

Bayidi bonso benza bu badi basama ne mashika ne kuzakala.

## **3. KUIMBA NE KUJA**

Yehowa Nzambi wakatumba Palô bihuhu bikole, Oh dikenga bualu bubu kudi Palô.

## **TSHITUHA 4**

TANGILA GENESE 12 :18 – 19a

18. Palô wakabikila Abalama, wakamukonka ne, bualu ebu buwakungenzela budi tshinyi? Kuakungambila ne, Eu udi mukashi wanyi bualu kai?

19a. Wakungambila ne, Yeye udi muan'etu wa bakashi, bua meme kumuangata bu mukashi wanyi bualu kai?

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Palô wakenza tshinyi? (Wakabikila Abalama);
- Wakamukonka tshinyi? (Bualu ebu buwakungezela budi tshinyi?);
- Wakamona ne Abalama uvua mua kumuambila tshinyi? (Ne Salaï mukashi'anyi) ;
- Bua tshinyi Palô wakangata Salaï bu mukashi wandi ? (Bualu Abalama wa kamuambila ne eu m'muakunyanyi).

### **1.B. NIVEAU MUBANDILE (Secondaire)**

- Tshikondo tshiakamona Palô bihuhu bikole mu nsubu muandi, wakelangana menji kayi? (Yeye wakelangana menji ne Salaï uvua mukashi wa bende wa Abalama, meme na kumuangata);

- Mushindu kayi udi Abalama mufikisha Palô bua kuenzaye bubu ebu? (Bualu wa kamushima), mashimi ke adi makeba bualu ebu bunene.

## 2. THEATRE : NTSHINYI TSHIDI TSHIENZEKE ?

Bayidi babidi benze bu Abalama ne Palô.

### 3. KUIMBA NE KUJA

Abalama wakubueja bantu bakuabo mu bubu. Mashimi ebe, mashimi ebe.

## TSHITUHA 5

TANGILA GENESE 12 :19b – 20

19b. Ka, tangila mukashi webe, umuangate, uye biebe mu nshila webe.

20. Palô wakadimusha bantu bandi bua bualu buandi, ne bakaya n'andi ne mukashi wandi, ne bintu biandi bionso mu nshila.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Palô wakambila Abalama tshinyi? (Tangila mukashi webe, umuangate, uye biebe mu nshila webe);
- Palô wakadimusha ba nganyi bua bualu buandi? (Bantu bandi).

### 1.B. NIVEAU MUBANDILE (Secondaire)

- Ntshinyi tshivua (tshiakenzeka) ndekelu wa mashimi a Abalama? (Palô wa kabahatula mu Ejipitu);
- Abalama udi umue wa bilobo (heros) bia mu mukanda wa Nzambi, bua tshinyi Yehowa kena musokoka bubu buende to? (Muyishi umvue mandamuna a bayidi. Bidi mua kuikala ne tuetu tuyile ne tumanye bubu ebu. Bidi mua kuikala ne tuetu tudikolesha mu misangu yonso itudi tukuluka mu malu mabi, ne tumanye ne bantu bakuabo ba kakuluka ne bakajuka kabidi. Ne tumone ne Yehowa udi utuleja malu mimpe ne mabi a bantu bandi).

## 2. THEATRE : NTSHINYI TSHIDI TSHIENZEKE ?

Bayidi bonso benza bu badi ba Palô bihata Salaï ne Abalama mu Ejipitu.

### 3. KUIMBA NE KUJA

O! mashimi O! mashimi, Lekela mashimi

## 4. MIDIMU (DEVOIRS)

Mu lumingu elu, nuenze muenu monso bua nuamba anu malu malelela.

## **5. DIBIKILA (INVITATION)**

Wewe kuena mumanye mua kuamba bulelela to, bualu kuena muanji kuitabuja Yesu Kilisto bu mukalenge ne musungidi nansha. Biwasua bua kumuitabuja lelu eu, usomba apa bua meme nenkuleje mushindu wa kumuitabuja. (muyishi aleja muaba mujadika udiyi mua kuambuluisha bayidi anyi muyidi eu.

## **DILESONA 43**

**TEKESE: GENESE 13: 1 – 4**

**TSHIENA BUALU:** Abalama udi uhingana kudi Nzambi

**KENDELA KA DIYISHA :**

Kunyima kua diyisha edi, bayidi bamanye mua kuhingana kudi Nzambi bikalabu bahambuke mu njila wandi, benza bibi ne kabajanguluki nansha.

**KUTANGULULA MIDIMU YA LUMINGU LUSHALE**

Tuvua banuhesha mudimu bua nuenu kuambila bantu anu malu malelela, anu malelela onso. Nganyi udi muteta bua kuamba nunku ne bivua bienzeka mushindu kayi ?

**MVESE WA KUYILA**

DUTELENOME 30 : 2 – 3

2. Ne hanuakudimuna mitshima yenu kudi Yehowa, Nzambi wenu, bua kutumikila mei andi ne mitshima yenu yonso ne mioyo yenu yonso, bu munakunuambila lelu, ne nuenu ne bana benu,

3. Hashishe Yehowa, Nzambi wenu, neakudimune buhika buenu, neanulushe luse.

**TRANSITION WA DILESONA**

Kunyima Abalama mumane kuenza bualu ebu bubi ne bua bundu mu Ejipitu bua mashimi andi ne bamane kumuihata mu buloba ebu; ne Yeye kakashala mu état eu to. Ne lelu eu netumona ne Abalama wakenza tshinyi.

**BITUHA BINENE BIA DILESONA: 3**

**TSHITUHA I**

Abalama udi upingana mu kanana ne diku diende.

TANGILA GENESE 13:1

1. Abalama wakumuka mu Ejipitu ne mukashi'andi ne bintu biandi bionso ne Lota, wakaya mu luseke lua ku sude.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Abalama wakumuka kunyi ? (Mu Ejipitu) ;
- Wakumuka ne banganyi ? (Mukashi'andi ne Lota) ;
- Wakaya mu luseke kayi? (Lua ku Sude);
- Wakumuka ne bintu kayi ? (Bintu bionso).

### 1.B. NIVEAU MUBANDILE (Secondaire)

- Elanganayi koku menji, Abalama wakumvua tshinyi mu mutshima wandi? (Muyishi umvue menji a bayidi bandi. Kubumue wakumvua bundu, kubumue bowa bualu Palô wakadi ne tshinji bua bualu buandi).

## 2 THEATRE : NTSHINYI TSHIDI TSHIENZEKE ?

Tahulula mu kalasa kebe miaba ibidi kule kule : Ejipitu ne Kanana. Bayidi bonso benza bu Abalama ne diku dienda ba hatuka mu Ejipitu ne bundu, bowa ne baye batangila mu kanana.

## 3. KUIMBA NE KUJA

Ne bundu ne bowa

Abalama wakaluhuka mu Ejipitu mu tangile mu kanana ne diku ne bintu biende bionso

### TSHITUHA 2

#### S/Thème: BUBANJI BUA ABALAMA

TANGILA GENESE 13: 2

2. Abalama wakadi ne bubanji be bua bimuna ne argent ne or.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Abalama wakadi muhele anyi ? (To, wakadi mubanji) ;
- Abalama wakadi ne bubanji bua tshinyi? (Bua bimuna) ;
- Ne tshinyi tshikuabo ? (Argent ne or).

### 1.B. NIVEAU MUBANDILE (Secondaire)

- Udi welangana menji ne malu kayi mimpe a Nzambi avua ne Abalama bua kuenza mu Ejipitu ? (Kuumba malu malelela kumpala kua Palô ne bantu bandi, kubaleja Nzambi ne buobumue buandi ne Nzambi).



## 2. THEATRE : NTSINYI TSHIDI TSHIENZEKE ?

Bayidi bonso hohamue benza bu badi babala mikoko, mbuji, ngombe, argent ne or munda munda baleja ne minu yabu.

### 3. KUIMBA NE KUJA

Bubanja budi tshinyi

Bikala bienzedi bibi

Abalama ne bubanja kadi wakuhwa Nzambi moyi

### TSHITUHA 3

TANGILA GENESE 13 : 3 – 4

3. Wakatshidi uya ku Sude to ne ku Betele kuakashimikaye ntenta wandi diambedi, hankatshi ha Betele ne Ai.

4. Wakaya kuakenzaye tshioshelu diambedi, ne Abalama wakabikilaku dina dia Yehowa.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Abalama wakatshidi uya kudi kunyi ? (Ku Sude) to ne ku Betele;
- Ku Sude ne ku Betele kuakadi tshinyi? (Ntenta wandi diambedi) (Musoko Betele udi umvuija: Nzubu wa Nzambi) ;
- Ntenta wakadi henyi ? (Hankatshi ha Betele ne Ai) ;
- Abalama wakaya henyi ne wakenza tshinyi? (Wakaya kuakenzaye tshioshelu diambedi ne wakabikila dina dia Yehowa).

### 1.B. NIVEAU MUBANDILE (Secondaire)

- Abalama wakahingana mu muaba wakatendelelaye Yehowa ebu bualu budi buleja tshinyi? (Udi musue kuhingana mu buobumue ne Nzambi).Biwikala uvua mubobumue, ne Nzambi nunku mpindieu udi umona bu udi nebe kule, nganyi udi mumuka (mulamuka) kudi mukuabu? (Wewe ngudi mumuka (mulamuka), Nzambi udi anu muomumue).

## 2. THEATRE: NTSINYI TSHIDI TSHIENZEKE?

Bayidi bonso dia tshimue benza bu badi balue ku Betele badihuekeshe bamba ne “Tuakuhingana kudi”.

### 3. KUIMBA NE KUJA

Hingana, hingana hingana

Biwikala wakujimina mu njila wa Nzambi.

#### 4. MIDIMU (DEVOIRS)

Biwikala wakubanga kusesuka mu njila wa Nzambi mu bienzedi biebe, kuindidi to bua Nzambi akufuisha bundu. Upingana kudiye lelu eu ne Yeye neakuakidile.

#### 5. DIBIKILA (INVITATION)

Misangu mikuabo wewe kuena muanji kuikala habuipi ne Nzambi to. Nansha wewe muikala mu Ecodim, udi hambelu ha diku dia bena kuitabuja bualu kuena muanji kukudimuna mutshima webe nansha bua wewe kuitabuja Yesu Kilisto bu Mukelenge ne Musungidi webe nansha. Kadi udi musue kulua habuihi n'andi anyi dituku dia lelu? Biwikala musue, suaku ulue kuyukilangana n'anyi kunyima kua diyisha edi (Muyishi aleja muyidi eu muaba bua kumulombolaye bimpe bua kuitabuja Yesu Kilisto ne kubelaye mu mutshima wandi).

### DILESONA 44

**TEKESE: GENESE 13: 5 – 9**

**TSHIENA BUALU:** Abalama udi ukeba ditalala ne Lota

**KENDELA KA DIYISHA :**

Kunyima kua diyisha edi, bayidi badi ne bua kumanya ne Nzambi udi musue bantu badi bakeba ditalala munkatshi muabu. Nunku bayidi ne bakebe mua kuikala bantu badi bateka ditalala munkatshi mua bantu bakuabo.

**KUTANGULULA (REVISION)**

- Lota uvua muan'abu ne Abalama mushindu kayi? (Genese 11:27) (Lota uvua muana wa Halana, Halana wakadi muakunyi wa Abalama).
- Nganyi (Banganyi) bakaya ne Abalama mu luendu elu? (Salai, mukashi'andi ne Lota muana wa muakunyi'andi wa balume).
- Mbuena kuamba ne Lota biandi wakaya ne Abalama mu Ejipitu anyi ? (Ee, Yeye wakaya n'ende mu Ejipitu ne kuhingana n'andi kabidi mu kanana).

**KUTANGULULA MIDIMU YA LUMINGU LUSHALE**

Devoir wa lumingu lushale uvua bua nuenu misangu yonso inudi numona ne nuakusesuka mu njila wa Nzambi nansha kakese, nukebe mushindu wakuhingana. Nganyi udi mutete kuenza nunku, anyi diyisha edi n'ndi mukuatshisha munyi?

**MVESE WA KUYILA**

MATAYO 5: 9

9. Basungi ba bantu badi ne disanka, bua ne bababikile ne, bana ba Nzambi.

**TRANSITION WA DILESONA**

Mushindu kayi udi Nzambi umona bikala bena muntu bakokangana? Lelu eu netumona mushindu wakenzeka hakadi Abalama ne Lota bakokangana.

### **BITUHA BINENE BIA DILESONA: 3**

#### **TSHITUHA I**

TANGILA GENESE 13:5

5. Lota wakaya ne Abalama, ne yeye wakadi ne mikoko ne bimuna ne ntenta.

#### **1. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Nganyi wakaya na Abalama ? (Lota) ;
- Lota wakadi ne binganyi ? (Ne mikoko, bimuna ne ntenta).

##### **1.B. NIVEAU MUBANDILE (Secondaire)**

- Udi welangana menji ne bumuvua Abalama ne Lota bikala bonso buabu ne bintu bia bungi bavua mua kukongana anyi? (Muyishi unvue menji a bayidi. Bidi bimueneka ne kabavua mua kukokangana nansha bualu muntu ne muntu uvua ne bimuna ne bintu bia bungi bikumbane).

#### **2 THEATRE: NTSINYI TSHIDI TSHIENZEKE ?**

Bayidi bonso hohamue benza bu Lota ubala mikoko ne bimuna biende.

#### **3. KUIMBA NE KUJA**

Lota uvua ne mikoko Mmeee Mmeee  
Ne bimuna bia bungi ngi ! ngi ! ngi !

#### **TSHITUHA 2**

TANGILA GENESE 13: 6 – 7

6. Muaba wakadi mukese bua bobo kushikama hohamue ; bualu bua bintu biabo biakadi bia bungi, kabakamanya mua kushikama hohamue.
7. Balami ba bimuna bia Abalama ne balami ba bimuna ba Lota bakatandangana. Bena kanana ne bena Pelese bakadi mu buloba tshikondo asthi.

#### **1. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Bobo kushikama hohamue, mbanganyi? (Abalama ne Lota) ;

- Bintu biabu biakadi bikese anyi bia bungi ? (Biabungi mene mene) ;
- Mbanganyi bakatandangana ? (Balami ba bimuna bia Abalama ne balami ba bimuna bia Lota) ;
- Mbanganyi bakadi kabidi mu buloba abu ? (Bena kanana ne bena Pelese).

### **1.B. NIVEAU MUBANDILE (Secondaire)**

- Udi muakumvuija bimpe bua tshinyi balami ba bimuna ba Abalama ne balami ba bimuna ba Lota bakatandangana ? (Muyishi umvue menji a muyidi ne muyidi. Kubumue balami ba bimuna ba Lota bakamona ne bimuna bia Abalama bia kudia mabeji a bungi mahite, anyi mabeji adi mimpe mene mene kuhita bimuna bietu).

### **2. THEATRE : NTSHINYI TSHIDI TSHIENZEKE ?**

Bayidi basatu bikala balami ba bimuna bia Abalama

Bayidi basatu bikala balami ba bimuna bia Lota

Batandangana bobo nkayabo bua muaba wakudishabo bimuna

### **3. KUIMBA NE KUJA**

O ! dikenga ! Balami badi baluangana

#### **TSHITUHA 3**

TANGILA GENESE 13 : 8 – 9

8. Abalama wakambila Lota ne, Ndi nkutedekena ne, katutandianganyi ; balami ba bintu bietu kabatandianganyi, bualu bua tudi bana ba muntu umue.
9. Buloba buonso kabuena kumpala kuele anyi ? Ndi kutendekena ne, tahuluka kundi: Biwaya ku tshianza tshia bakashi, nenye bianyi ku tshianza tshia balume; biwaya ku tshianza tshia balume nenye bianyi ku tshianza tshia bakashi.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Nganyi wakangata bukokeshi bua kukosa nsambu eyi ? (Abalama) ;
- Mbuena kuamba ne wakamona bu malu aa adi muakututahulula anyi ? (Nansha kakese, Yeye wakamba ne, “Tudi bana ba muntu umue”).
- Abalama wakamona kutandangana kua balami ba bimuna mushindu kayi ? (Kakadi ne disanka nansha kakese) ;
- Mushindu kayi wakakosaye nsambu eyi ? (Tahuluka kundi, bua Lota asungule kumpala tshidiye (buloba) musue).

### **1.B. NIVEAU MUBANDILE (Secondaire)**

- Bua tshinyi Abalama wakajinga ne Lota asungula kumpala ? (Kubumue bavuanu muakukonkangana ne yeye wakangata buloba (muaba) butamba buimpe);
- Mu bubidi buabu nganyi uvua ne bukokeshi bua kusungula kumpala? (Abalama ke uvua ne bukokeshi bua kusungula kumpala kadi, wakenza nanku bua kujikija muanda eu mu ditalala dionso);
- Wewe biebe, diba didi Nzambi mukubikila ukadi mujimije bukokeshi (droit) buebe bua wewe kukeba ditalala anyi? (Muyishi atelega mandamuna a bayidi bandi).

## **2. THEATRE: NTSHINYI TSHIDI TSHIENZEKE?**

Bayidi babidi umue Abalama, mukuabo Lota, ubaleje mushindu udibo mua kuenza mu tshituha etshi.

### **3. KUIMBA NE KUJA**

Abalama ne “Sungula wewe kumpala”  
Ndi nkeba ditalala

### **4. MIDIMU (DEVOIRS)**

Mu lumingu elu, keba mushindu wa wewe kubueja ditalala munkatshi mua bantu badi bakokangana anyi badi kabayi bumvuangana to. Pa bualu ebu Nzambi neikale ne disanka bua bualu buebe. Nansha biobi bikala bua kujimija intérêt anyi droit yebe, ubienze bua Nzambi angata butambi.

### **5. DIBIKILA (INVITATION)**

Biwikala musue kuitabuja Yesu Kilisto bu Mukelenge webe, dituku dia lelu ndiebe wewe bu wenze milombo eyi: “Tatu Nzambi, ndi mumanye ne ndi muenji wa malu mabi. Ndi ngitabuja ne Yesu Kilisto wakafua bua mibi yanyi ne wakabika ku lufu. Mpindieu ndi nteka ditekemena diany dionso kudiye tuasakidila bualu wakumbuikidila mibi yanyi ne wakumvuija muan’ebe mu diku diebe mu dina dia Yesu Kilisto Amen.

## **DILESONA 45**

**TEKESE: GENESE 13: 10 – 13**

**TSHIENA BUALU:** Lota wakasungula buloba buimpe ne bubi

**KENDELA KA DIYISHA :**

Kunyima kua diyisha edi, bayidi badi ne bua kujingulula ne mu malu mbimpe bua kukeba disua dia Nzambi. Nunku bobo biabo bakebe disua dia Nzambi kumpala kua kuenza bualu.

**KUTANGULULA (REVISION)**

Bayidi baleja mushindu kayi Abalama wakakeba ditalala ne muan'abu Lota.

## **KUTANGULULA MIDIMU YA LUMINGU LUSHALE**

Mu lumingu lushale, nganyi wakenza mushindu wakuteka anyi kufila ditalala munkatshi mua bantu ? Bivua bienzeke mushindu kayi ?

## **MVESE WA KUYILA**

MISAMBU 1: 1

1. Disanka didi kudi muntu udi kayi ulomba lungenyi lua bantu babi, udi kayi wimana mu nshila diatshimue ne benji ba malu mabi, udi kayi mushikame mu tshisombelu tshia babuidi.

## **TRANSITION WA DILESONA**

Mushindu kayi uvua musungula buloba ne bilua kushintuluka nsombelu wandi kunyima. Netumona mu nvese idi ilonda eyi mu Genese 13 :10.

## **BITUHA BINENE BIA DILESONA: 2**

### **TSHITUHA I**

TANGILA GENESE 13:10 – 11

10. Lota wakabanduluka, wakamona mpata ne bibanda bia musulu wa Yadene ne tusulu (tukuabo) tuakadi kuonso diambedi Yehowa kayi muanze kushiha Sodoma ne Amola ; mpata au wakadi bu tshibundu tshia Yehowa, wakadi bu buloba bua Ejipitu, hawaya mu nshila wa ku Soâ.

11. Nunku Lota wakasungula mpata wonso wa Yadene, wakaya biandi ku Esete, bakahandulukangana nunku.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Lota wakasungula mpata wa mushindu kayi? (Mpata muimpe wonso wa bibanda bia musulu wa Yadene, wakadi bu buloba bua Ejipitu);
- Misoko kayi ibidi yakadi mu mpata ayi ? (Sodoma ne Amola);
- Bualu kayi bumue bunene buvua kabuyi buanze kuenzeka mu misoko eyi? (Yehowa kavu muanze kushiha bantu mu misoko eyi to).
- Mpata au wakadi mushindu kayi? (Bu tshibundu tshia Yehowa).

### 1.B. NIVEAU MUBANDILE (Secondaire)

- Nansha mpata wakasungula Lota muikala muimpe, tshinyi tshivua tshileja bualu bua njiu ? (Kunyima, Nzambi wakalua kushiha bantu mu misoko ayi bualu malu mabi avuamu) ;
- Tuamba ne Lota wakakeba disua dia Nzambi mu kusungula kuandi anyi ? (Nansha, tshilema tshinene tshiakenzaye).

### 2 THEATRE: NTSHINYI TSHIDI TSHIENZEKE?

Bayidi bonso hohamue benza bu badi ba Lota batangila mpata yonso. Bamba ne: “Eyi mpata mimpe mene mene”, umpeshayi”

### 3. KUIMBA NE KUJA

Disanka! Lota wakasungula mpata mimpe  
Dikenga! Lota wakasungula misoko mibi

### TSHITUHA 2

TANGILA GENESE 13: 12 – 13

12. Abalama wakikala mu buloba bua kanana; Lota wakashikama mu misoko ya mu mpata; wakashimika ntenta yandi to ne ku Sodoma.
13. Bantu ba mu Sodoma bakadi babi, bakatamba kuhidia Nzambi.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Abalama wakikala mu buloba kayi ? (Bua kanana);
- Lota wakashimika ntenta yandi kunyi ? (Ku Sodoma);
- Bantu ba mu Sodoma bakadi mushindu kayi? (Bakadi babi, bakatamba kuhidia Nzambi).

#### 1.B. NIVEAU MUBANDILE (Secondaire)

- Biwikala musue kusungula musoko udi musue kusomba ne diku diebe dionso, tshinyi tshidi tshia mushinga, buimpe bua musoko anyi mbuimpe bua bantu badi mu musoko ? Bua tshinyi ? (Muyishi umvue menji a bayidi bende. Bantu babi badi muakukengsha diku diebe. Badi mua kuhesha bena diku diebe bikadilu bibi. Ne bikale bualu bukole bua wewe kusomba bimpe ne Nzambi munkantshi mua bantu babi.

## 2. THEATRE : NTSHINYI TSHIDI TSHIENZEKE ?

Bayidi bamue benza bu badi Lota ne diku diende.

Bakuabo bikala bu bantu babi ba Sodoma. Bantu ba Sodoma benza anu malu mabi. Lota aye kusomba n'abu

## 3. KUIMBA NE KUJA

(Dikenga)

Lota wakaya kuasa mutumba ne Sodoma. Wakaya kusomba ne bantu babi

## 4. MIDIMU (DEVOIRS)

Wewe biebe usungula mu malu aa:

- Kusungula mulunda muimpe;
- Kusungula mikanda ya kubala;
- Kusungula video kayi udi mua kutangila;
- Kusungula bualu bumue: Kutumikila baledi anyi to;
- Kusungula bua kuenza magie anyi to.

Mu lumingu elu, elangana menji ne keba menji kudi Nzambi bua bionso biudi musue kuenza.

## 5. DIBIKILA (INVITATION)

Misangu mikuabo kuena muanji kuitabuja Yesu Kilisto bu Mukelenge ne Musungidi webe mu moyo webe. Biwikala kuyi muanji ku muitabuja to ne lelu to. Biwikala musue kumanya malu aa, luaku kundi kunyima kua diyisha edi meme nengikala ne disanka bua meme kukuambuluisha.

## DILESONA 46

**TEKESE: GENESE 13: 14 – 18**

**TSHIENA BUALU:** Nzambi udi ulaya Abalama buloba bunene ne diku dinene

**KENDELA KA DIYISHA:**

Kunyima kua diyisha edi, bayidi ne bajingulula ne Nzambi udi ne bukokeshi bua kuenza bualu buonso. Habualu ebu bobo bamutekemena mu malu abu onso.

**KUTANGULULA (REVISION)**

Tahulula bayidi mu bituha bibidi:

Umue bamba malu mimpe (positifs) a Abalama.

Mukuabu bamba malu mabi (négatifs) andi.

**KUTANGULULA KABIDI MIDIMU YA LUMINGU LUSHALE**



Tuakanuhesha mudimu bua ne nuenu kukeba Nzambi anyi kulomba bulombodi (menji) buandi kumpala kua nuenu kuangata dihangadika (kusungula). Nganyi udi muteta kuenza nunku, ne atuleja mushindu udibio bienzeke ?

## **MVESE WA KUYILA**

LUKA 1: 37

37. Bualu bua kakuena dî dimue dia Nzambi didi kadî ne bukole.

## **ANDAMUNA KU MAKONKA AA NE E, E ANYI TO, TO**

- Kubuka mulu to ne kukuata ngondo ne mitoto (To, to);
- Kuibaka nsubu wa bunene bua 60m/60 mu dituku dimue (To, to);
- Kumanya miakulu yonso ya buloba bujima (To, to);
- Kuya kumona Etats-unis mu bule bua minute 1 (To, to).

## **TRANSITION WA DIYISHA**

Lelu eu netumone mushindu udi Nzambi ulaya Abalama malu adi muntu wa ha buloba kayi mua kuenza to, kadi anu Yeye nkayandi.

## **BITUHA BINENE BIA DILESONA: 5**

### **TSHITUHA I**

TANGILA GENESE 13:14 – 15

14. Hakahanduluka Lota, Yehowa wakambila Abalama ne, bandisha mesu ebe ha muaba ûdi muimane, utangile ku Nôde ne Sude ne ku Esete ne ku Wesete;
15. Buloba buonso bûdi umona nenkuhebu ne tunkanunuine tuebe tshiendelele.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Bamane kuhanduluka ne Lota, nganyi wakambila Abalama? (Yehowa) ;
- Yehowa wakamuambila tshinyi? (Bandisha mesu ebe ha muaba ûdi muimane, utangile ... ;
- Nzambi wakambila Abalama ne buloba buonso bûdi umona ne ngenze tshinyi ? (Nenkuhebu ne tunkanunuine tuebe) ;
- Bua matuku bungi munyi ? (Tshiendelele).

### **1.B. NIVEAU MUBANDILE (Secondaire)**

- Yehowa wakambila Abalama ne buloba ebu buonso bûdi umona nenkuhebu ne tunkanunuine tuebe, kadi kakamuambila ne yaku ubunyenga katataka to, wakamuambila tshinyi ? (Kutangila tshianana) ;
- Udi welangana menji kayi ne meyi aa avua akahesha Abalama dikima (encouragement) (Muyishi umvua menji a bayidi).

## **2 THEATRE: NTSHINYI TSHIDI TSHIENZEKE?**

Muyidi umue ikale bu Lota uya mu mpata udiye musungula. Muyidi mukuabo bu Abalama ulaya Lota kadi muikala ne dibungama.

### **3. KUIMBA NE KUJA**

Tangila Abalama, tangila bimpe

Tangila buloba ebu buonso, Meme Yehowa, nekuhebu ne tunkanunuine tuebe tshiendelele.

#### **TSHITUHA 2**

TANGILA GENESE 13: 16

16. Nekuvudishile tunkanunuine tuebe, netuikale bu dimfuenkenya dia buloba; nunku biamanya muntu mua kubala dimfuenkenya dia buloba, hashishe tunkanunuine tuebe netubadibue kabidi.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Tunkanunuine tua Abalama ne tuikala mushindu kayi? (Tuabungi mene mene) ;
- Netuikale tua bungi bu tshinyi? (Bu dimfuenkenya dia buloba).

#### **1.B. NIVEAU MUBANDILE (Secondaire)**

- Tela milayi minene ibidi ya Nzambi kudi Abalama? (Buloba bunene ne tunkanunuine tua bungi) ;
- Mu tshikondo tshidi Yehowa ulaya Abalama bintu ebi bibidi, Abalama uvua n'abi anyi ? (Buloba ne bana) (Nansha yeye muikala usomba mu boloba abu, kabuvua buanji kuikala buandi to. Ne kabidi kavua muanji kuikala ne muana to.

## **2. THEATRE : NTSHINYI TSHIDI TSHIENZEKE ?**

Muyidi yonso angata dimfuenkenya dia buloba mu tshianza ne abale kamue ku kamue. Kena mua kubala to. Mushindu umue mudi Yehowa wamba ne tunkanunuine tua Abalama kakuena muntu udi mua kubala to nansha kakese.

### **3. KUIMBA NE KUJA**

Teleja Abalama, teleja bimpe  
Nansha wewe kuyi ne muana to  
Neulele tshisamba tshinene ee

### **TSHITUHA 3**

TANGILA GENESE 13:17

17. Bika biebe, wendakana mu buloba buonso, mu bule buabu ne mu butshiana buabu;  
bualu bua nenkuhebu.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Aha Yehowa udi wambila Abalama tshinyi ? (Bika biebe, wendakana mu buloba buonso, ...).

### **1.B. NIVEAU MUBANDILE (Secondaire)**

- Bua tshinyi Nzambi uvua musue bua Abalama atangila buloba tshikondo atshi ? (Muyishi umvue mandamuna a bayidi bandi).

## **2 THEATRE: NTSINYI TSHIDI TSHIENZEKE?**

Muyidi umue ikale Yehowa. Mukuabo Abalama, Yehowa wambila Abalama ne « Bika biebe, wendakana mu boloba, ... bualu nenkuhebu.

## **3. KUIMBA NE KUJA**

Bika biebe, wendakana mu buloba  
Bualu nenkuhebu

### **TSHITUHA 4**

TANGILA GENESE 13: 18

18a. Abalama wakatula ntenta yandi, wakamuangala, wakaya kushikama hehi ne mitshi ya telebinte ya mamale idi mu Hebelone.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Hakamuangala Abalama wakaya kushikama hehi ne tshinyi ? (Ne mitshi ya telebinte ya Mamale) ;
- Mu musoko kayi ? (Mu Hebelone).

### **1.B. NIVEAU MUBANDILE (Secondaire)**

- Diteka muaba wa Abalama, bu wewe, udi muakuikala muitabuja meyi a Nzambi anyi ? Bua tshinyi ? (Muyishi umvue menji a bayidi bandi).

### **2. THEATRE : NTSHINYI TSHIDI TSHIENZEKE ?**

Bayidi bonso benza bu badi baya ne Abalama bu badi bamuambuluisha bua kuibaka nsubu ku Hebelone.

### **3. KUIMBA NE KUJA**

Abalama yaku kushikama ku Hebelone.

#### **TSHITUHA 5**

TANGILA GENESE 13: 18b

18b. Wakenzelaku Yehowa tshioshelu.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Abalama wakenzela Yehowa tshinyi ha muaba au ? (Tshioshelu)
- Bua tshinyi? (Bua kumutendelela).

#### **1.B. NIVEAU MUBANDILE (Secondaire)**

- Ne wewe biebe Yehowa ukadi koku mukulaya malu mimpe ? Kadi ukolesha moyo. (Muyishi umvue menji a bayidi bandi mu matuku a moyo wabu).

### **2. THEATRE : NTSHINYI TSHIDI TSHIENZEKE ?**

Bayidi bonso benza bu badi bibaka tshioshelu bua kutendelela Yehowa.

### **3. KUIMBA NE KUJA**

Ku Hebelone Abalama wakatendelela Yehowa

#### **4. MIDIMU (DEVOIRS)**

Wewe muena Kilisto, biwikala umona malu makuhitshila bukole, udi wenza tshinyi? Uvuluke ne kakuena bualu budi buhita Nzambi bukole to. Angatayi devoir anyi mudimu eu bua lumingu elu: Biwamona dikenga anyi bualu bukole bukuluila, bikila Nzambi webe anyi shiya bualu abu mu bianza biandi.

#### **5. DIBIKILA (INVITATION)**

Kadi biwikala kuyi muanze kumanya Yesu Kilisto, bikengela wewe kusemena habuihi n'andi, kuitabuja mibi yebe. Kumubikila bua Yeye akusungile. Udi muakumubikila mpindieu anu mu muaba ûdi usanganyibua (mu njila, mu nsubu, muitu, ...), bualu Yeye udi miaba ayi yonso.

Muambila ne ndi muitabuje, unsungila mpindieu, meme nengikale ne disanka bua kumanya ne udi mubuele mpindieu mu diku bia bena kuitabuja ne bana ba Nzambi Amen!

## DILESONA 47

**TEKESE: GENESE 14: 1 – 7**

**TSHIENA BUALU:** Mvita idi mu musoko wa Lota

**KENDELA KA DIYISHA:**

Kunyima kua dilesona edi, bayidi badi ne bua kujingulula ne malu makole anyi makenga adi atukuata anu bua bulembakane buetu. Ke bualu kayi tudi ne bua kulonda diyi dia Nzambi bua kuehuka bulembakane abu.

**KUTANGULULA (REVISION)**

Nganyi udi muakutela milayi ya Nzambi kudi Abalama ? (Kumuhesha buloba, kuikala ne tunkanunuina tua bungi, kuikala muntu munene, kumusankisha, kuvuija bantu bakuabo disanka mu yeye).

**KUTANGULULA DEVOIRS (MIDIMU) YA LUMINGU LUSHALE**

Tuakanuhesha mudimu bua ne nuenu kukeba dikuatshisha dia Nzambi mu malu makole anyi dikenga kampanda. Nganyi udi mua kutuleja mushindu udiye mukebe dikuatshisha edi ?

**MVESE WA KUYILA**

NSUMUINU 1: 30 – 31

30. Kabakasua kuitabusha lungenyi lunakabalesha, bakahetula kubela kuanyi kuonso.

31. Bua malu â nebadie mamuma adi bienzedi biabu bikuama, ne bukute ne malu adibo bahangidisha.

**BIA KUENZA KUMPALA**

Dilesona edi didi ne mena a bungi, a bantu ne a miaba. Bidi bikengela mubadi muimpe ne abalulula misangu ya bungi (pratique) kumpala kua diyisha. Bidi bikengela kulongolola

(préparation) bimpe dilesona dionso. Longolola bifulu bia ba mfumu ne dibeji dikole (papier bristol). Tshifulu tshionso tshikala ne dina mu dikala (couleur) mukunze (dikunze).

1. Amalafine wa mu Shinâ ;
2. Ayoka wa mu Elasâ ;
3. Kedôlaome wa mu Elana ;
4. Tidala wa mu Goyima.

Longolola bifulu bishilangane ne ebi ne mena mu dikala difike :

1. Bela wa mu musoko wa Sodoma ;
2. Bisha wa mu musoko wa Amola ;
3. Shinabe wa mu musoko wa Adema;
4. Shemebe wa mu musoko wa Seboi
5. Soa wa mu musoko wa Bele

**N.B:** Pawikala muenzele bifulu ebi mu dilesona edi ubilame bimpe, ne bikuambuluishe mu dilesona dikuabo kumpala.

## TRANSITION WA DIYISHA

Tuakumona ne Lota kakebeja Nzambi to bua kusungula muaba wakusomba ne kakamanya kabidi ne bantu ba mu muaba au badi mushindu kayi? Ke bualu kayi udi uhola tshiakakunaye. Lelu tudi tumona mu dilesona edi tudi tumona malu makole akamuluila kunyima kua disungula diandi dibi (mu menji andi).

## BITUHA BINENE BIA DILESONA: 5

### TSHITUHA I

TANGILA GENESE 14:1 – 2

1. Mu matuku â Amalafele, mukelenge wa Shinâ, ne Ayoka, mukelenge wa Elasâ, ne Kedôlaome, mukelenge wa Elama, ne Tidala, mukelenge wa Goyima.
2. Bakaluangana mvita ne Bela, mukelenge wa Sodoma, ne Bisha, mukelenge wa Amola, ne Shinaba, mukelenge wa Adema, ne Shemebe, mukelenge wa Bena Seboi, ne mukelenge wa Belê (eu udi Soâ).

Muyishi, bu mudi mena mikale a bungi mu mvese eyi, paudi ubala ne ufika ha dina didi diela kashonyi muinshi muadi, usungula muyidi umue alue kumpala bu muntu au. Umuhesha tshifulu tshidi ne dina dia muntu au ne atshivuale ku mutu kuandi. Groupe muibidi wa bamfumu udi ne tushonyi tubidi muinshi. Uheshe kabidi tshifulu tshia mfumu kudi muyidi umue bua mfumu yonso.

1. Bamfumu aba : Amalafele, mukelenge wa Shinâ, Ayoka, mukelenge wa Elasâ, Kedôlaome, mukelenge wa Elama, Tidala, mukelenge wa Goyima.

2. Bakaya kuluangana mvita ne bamfumu aba batanu : Bela, mukelenge wa Sodoma, ne Bisha, mukelenge wa Amola, ne Shinaba, mukelenge wa Adema, ne Shemebe, mukalenge wa Bena Seboi, ne mukelenge wa Belê (Soâ).

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Bamfumu aba banayi (leja bayidi aba banayi), bakaya kuenza tshinyi ne bamfumu batanu ? (Kuluangana n'abu mvita).
- Tangila munkatshi mua bamfumu ba mu Sodoma ne Gomela (Ambila bayidi abu). Udi welangana menji kayi bua misoko eyi ? (Yehowa wakalua kubashiha) ;
- Kuikala mu musoko udi mvita udi ne disanka anyi to ? (Nansha dikese).

### **1.B. NIVEAU MUBANDILE (Secondaire)**

- Malu kayi mabi atu enzeka mu tshikondo tshia mvita ? (Lufu lutu lubuela mu bantu, mu bimuna, masama, buhika, nzubu, musoko udi ufua, madimi ne nzala idi ibuela mu bantu, etc...).

## **2. THEATRE: NTSHINYI TSHIDI TSHIENZEKE?**

Bayidi ba bifulu bikunze baye kuluangana mvita ne bayidi ba bifulu bifike. (Ebi bidi bileja anu manaya wenza attention bua kabayi kuluangana bia bulelela to).

## **3. KUIMBA NE KUJA**

Bamfumu banayi bakaya kuluangana ne bamfumu batanu  
O dikenga ! O dikenga !

### **TSHITUHA 2**

TANGILA GENESE 14: 3

3. Bantu aba bonso bakadisangisha mu tshibanda tshia Sidima (esthi ntshibanda tshia dishiba dia Mai a Luehu).

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Bamfumu aba batanu, bakaya kuluangana umue ku umue anyi bakumvuangana ? (Bakumvuangana) ;
- Bakadisangisha henyi ? (Mu tshibanda tshia Sidima).

### **1.B. NIVEAU MUBANDILE (Secondaire)**

- Tshibanda tshia Sidima ntshibanda kayi ? (Tshidi tshibanda tshia Dishiba dia Mai a Luehu).

## 2. THEATRE : NTSHINYI TSHIDI TSHIENZEKE ?

Bamfumu batanu bakumvuangana buonso buabu

### 3. KUIMBA NE KUJA

Bamfumu batanu bakumvuangana  
Bua mvita! Dikenga ! Dikenga !

## TSHITUHA 3

TANGILA GENESE 14: 4

4. Bakalamata Kedôlaomé tō bidimu dikumi ne bibidi, ne mu tshidimu tshia dikumi ne bisatu bakatomboka.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Bamfumu aba batanu bakalamata kudi nganyi ? (Kudi mfumu Kedôlaomé) ;
- Bakalamata kudiye bule bua bidimu bungi munyi ? (Bidimu dikumi ne bibidi) ;
- Mu tshidimu tshia dikumi ne tshisatu bakenza tshinyi ? (Bakatomboka).

#### 1.B. NIVEAU MUBANDILE (Secondaire)

- Bidi bisua kumvuija tshinyi ne bakalamata kudi Kedôlaomé ? (Misangu ya bungi, bamfumu aba bakadi bafile milambu ya nyama anyi tumuma tua mfumu ku tshidimu tshionso.

## 2 THEATRE: NTSHINYI TSHIDI TSHIENZEKE?

Bamfumu batanu batuale milambu yabu kudi mfumu eu Kedôlaomé (ne bifulu biabo bifike) ne batue binu hanshi bu badi bamukukuila. Bayidi bakuabo bikala babala musangu umue, ibidi, isatu, ... to ne dikumi ne ibidi ne musangu wa dikumi ne muisatu bamba ne : « Katuena tufila kabidi to ».

### 3. KUIMBA NE KUJA

Bakalamata kudiye bidimu dikumi ne bibidi (padi bayidi bimba “Yeye” Baleja minu kudi Kedôlaomé (mfumu ajuke ne kuditambisha)  
Kunyima banba ne “Katuena tuenza kabidi to”.

## TSHITUHA 4



TANGILA GENESE 14: 5 – 6

4. Mu tshidimu tshia dikumi ne binai Kedôlaomé wakalua ne bakelenge bakadi n’andi, bakahita Bena Lefa ba mu Ashelota-Kânayima bukole, ne Bena Zusa ba mu Hama, ne Bena Eme ba mu Shawe-Kiyatayima.
5. Ne bena Holi ba ku mikuna ya Sei to ne ku Ele-palama, hehi ne tshihela.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Kedôlaomé wakalua ne bakelenge bakadi n’andi mu tshidimu kayi ? (Tshia dikumi ne binai) ;

### **1.B. NIVEAU MUBANDILE (Secondaire)**

- Yeye wakalua yeye nkayandi anyi wakalua ne bamfumu bakuabo ? (Ne bamfumu banayi bakumvuanganayi nabu).

## **2. THEATRE : NTSHINYI TSHIDI TSHIENZEKE ?**

Groupe wa kumpala (couleur mukunze), sungula bayidi bakuabo bu masalayi, balua kuluangana ne groupe mukuabo (couleur mufike) ne babatshimune.

## **3. KUIMBA NE KUJA**

Mvita! Mvita! Mvita!

Dikenge e Dikenge e Dikenge e

## **TSHITUHA 5**

TANGILA GENESE 14: 7

7. Bakahingana bakalua ku Ene-mushapata (eu udi kadesha), bakahaula buloba buonso bua Bena Amaleka ne Bena Amola bakadi bashikama mu Hasasona-tamâ.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Kunyima kua bamfumu aba bamane kuluangana mu miaba ayi yakabenga kufila milambu kabidi, bakenza tshinyi tshikuabo ? (Bakaya kuluangana ne bantu bakuabo).

### **1.B. NIVEAU MUBANDILE (Secondaire)**

- Udi welangana menji kayi, bua tshinyi bamfumu aba bakaya mu mvita miaba ya bungi ? (Muyishi umvue mandamuna mashilangane a bayidi bandi. Bidi bimueneka ne bakadi bantu ba budisu badi bakeba bua kuikalabu ha mutu ha bakuabo. Bidi muakuikala kabidi ne bantu badi basue kunyenga bubanji bua bantu bakuabo mu misoko yabo.

### **2. THEATRE : NTSHINYI TSHIDI TSHIENZEKE ?**

Bamfumu banayi (couleur rouge) bashiya bamfumu batanu badila badibonda mu buloba, baye batangila ku misoko mikuabo bua kuluangana anu mvita.

### **3. KUIMBA NE KUJA**

Mvita! Mvita! Mvita!  
Dikenge Dikenge Dikenge

### **4. KUJIKIJA DILESONA**

Lota kavua muelangana menji ne yeye neasombe munkatshi mua mvita to. Kavua mukeba mvita to. Kadi bu muakayeye kusomba kaba kamue ne benji ba malu mabi, kubenga (kulonda) kukeba menji kudi Nzambi, Yeye wakadisanga munkatshi mua mvita ya dikema. Ke Nzambi uvua mumuteka mu muaba au to. Butatakana buandi m'buakamuteka mu muaba au.

### **5. MIDIMU (DEVOIRS)**

Nuenu bena Kilisto, nudi basue bua nuikale balombodibue kudi Nzambi ku dituku ne dituku anyi? Mu lumingu elu devoir anyi mudimu wenu udi ne: Lombayi Nzambi anukuatshishe. Bua wewe kuenza anyi kusungula bualu, lomba Nzambi kumpala bua Yeye akukuatshishe. Kuenji mu menji anyi lungenyi luebe wewe nksssayebe to.

### **5. DIBIKILA (INVITATION)**

Misangu mikuabo wewe kuena muanji kumanya ne ukadi muitabuja Yesu Kilisto. Angata dihangadika anu lelu eu. Luaku kunyima kua dilesona edi bua wewe kuyukilangana n'anyi. Ne meme nenkuleja mushindu wa wewe kusungidibue kudi Yesu Kilisto.

## **DILESONA 48**

**TEKESE: GENESE 14: 8 – 12**

**TSHIENA BUALU:** Badi bakuata Lota mu mvita

**KENDELA KA DIYISHA :**

Kuyima kua diyisha edi, bayidi badi ne bua kumanya ne malu makole adi atukuata anu bua bulembakana buetu. Ke bualu kai tulonde diyi anyi disua dia Nzambi bua tuetu kuehuka bulembakana ebu

### **KUTANGULULA (REVISION)**

- Lota wakafika muaba eu mushindu kayi ? (Yeye nkayandi ngua kasungula muaba eu bua buimpe buau, kayi muebeja disua dia Nzambi to).
- Lota wakaya kushikama mu buloba bua mushindu kayi? (Mu buloba bua mvita).

### **KUTANGULULA MIDIMU YA LUMINGU LUSHALE**

Mu lumingu lushale tuakanuhesha midimu bua nuenu kulomba Nzambi anukuatshishe mu malu onso. Kanuenji mu menji enu to. Nganyi udi muteta bua kulomba nunku ? Tuambile koku mushindu udi Nzambi mukulombole anyi mukukuatshishe.

### **BIA KUENZA KUMPALA**

Enzela bifulu bia lumingu lushale.

### **MVESE WA KUYILA**

NSUMUINU 1 : 30 – 31

30. Kabakasua kuitabusha lungenyi lunakabalesha, bakahetula kubela kuanyi kuonso.

31. Bua malu â nebadie mamuma adi bienzedi biabu bikuama, ne bukute ne malu adiba bahangidisha.

### **TRANSITION WA DILESONA**

Mu mvita ayi malu makole akenzeka

### **BITUHA BINENE BIA DILESONA: 3**

(N.B: Muyishi avuluishe bayidi ne tuakumona mu lumingu lushale ne bamfumu 4 bakaya kuluangisha 5; musangu eu bamfumu 5 ke bayaya kuluangisha bamfumu banayi (4).

### **TSHITUHA 1**

TANGILA GENESE 14:8 – 9

8. Mukelenge wa Sodoma, ne mukelenge wa Amola, ne mukelenge wa Adema, ne mukelenge wa Bena Seboi, ne mukelenge wa Bela (eu udi Soâ) bakaluhuka, bakaluangana n’abu mu tshibanda tshia Sidima.

9. Bakaluangana ne Kedôlaomé, mukelenge wa Elama, ne Tidala mukelenge wa Goyima, ne Amalafele, mukelenge wa Shinâ, ne Aliyoka, mukelenge wa Elasâ ; ku luseke lukuabo bakelenge banayi, ku luseke lukuabo batanu.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Mena a bamfumu ne miaba yabu idi yabungi, kadi badi mu bisumbu bungi munyi bavua baluangana? (Bisumbu bibidi, tudi mua kubabikilabu « Bamfumu 4 » anyi « Les 4 » ne « Bamfumu 5 » anyi « Les 5 » ;
- Lota wakaya kushikama ha buihi ne musoko kayi ? (Ha buihi ne Sodome) ;
- Mfumu wa Sodoma wakadi mu tshisumbu tshia « Bamfumu 4 » anyi « Bamfumu 5 » ? (Tshisumbu tshia Bamfumu 5).

### 1.B. NIVEAU MUBANDILE (Secondaire)

- Bamfumu aba badi balonda mikenji ya kale yakadi nayi bantu bavua kabayi bamanya Nzambi to. « Disu ku disu ». Kuhingaja bubu ku bubu. Udi mumanye histoire eu anyi ? (Muyishi ateleja ne umvuija bayidi tshidibo bumvue ne bamanye).
- Mukenji eu udi umvuija tshinyi ? (Kamuena mushindu wa ku analyser anyi ku examiner malu to, bubu buonso budi buenzeka, bubu bukuabo budi ne bua kulonda. Pa nanku malu mabi adi anu alondangana to ne alue mahite bungi).

## 2 THEATRE: NTSHINYI TSHIDI TSHIENZEKE ?

Enzela bifulu bia lumingu lushale. Tahulula bayidi mu tusumbu tubidi : « Les 4 » ne « Les 5 ». Lumingu lushale luvua « Les 4 » baluangisha « Les 5 » benza bu badi ne bowa. Musangu eu ; « Les 5 » baya kuluangisha « Les 4 » (Bamfumu 5 benza ma gestes bu badi baluangisha ne « Les 4 » benza ma gestes bu badi ne bowa).

## 3. KUIMBA NE KUJA

Disu ku disu O'dikenga

Bubu ku bubu.

### TSHITUHA 2

TANGILA GENESE 14: 10

10. Tshibanda tshia Sidima tshia kadi tshiule tente ne bina bia bitume ne bakelenge ba Sodoma ne Amola bakanyema, bakahonamu ; bakuabo bakashala bakanyema ku mukuna.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Mu tshibanda tshia Sidima tshiakadi tshiule tente ne tshinyi ? (Ne bina bia bitume) ;
- Banganyi bakanyema mu mvita ? (Bakelenge ba Sodoma ne Amola) ;
- Bakahona kunyi ? (Mu bina bia bitume) ;
- Bakuabo bakashala bakanyema kunyi ? (Ku mukuna).

### 1.B. NIVEAU MUBANDILE (Secondaire)

- Bakelenge kayi bakatshimuna mu mvita eyi ? (Bakelenge 4) ;
- Banganyi bakanyema ? (Bakelenge 5) ;
- Udi welangana menji ne bakelenge ba Sodoma ne Amola bakahatuka mu bina bia bitume anyi ? Bua tshinyi ? (To, bualu bitume bitu bikuata muntu).

## 2. THEATRE : NTSHINYI TSHIDI TSHIENZEKE ?

Bakelenge ba Sodoma ne Amola benza ma geste bu badi bahona mu bina bia bitume kabayi mua kuhatuka to. Bakelenge bakuabo 3 benza bu badi banyema ku mukuna Bakelenge « Les 4 » bikala ne disanka bualu bakutshimuna.

## 3. KUIMBA NE KUJA

Bakelenge ba Sodoma ne Amola bakahona mu bina bia bitume (Dikenga)

Bakelenge bakuabo 3 bakanyema ku mukuna (Dikenga).

### TSHITUHA 3

TANGILA GENESE 14 : 11 – 12

11. Bakahaula biuma bionso bia mu Sodoma ne Amola ne bintu bia kudia, bakaya mu nshila.
12. Bakakuata Lota, muana wa muan'abu ne Abalama, wakadi ushikama mu Sodoma, ne bintu biandi bionso bakaya nabi.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Banganyi bakatshimuna mu mvita eyi ? (Bakelenge 4) ;
- Bakelenge 4 bakenza tshinyi mu misoko eyi Sodoma ne Amola ? (Bakahaula biuma bionso ne bintu bia kudia ne bakaya nabi) ;
- (Bakangata) bakakuata nganyi ? (Lota ne bintu biandi bionso, bakaya nabi) ;
- Bua tshinyi bakakuata Lota ? (Bualu yeye wakadi ushikama mu musoko wa Sodoma) ;

- Ebi bidi bileja tshinyi ? (Lota wakalua muena buloko ne muhika) ;
- Mbuena kuamba ne Nzambi uvua mumanye ne malu makole aa nênzeke mu musoko wa Sodoma ? (Eyo, bualu Nzambi udi mumanyi wa malu onso).

### 1.B. NIVEAU MUBANDILE (Secondaire)

- Kumpala Lota uvua ushikama habuihi ne Sodoma (13 :12). Tshinyi tshiakenzeka kunyima ha muaba uvua Lota mushikame ? (Yeye wakaya kushikama mu ditunga mene mene. Kunyima, bena mvita bakamukuata mu buhika ne muena buloko).

### 2. THEATRE: NTSHINYI TSHIDI TSHIENZEKE?

Teka muyidi umue bu Lota ne bayidi bakuabo bu bana bandi. Basombe mu Sodoma. Bayidi 4 badi basthimuna balue mu Sodoma babanga kuangata bintu mu musoko au. Bakuata kabidi Lota ne diku diende ne bintu biende ne bintu biende bionso. Baye nabo mu musoko wabo, alue muhika ne muena buloko wabu.

### 3. KUIMBA NE KUJA

Muyishi imba tshituha tshia kumpala, bayidi bimba « O lutatu »

Bena lukuna kufika	O lutatu !
Mu Sodoma	O lutatu !
Kukuatabo Lota	O lutatu !
Ne diku diende	O lutatu !
Ne bintu biandi	O lutatu !
Lota wakulua muhika	O lutatu !

### 4. MIDIMU (DEVOIRS)

Mu lumingu elu, lomba Nzambi Yeye akulombola mu bionso biudi musue kuenza. Uvuluke bua kulonda bionso bikadiye mufunda mu Mukanda wandi (Bible). Pa nanku kuamba kukuluka mu lutatu lua bungi bu Lota nansha.

### 5. DIBIKILA (INVITATION)

Udi udilombola wewe nkayebe bualu kuena muanji kuitabuja Yesu mu moyo webe nansha. Kadi Nzambi udi mukusue. Yeye wakatuma muan'andi umuehele. Yeye wakadifila bu mulambu ku mutshi mutshiamakane. Yeye wakafua bu malu mabi etu. Yeye wakabika ku lufu ne udi ne moyo katataka. Kadi biwikala musue bua wewe kusungidibua, luaku uyukilangana nanyi kunyima kua Ecodim. Meme nengikale ne disanka bua kukuambuluisha mushindu ûdi ne bua kuenza. (Ungindile aha) = Muyishi aleja muyidi muaba mujadika.

## DILESONA 49

**TEKESE: GENESE 14: 13 – 16**

**TSHIENA BUALU:** Abalama udi usungila Lota

**KENDELA KA DIYISHA :**

Kuyima kua diyisha edi, bayidi badi ne bua kujingulula mushindu udi bantu mua kuambuluishangana mu meku abu mu bu wetu. Nunku bobo biabu bakebe mushindu wakuambuluishangana mu meku abu.

**KUTANGULULA (REVISION)**

- Mumbingu eyi ibidi tudi bamone Lota muheta lutatu mu mvita mu musoko wa Sodoma. Wakafika kudisomba mu musoko eu mushindu kayi? (Bualu yeye wakasungula mpata eu bua buimpe buau mu disua diandi, kadiyi disua dia Nzambi to).
- Bena mvita bakangata bintu biandi bionso, ne bobo bakenza nandi tshinyi? (Bakamukuata, bakaya nandi bu muhika).

**KUTANGULULA MIDIMU YA LUMINGU LUSHALE**

Tuakambane « Lomba Nzambi bua yeye akulombola mu bionso biudi musue kuenza. Ne ulonde kabidi bidi mu mukanda wa Nzambi. Nganyi udi mutete kuenza nunku? Ne atuleja mushindu udibo bienzeke, ne mushindu kayi udio Nzambi mukulombole.

**MVESE WA KUYILA**

I TIMOTE 5 : 8

8. Kadi bikala muntu kai usubula badi bandi ne ba mu nsubu muandi mene, yeye wakaduila ditabusha diandi ne udi mutambe muntu udi uhidia kuitabusha bubi.

**BITUHA BINENE BIA DILESONA: 4**

**TSHITUHA 1**

**MUNTU UMUE UDI UYA KUAMBILA ABALAMA**

**TANGILA GENESE 14:13**

13. Muntu wakadi muhanduke mu bianza biabo wakaya, wakamanyisha Abalama, muena Ebelu; wakadi ushikama hehi ne mitshi ya telebinte ya Mamale, muena Amola muan'abo ne Eshekola, muan'abo ne Anê; bobo bakalamatangana ne Abalama.

**1. MUYISHI ELA BAYIDI MAKONKA AA**

**1.A. NIVEAU MUHUEKELE (Primaire)**

- Bantu bungu munyi bakadi bahanduka mu bianza bia bena mvita? (Umue);

- Wakamanyisha nganyi malu aa ? (Abalama) ;
- Abalama wakadi muntu wa tshisamba kayi ? (Muena Ebelu) ;
- Abalama wakadi ushikama hehi ne tshinyi ? (Hehi ne mitshi ya telebinte ya Mamale) ;
- Bantu kayi ba kumpala bakumvuangana ne Abalama ne ashikame muaba au ? (Eshékola ne Anê, Mamale wakadi muan'abo) ;
- Bu wewe muikala Abalama, ne wakumuna ne muan'enu bakumukuata ku buhika mu mvita, newikale ne disanka anyi ? (Nansha dikese).

### **1.B. NIVEAU MUBANDILE (Secondaire)**

- Dishilangana kayi didi hankatshi ha nsombelu wa Abalama ne bantu bena muaba ne wa Lota ? (Abalama wakadi mumvuangane ne bantu aba, kadi Lota wakabuela mu mvita) ;
- Bu wewe muikala Abalama, udi muakuikala ne tshiji ne Lota ? Bua tshinyi ? (Muyishi umvue menji a bayidi bandi).

### **2 THEATRE: NTSHINYI TSHIDI TSHIENZEKE ?**

Bayidi bamue benze bu ba Abalama ne bakuabo benza bu muntu udi mulue ne lumu. Bayidi badi balue ne lumu batangila Abalama ne bamba (wewe muyishi amba biambilu ebi ku tshimue ku tshimue ne bayidi bambulula).

Mvita ya kabuela mu Sodoma !

Bakelenge bakuabo bakuangata Sodoma ! Bakutshimuna

Bakahaula bintu bionso bia Sodoma !

Bakukuata Lota ne diku diende !

Ne bintu biandi bionso !

Abalama enza bu shok ne dibungama ubanga kudila ne : Muan'etu ee Muan'etu Lota aa !

### **3. KUIMBA NE KUJA**

Dikenge ee, muan'etu

Ukadi muhika ai ! ai ! ai !

### **TSHITUHA 2**

KUYA KUA ABALAMA MU MVITA

TANGILA GENESE 14: 14

14. Hakumvua Abalama lumu ne, bakaya ne muan'etu, yeye wakayane bahika bandi bakadiye mueyemene bakadi baledibue mu nsubu muandi, nkama isatu ne dikumi ne muanda mukulu ; wakabihata to ne ku Dana.

### **1. MUYISHI ELA BAYIDI MAKONKA AA**



**1.A. NIVEAU MUHUEKELE (Primaire)**

- Abalama wakenza tshinyi hakumvuaye lumu ne bakaya ne muan'etu ? (Wakaya ne bahika bandi bakadiye mueyemene bakadi baledibue mu nsubu muandi (318) ;
- Bantu aba 318 bakadi banganyi? (Bahika bandi, bakadiye mumanye bimpe, bualu bakaledibue mu nsubu muandi) ;
- Wakaya nabu bua kuenza tshinyi? (Kulonda bamfumu bavua bakuata Lota ne bintu biandi).

**1.B. NIVEAU MUBANDILE (Secondaire)**

- Kulonda bamfumu aba kudi njiu minene. Udi welangana meji ne bua tshinyi Abalama wakenza nunku ? (Bualu Lota uvua muan'abu).

**2. THEATRE : NTSHINYI TSHIDI TSHIENZEKE ?**

Muyidi umue ikala Abalama usungula bayidi bakuabo ne ubambile ne « Ndi mumumanye bimpe mene mene bualu nudi baledibue mu nsubu muanyi, luayi nunkuantshishe mu mvita eyi ».

**3. KUIMBA NE KUJA**

Luaku unkuatshushe  
Tuambuluishe muan'etu.

**TSHITUHA 3**

ABALAMA UDI UTSHIMUNA

TANGILA GENESE 14 : 15

15. Abalama wakatahulula bantu bandi ; wakaluangana nabo butuku, yeye ne bahika bandi bakabatamba bukole, wakabihata to ne ku Hoba, udi ku tshianza tshia bakashi tshia Damaseke.

**1. MUYISHI ELA BAYIDI MAKONKA AA****1.A. NIVEAU MUHUEKELE (Primaire)**

- Abalama ne bahika bandi bakaya kuenza tshinyi ? (Kuluangana ne bakelenge bakakuata Lota) ;
- Wakabihata tô ne ku musoko kayi? (Ku Hoba) ;
- Hoba uvua henyi ? (Ku tshianza tshia bakashi tshia Damaseka).

**1.B. NIVEAU MUBANDILE (Secondaire)**

- Elangana menji tshituha, mushindu uvua Lota muenze. Yeye wakenza malu kayi mulonda disua dia Nzambi. Mbuena kuamba ne malu aa akamutangila anu yeye nkayandi anyi ? (Nansha kakese, wakateka bantu 318 mu njiu minene. Bionso ebi bualu kakasua kukeba disua dia Nzambi mu kusungula kua muaba to).

## **2. THEATRE: NTSHINYI TSHIDI TSHIENZEKE?**

Bayidi bonso benza bu badi baluangesha bakelenge abu, bu badi babihata.

### **3. KUIMBA NE KUJA**

Bakatshimuna bakelenge abu

Wakabgata muan'abu

## **TSHITUHA 4**

TANGILA GENESE 14 : 16

16. Wakahingana ne biuna biabo bionso ne muan'abu Lota, ne bintu biandi ne bakashi ne bantu.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Nganyi wakahingana ne bimuna biabo bionso ? (Abalama) ;
- Wakahingana kabidi ne Lota anyi ? (Eee) ;
- Ne banganyi bakuabo ? (Bakashi ne bantu bandi).

#### **1.B. NIVEAU MUBANDILE (Secondaire)**

- Mbuena kuamba ne Abalama wakenza bibi hakayaye kuluangisha bakelenge abu anyi ? (Nansha kakese, Yeye wakaya anu bua kusungila muan'abu Lota).

## **2. THEATRE: NTSHINYI TSHIDI TSHIENZEKE?**

Bayidi bonso benza bu badi diku dia Lota, bahingana ne disanka, disanka ne basanka bikole.

### **3. KUIMBA NE KUJA**

Tuasakidila Abalama

Wakutusngila

### **4. MIDIMU (DEVOIRS)**

Mu lumingu elu, keba mushindu wakuambuluisha familia diku diebe. Nansha mukubalombela Nzambi.

### **5. DIBIKILA (INVITATION)**

Biwikala kuyi muanji kuitabuja Yesu to, kadi lelu eu, udi mudilongolola bua kumuitabuja, ulombe nanyi hohamue mu milombo eyi. Tatu Nzambi, umfuile luse meme muntu mubi : Ndi ngitabuja ne Yesu, Muana wa Nzambi wakafua bua mibi yanyi. Ndi ngitabuja ne wakabika ku lufu. Buela mu moyo ne mu nsombelu wanyi katataka. Wikale Musungidi ne Mfumu'anyi. Ungabulishe bua nkulonda anu wewe. Tuasakidila bualu wakumfuila luse mu dina dia Yesu amen. Biwikala wakuitabuja Yesu katataka, luaku kunyima kua diyisha ungambile. Meme nengikale ne disanka ne kushiye mu milombo.

## **DILESONA 50**

**TEKESE: GENESE 14: 17, 21 – 24**

**TSHIENA BUALU:** Abalama udi uhidia mulambu

**KENDELA KA DIYISHA :**

Kunyima kua diyisha edi, bayidi badi ne bua kujingulula ne malu makuabo kabatu baenza bua kuheta difutu anyi dikuatshisha to. Pa nanku bakebe bua kuikala bakuatshisha bana babo bualu bidi bikengela kuenza nanku.

**KUTANGULULA (REVISION)**

- Abalama wakenzela muan'abu Lota malu kai mimpe? (Bua kumpala wakamuambila bua kusungula mpata kumpala, buibidi, wakamusungila mu bianza bia bene lukuna.

**KUTANGULULA (DEVOIRS) MIDIMU YA LUMINGU LUSHALE**

Nganyi udi mua kutuambila mushindu udiye muambulishe bena diku diende. Nganyi udi mua kutuambila mushindu udiye mubashiye nansha mu milombo.

**MVESE WA KUYILA**

FILIPOI 2 : 4

4. Muntu ne muntu katangidi malu andi nkayau, kadi muntu ne muntu atangile kabidi malu a bakuabo.

**TRANSITION WA DIYISHA**

Lelu tudi tumona tshiakenza Abalama hakamupeshabo mulambo kudi mukelenge wa Sodoma.

## **BITUHA BINENE BIA DILESONA: 5**

### **TSHITUHA 1**

TANGILA GENESE 14:17

17. Mukelenge wa Sodoma wakaluhuka bua ku muakidila hakahinganaye ku dishiha dia Kedôlaomé ne bakelenge bakadi n’andi, mu tshibanda tshia Shawe (etshi ntshibanda tshia bakelenge).

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Nganyi wakalua bua kuakidila Abalama ? (Mukelenge wa Sodoma) ;
- Wakadi mushihe Kedôlaomé nganyi ? (Abalama).

#### **1.B. NIVEAU MUBANDILE (Secondaire)**

- Tshinyi tshikuabo tshiudi mumanye bua mukelenge wa Sodoma ? (Yeye wakadi mukelenge wa musoko wa bantu babi mene mene ne mukelenge wa muaba uvua Lota ne diku diende bashikame).

### **2 THEATRE: NTSHINYI TSHIDI TSHIENZEKE ?**

Bayidi bonso benza ne bianza. Minu ibidi ku tshianza tshia balume, ibidi mikuabo ku tshianza tshia bakashi. Enzela minu ayi ha mutu ha mesa bu idi yenda bua yeye kuhetanga.

### **3. KUIMBA NE KUJA**

Abalama ne mukelenge wa Sodoma bakahetangana.

### **TSHITUHA 2**

TANGILA GENESE 14: 21

21. Mukelenge wa Sodoma wakambila Abalama ne, umpe bantu, wewe wangata biuma.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Nganyi udi wambila Abalama ? (Mukelenge wa Sodoma) ;
- Udi wambila Abalama tshinyi ? (Umpe bantu) ;
- Udi musue Abalama angata tshinyi (Biuma).

#### **1. B. NIVEAU MUBANDILE (Secondaire)**

- Abalama wakanyenga bintu bionso ne bantu mu mvita. Mbuena kuamba ne yeye uvua ne bukokeshi bua kuangata bionso anyi ? (Mu mushindu uvuabo baluangane mvita, uvua ne bukokeshi bua kubianga bionso).

## **2. THEATRE : NTSHINYI TSHIDI TSHIENZEKE ?**

Bayidi bonso benza bubadi bakelenge ba Sodoma. Bamba bonso buabu (bambulule kunyima kuebe nunku)

“Abalama, wakuangata bintu bionso”

Hesha anu bantu banyi

Eeee Abalama ?

Udi wamba tshinyi ?

## **3. KUIMBA NE KUJA**

Mukelenge wa Sodoma wakalomba

Anu bantu bandi

Yeye uvua musue

Abalama angata bintu bionso

### **TSHITUHA 3**

TANGILA GENESE 14 : 22 – 23a

22. Abalama wakambila mukelenge wa Sodoma ne, nakamana kubisha tshianza tshianyi bua kuditshiha kudi Yehowa Nzambi Mutambe Bunene wa mu diulu, Mufuki wa diulu ne buloba.

23a. Ne, tshiena ngangata nansha nshinga, nansha muonshi wa bisabata nansha kantu kebe kamue ;

## **1. MUYISHI ELA BAYIDI MAKONKA AA**

### **1. A. NIVEAU MUHUEKELE (Primaire)**

- Abalama wakambila mukelenge wa Sodoma tshinyi ? (Ne tshiena ngangata kantu kebe nansha kamue to);
- Abalama wakadi muditshiha kudi nganyi ? (Kudi Yehowa, Nzambi Mutambe Bunene wa mu diulu, Mufuki WA diulu ne buloba).

### **1 .B. NIVEAU MUBANDILE (Secondaire)**

- Bu wewe muikale Abalama, uvua muakungata bintu abi anyi ? (Muyishi umvue mandamuna a bayidi. Bantu bakuabo kabavua muakumona bibi to bu yeye mubiangate ; bu muvuaye mutshimuna mvita, yeye uvua ne bukokeshi bua ku biangata).

## 2. THEATRE: NTSHINYI TSHIDI TSHIENZEKE?

Bayidi bonso bikala bu Abalama babenga bua kuangata bintu abi bamba ne « Tshiena ngangata nansha kakese ».

## 3. KUIMBA NE KUJA

Abalama wakabenga kuangata  
Nansha tshimue

## TSHITUHA 4

TANGILA GENESE 14: 23b

23b. Bua wewe kuambi ne, Nakavuisha Abalama mubanji.

### 1. MUYISHI ELA BAYIDI MAKONKA AA

#### 1. A. NIVEAU MUHUEKELE (Primaire)

- Bua tshinyi Abalama wakabenga bintu ? (Bua yeye kambi ne nakavuisha Abalama mubanji) ;

#### 1.B. NIVEAU MUBANDILE (Secondaire)

- Abalama kakatangila buimpe anyi bungu bua bintu to, kadi wakelangana menji ne m'malu kayi anyi bubi kayi budi mua kunduila kunyima kua mumane kuangata bintu ebi. Uvua mushilangane ne nganyi ? (Ne lota. Yeye wakasungula buloba kayi muelangana menji ne malu kayi adi mua kunduila kunyima kua kusungula mpata eu).

## 2. THEATRE: NTSHINYI TSHIDI TSHIENZEKE?

Bayidi bonso bikala Abalama. Bambulula tshiambilu pa tshiambilu (phrase par phrase) kunyima kuebe.

« Bua nuenu kanuambi ne  
Tuakavuisha Abalama mubanji »  
(Benza gestes bu badi babenga)

### 3. KUIMBA NE KUJA

Abalama wakelangana menji  
Bua malu avua ne bua kulua

### TSHITUHA 5

TANGILA GENESE 14: 24

24. Anu bintu bia kudia bia bansongalume ne bia bantu bakaya n'anyi, Ané ne Eshékola ne Mamale, bobo bangate tshituha tshiabo.

### 1. MUYISHI ELA BAYIDI MAKONKA AA

#### 1. A. NIVEAU MUHUEKELE (Primaire)

- Abalama wakamba ne banganyi bangata tshituha tshiabo ? (Ané, Eshékola ne Mamale).

#### 1.B. NIVEAU MUBANDILE (Secondaire)

- Udi welangana menji ne bua tshinyi Abalama wakamba ne bamfumu aba basatu bangate tshituha tshiabo ? (Edi divua difutu diabo bualu bakamuambuluisha mu mvita).

### 2. THEATRE: NTSINYI TSHIDI TSHIENZEKE?

Muyidi umue enza bu Abalama, asungule bayidi bakuabo basatu. Atela mena abo, Ané, Eshékola ne Mamale yai bua kuangata bintu abi.

### 3. KUIMBA NE KUJA

Bantu bakambuluisha Abalama  
Bakangata bintu, kadi yeye  
Kakangata nansha tshimue.

### 4. MIDIMU (DEVOIRS)

Nuenu bena kuitabuja bonso buenu nuenze malu manene asatu (nuenzele bantu) kanuyi balombe difutu to.

### 5. DIBIKILA (INVITATION)

Biwikala wewe kuena muanji kuitabuja Yesu munda muebe, umanye ne Yeye udi nebe bualu. Udi mumanye ne menji ne malu onso adi mu mutshima webe. Udi musue kumuitabuja katataka anyi ? Udi musue bua Yeye abuele mu mutshima webe mpindieu anyi ? Biwikala musue,

somba aha, ungingdile kunyima kua diyisha edi, meme nenkkuatshishe bua wewe kumuitabuja (Muyishi aleja muyidi muaba mujadika bua yeye kumuambuluisha kunyima kua kalasa).

## DILESONA 51

**TEKESE: GENESE 14: 18 – 20**

**TSHIENA BUALU:** Melekisedeke udi uvudishila Abalama disanka ne Abalama udi umuhesha tshia dikumi

**KENDELA KA DIYISHA:**

Kunyima kua diyisha edi, bayidi bajingulula ne bena kuitabuja mbimpe bua bafile bia dikumi biabu. Ne bayidi ne babange kubifila kudi Nzambi.

**KUTANGULULA (REVISION)**

Abalama mumane kutshimuna mu mvita ne bakelenge bakuabo, uvua ne bukokeshi bua kuangata bintu biabo. Bua tshinyi wakabenga bua kubiangata.

**KUTANGULULA (DEVOIRS) MIDIMU YA LUMINGU LUSHALE**

Mu lumingu lushale tuvua banuhesha mudimu bua muyidi yonso enzela bantu bakuabo malu 3 a dinanga dia Nzambi kaayi a difutu to. Nganyi udiku muakutuleja muvuabio bienzeke ?

**MVESE WA KUYILA**

GENESE 14 :20b

20b. Abalama wakamuha tshia dikumi tshia bintu bionso.

**MBANGILU WA DILESONA**

Ku ntudijilu wa buloba, tuakumona ne banganyi bakafila milambu kudi Nzambi ? (Abelu, muana wa Adama, Nowa, kunyima kua mvula munene, Abalama mu Ebolona. Eyi ivua milambu ya mashi ivua bantu bafila kudi Nzambi. Lelu tudi tumona Abalama ufila mulambu wa mushindu mukuabo, mulambo udi muhita milambo itudi tufila lelu.

**BITUHA BINENE BIA DILESONA: 4**

**TSHITUHA 1**

TANGILA GENESE 14:18a

18a. Melkisedeke, mukelenge wa Salema.

**1. MUYISHI ELA BAYIDI MAKONKA AA**

**1. A. NIVEAU MUHUEKELE (Primaire)**



- Melkisedeke uvua nganyi ? (Mukelenge wa Salema).

### 1. B NIVEAU MUBANDILE (Secondaire)

- Udi muakuelangana menji, ditunga kayi dikuabo didi ne muaku eu “Salema” munkantshi muandi? (Yelusalema)

### 2 THEATRE: NTSHINYI TSHIDI TSHIENZEKE ?

Bayidi bonso benza bu badi musoko eu Salema. Mukuabo umue mu bayidi aba enze bu udi Melkisedeke. Bayidi bakuabo balue kudiye bamu bikila ne mfumu bamulombe dikuatshisha. Mukuabo alue kudiye bu Muambi wa Nzambi umulomba bua kubalombela Nzambi.

### 3. KUIMBA NE KUJA

Kuvua mukelenge mukuabo dina diandi Melkisedeke  
Kuvua Muambi mukuabo, dina diandi Melkisedeke  
Uvua usomba mu musoko wa Salema

### TSHITUHA 2

TANGILA GENESE 14: 18b

18b. Wakalua ne mampa ne mvinyo.

### 1. MUYISHI ELA BAYIDI MAKONKA AA

#### 1. A. NIVEAU MUHUEKELE (Primaire)

- Nganyi wakalua ? (Melekisedeke) ;
- Wakalua kudi nganyi ? (Abalama) ;
- Wakalua ne tshinyi (Ne mampa ne mvinyo).

#### 1. B. NIVEAU MUBANDILE (Secondaire)

- Udi welangana menji ne bua tshinyi Melkisedeke wakatuadila Abalama milambu eyi ? (Misangu mikuabo bualu yeye wakatshimuna mvita ayi, yeye wakasungila bantu bonso ba tshituha atshi tshionso. Misangu mikuabo, yeye wakamona ne Abalama wakadi utendelela Nzambi wa bulelela).

### 2. THEATRE : NTSHINYI TSHIDI TSHIENZEKE ?

Muyidi umue ikale Abalama. Bonso bakuabo bikala bu Melkisedeke baye ne mampa ne mvinyo bua ku mulambulabio.

### 3. KUIMBA NE KUJA

Melkisedeke wakalua kulambula Abalama mvinyo ne mampa.

**TSHITUHA 3**

TANGILA GENESE 14 : 19 – 20a

19. Yeye wakamuvudishila disanka, wakamba ne, Nzambi Mutambe Bunene wa mu diulu, Mufuki wa diulu ne buloba ; asankishe Abalama ;

20a. Ne Nzambi Mutambe Bunene wa mu diulu, wakafila bena lukuna bebe mu tshianza tshiebe.

**1. MUYISHI ELA BAYIDI MAKONKA AA****1. A. NIVEAU MUHUEKELE (Primaire)**

- Nganyi wa kavudishila Abalama disanka? (Malkisedeke);
- Wakamuvudishila disanka mu dina dia nganyi? (Dia Nzambi Mutambe Bunene wa mu diulu, Mufuki wa diulu ne buloba).
- Ne Nzambi Mutambe Bunene wa mu diulu wakafila banganyi mu tshianza tshia Abalama ? (Bena lukuna).

**1. B. NIVEAU MUBANDILE (Secondaire)**

- Mu Genese 12:3, tuvua bamone Nzambi neasankishe badi bamusankishe, ne ele mulau kudi aba badi bamuela mulau. Bu mushindu udi Melkisedeke muenze nunku, musankishe Abalama, Yeye neahete disanka kudi Nzambi anyi mulau? Bua tshinyi? (Yeye neasankishibue bualu yeye wakansakisha Abalama).

**2. THEATRE: NTSHINYI TSHIDI TSHIENZEKE?**

Bayidi bonso benza bu ba Melkisedeke basankisha Abalama

**3. KUIMBA NE KUJA**

Melkisedeke wakansakisha Abalama Oyé

**TSHITUHA 4**

TANGILA GENESE 14: 20b

20b. Abalama wakamuha tshia dikumi tshia bintu bionso.

**1. MUYISHI ELA BAYIDI MAKONKA AA****1. A. NIVEAU MUHUEKELE (Primaire)**

- Abalama wakaha nganyi ? (Melkisedeke) ;
- Wakamuha bungu munyi ? (Tshia dikumi tshia bintu bionso) =10%

**1. B. NIVEAU MUBANDILE (Secondaire)**

- Udi welangana menji ne bua tshinyi Abalama wakahesha Melkisedeke tshia dikumi ? (Bualu Yeye uvua Muambi wa Nzambi). Kunyima, Nzambi wakambila bayuda mukenji wakufila tshia dikumi. Tuamba ne histoire eu utudi tumona lelu wakenzeka kua mikenji anyi kunyima kuayo ? (Ivua kumpala kua mikenji. Abalama, muntu wa Nzambi ukavua mujingulula ne bantu ba Nzambi bafile tshia dikumi).

## **2. THEATRE: NTSHINYI TSHIDI TSHIENZEKE?**

Bayidi bonso benza bu badi ba Abalama, bangate bintu biabo bionso babitahulula mu bisumbu 10, ne bangate tshimue tshia dikumi baheshe Melkisedeke.

## **3. KUIMBA NE KUJA**

Abalama wakafila mulambu  
Kudi Muambi wa Nzambi  
Wakafila tshia dikumi

## **4. MIDIMU (DEVOIRS)**

Mu lumingu elu, tshionso tshiwaheta, uvuluke bua kumusha ndambu bua kuhesha Nzambi.

## **5. DIBIKILA (INVITATION)**

Nuenu bonso badi kabayi banze kuitabuja Yesu mu mitshima yenu, numanye ne kufila kua milambu kakuena kusungila muntu to. Yesu ukadi mukumbaja muanda eu mu kufwa kuandi ha mutshi mutshiamakane. Mbimpe wewe kunzulula tshibi tshia mutshima webe lelu bua Yeye abuela. Biwikala ne dijinga dia diambuluisha, luaku usombe aha, meme nenkuleje tshiudi ne bua kuenza bua Yesu abuela mu moyo ne mutshima webe. (Muyishi aleje muyidi muaba mujadika bua bobo kuyukila kunyima kua dilesona).

## **DILESONA 52**

**TEKESE: GENESE 15: 1 – 4**

**TSHIENA BUALU:** Abalama udi unyingalela Nzambi bua muana

**KENDELA KA DIYISHA:**

Kunyima kua diyisha edi, bayidi ne bajingulule ne badi ne bua kutekemena Nzambi, nansha biobi bimueneka ne kena utumvuila mpindieu. Pa nanku, badi ne bua kumuitabuja ne kumutekemena, nansha mu tshikondo tshia makenga bakolesha moyo to ne mu tshikondo tshialuaye kufila diandamuna mu milombo yetu.

**MVESE WA KUYILA**

TITO 1 : 2

2. Mu ditekemena dia moyo wa tshiendelele, udi Nzambi, udi kai muakudinga, mulayi diambedi bikondo bia tshiendelele kabî bianze kuikalaku.

### **KUTANGULULA (REVISION)**

- Melkisedeke uvua nganyi? (Mfumu wa musoko Salema ne Muambi wa Nzambi). Nansha mu tshikondo atshi bantu ba bungi bavua batendelela mpingu, Melkisedeke uvua mutendeledi wa Nzambi Mulelela ne uvua uyisha bantu bakuabo njila mulelela wa Nzambi.
- Hakamona Abalama Melkisedeke wakenza tshinyi? (Wakamuhesha tshia dikumi tshia bintu biandi bionso).

### **KUTANGULULA MIDIMU YA LUMINGU LUSHALE**

Mu lumingu lushale, nganyi udi mulambula Nzambi, anyi bintu, anyi makuta, anyu bintu bikuabo? Nganyi udi mufile tshia dikumi?

### **BITUHA BINENE BIA DILESONA: 3**

#### **TSHITUHA 1**

TANGILA GENESE 15:1

1. Hakashika malu â, dî dia Yehowa diakalua kudi Abalama mu tshilota ne, Abalama, kutshinyi, meme ndi ngabu webe ne difutu diebe ditambe bunene.

#### **1. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Diyi dia Yehowa diakalua kudi Abalama mu tshinyi ? (Mu tshilota) ;
- Dî dia Yehowa diakamba tshinyi ? (Kutshinyi, meme ndi ngabu webe ne difutu diebe ditambe bunene)

##### **1.B. NIVEAU MUBANDILE (Secondaire)**

- Hakashika malu â, malu kayi ? (Malu a bakelenge ba kakuata Lota mu buhika ne bintu biandi bionso mu mvita, ne kubenga kua Abalama bintu kunyima kua mumane kutshimuna mvita;
- Tshinyi tshidi muakuikala menji ebe bikala Yehowa mu kulaya difutu ditambe bunene ? (Muyishi ateje mandamuna anyi menji a bayidi bandi).

### **2 THEATRE: NTSHINYI TSHIDI TSHIENZEKE ?**

Tahulula bayidi bebe mu tusumbu tubidi : Kamue kikala Abalama, balale tulu ; kakuabo kikale Nzambi. Bambile Abalama ne : « Kutshinyi, meme ndi ngabu webe ne difutu diebe ditambe bunene ».

### 3. KUIMBA NE KUJA

Nzambi wakalaya Abalama difutu ditambe bunene

#### TSHITUHA 2

TANGILA GENESE 15: 2 – 3

2. Abalama wakamba ne, Mukelenge Yehowa, wewe neumpe tshintu kai, bualu bua meme tshiena ne muana, ne muhianyi wa bintu bianyi udi Eliezê, muena Damaseke ?
3. Abalama wakamba ne, tangila, wewe kuena muanze kumpa muana, ne muntu muledibue mu nsubu wanyi, yeye udi muhianyi wa bintu bianyi.

### 1. MUYISHI ELA BAYIDI MAKONKA AA

#### 1. A. NIVEAU MUHUEKELE (Primaire)

- Tuamba ne Abalama uvua ne disanka bua difutu adi anyi ? (Nansha dikese).
- Abalama uvua unyingalala Nzambi bua tshinyi? (Bua muana) ;
- Hakutangila Genese 12:2, Nzambi ukavua mulaya Abalama muana anyi ? (Ee, ukavua mumulaya bana ba bungi) ;
- Bua tshinyi bivua bikole bua Abalama kuitabuja mulayi eu wa Nzambi ? (Bualu tshikondo tshiakuleha bikole) ;
- Abalama uvua welangana menji ne bikala Nzambi kai mumuhesha muana, nganyi wikala muhianyi wa bintu biandi ? (Eliezê).

#### 1. B. NIVEAU MUBANDILE (Secondaire)

- Udi welangana menji bua tshinyi Nzambi wakaleheja tshikondo bua kuhesha Abalama muana ? (Muyishi ateleje menji a bayidi bandi).

### 2. THEATRE : NTSHINYI TSHIDI TSHIENZEKE ?

Muyidi umue ikale Abalama, unyingalala, udila ne Nzambi kena mumpesha muana to ne lelu. Difutu kayi dialuaye kumpesha.

### 3. KUIMBA NE KUJA

Abalama unyingalala

Unyingalala bua kuhanga kua muana

#### TSHITUHA 3

TANGILA GENESE 15 : 4

4. Monai, dî dia Yehowa diakalua kudiye ne, muntu eu kena wikala muhianyi wa bintu biebe nansha, kadi yeye uwalela nkayebe neikale muhianyi wa bintu biebe.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Diandamuna kayi diakahesha Nzambi Abalama ? (Muntu eu kena wikala muhianyi wa bintu biebe nansha) ;
- Bikala anu muana uwalela nkayebe neikale muhianyi, bidi bileja ne muana neikale anyi kamba kuikala ? (Muana neikaleku nansha bia kumona lufu).

### 1. B. NIVEAU MUBANDILE (Secondaire)

- Udi welangana menji ne Abalama wakumvua mulayi au mushindu kayi ? (Muyishi atejeje mandamuna a bayidi bandi, hashishe afile menji andi mu tshikoso).

## 2. THEATRE: NTSHINYI TSHIDI TSHIENZEKE?

Bayidi bonso hohamue bikala bu Nzambi. Bamba misangu ya bungi bambulula bu badi bambila Abalama :

« Muntu eu kena wikala muhianyi wa bintu biebe nansha  
Anu muana uwalela nkayebe, Anu muana uwalela nkayebe  
Anu muana uwalela nkayebe

## 3. KUIMBA NE KUJA

Muana kavua muanji kuledibua  
Kadi Nzambi uvua mulaya muana  
Nzambi kena wa mashimi to  
Nzambi wakalaya Abalama

## 4. MIDIMU (DEVOIRS)

Wewe muena kuitabuja, udi umona bu Nzambi udi mukuhua moyo anyi? Lomba dikuatshisha ne tungunuka ne ditekemena mu moyo webe onso. Mu lumingu elu, nulomba Nzambi tshionso tshinudi nasthi bualu, ne nutungunuke ne ditekemena dionso ne yeye nenze. Kanuhungidi bua kutendelela nansha, nusuminyine ne kulomba, nenuhete tshinudi balombe.

## 5. DIBIKILA (INVITATION)

Nuenu badi kabayi banji kuitabuja Yesu Kilisto, Nzambi ukadi mulongolola tshinuikala binuikala anu mu njila yenu mibi. Yone 3 :3 – 6 udi wamba ne udi witabusha Muana udi ne moyo wa tshiendelele ; kadi udi uhidia Muana kena umona moyo, tshishi tshia Nzambi tshidi tshishala n’andi. Biwikala musue ne tshishi tshia Nzambi katshishadi kudi, luaku usomba aha kunyima kua

dilesona edi, meme nenkuleje tshiudi ne bua kuenza. Muyishi aleja muyidi muaba mujadika bua bobo kuyukila n'andi kunyima kua Ecodim).

## DILESONA 53

**TEKESE: GENESE 15: 5 – 6**

**TSHIENA BUALU:** Abalama udi witabusha mulayi

**KENDELA KA DIYISHA:**

Kunyima kua diyisha edi, bayidi badi ne bua kujingulula ne Nzambi udi usungila muntu udi weyemena ne utumikila diyi diandi. Bua nanku bobo bayidi bambile bakuabo bantu lumu luimpe lua Yesu Kilisto bua bobo kusungidibua.

**KUTANGULULA (REVISION)**

- Nzambi wakalaya Abalama tshinyi? (Yeye neamuhe difutu ditambe bunene).
- Abalama uvua unyingalela Nzambi bua tshinyi? (Nzambi wakamulaya tshisamba tshinene, kadi yeye kakadi ne muana to).
- Bu mudi Nzambi kai muena mashimi to, tuamba ne Yeye udi ne bua kuenza bionso bidiye mulaye anyi? (Ee, udi ne bua kuenza, nansha tshikondo tshileha munyi).

**KUTANGULULA MIDIMU YA LUMINGU LUSHALE**

Mu lumingu lushale, devoirs wenu uvua bua nuenu kulomba Nzambi bua bintu bionso binudi nabi dijinga, ne kusuminyina mu kulomba ne nenumona bienzeka bu mudi kulomba kuenu. Nganyi udi muakuleja mushindu uvuaye mulombe ne mudiye muhete diandamuna. Nganyi udi kai muanze kuheta diandamuna ? Tungunuka ne kulomba.

**MVESE WA KUYILA**

GENESE 15 :6

6. Yeye wakitabusha Yehowa wakabala kuitabusha kuandi ne mbuakana buandi.

**TRANSITION WA DILESONA**

Abalama wakadi bidimu 2000 kumpala kua diledibua dia Yesu. Tuamba Yeye wakasungidibua anyi ? Wakasungidibua mushindu kayi ? Netumone diandamuna dituku dia lelu.

**BITUHA BINENE BIA DILESONA: 2**

**TSHITUHA 1**

TANGILA GENESE 15:5

5. Yehowa wakaluhuka n'andi mu nsubu, wakamba ne, tangila mulu, bala mitoto, biwamanya mua kuyibala. Yeye wakamuambila ne, tunakanunuine tuebe ne tuikale bungi nunku.

## **1. MUYISHI ELA BAYIDI MAKONKA AA**

### **1. A. NIVEAU MUHUEKELE (Primaire)**

- Nganyi udi wakula mu mvese eu? (Yehowa) ;
- Udi wambila nganyi? (Abalama) ;
- Yehowa wakaluhuka n'andi henyi ? Mu nsubu) ;
- Tangila henyi ? (Mulu) ;
- Wakamulaya tshinyi ? (Ne tunkanunuine tuebe ne tuikale bungi bua mitoto).

### **1.B. NIVEAU MUBANDILE (Secondaire)**

- Udi welangana menji ne mulayi au mutekete bua kuitaba ? (Misangu mikuabo, bualu Nzambi ukavua mumulaya muana kadi to ne tshikondo atshi muana kavua muanji kuikalaku to).

## **2 THEATRE: NTSHINYI TSHIDI TSHIENZEKE ?**

Bayidi bajula bianza mulu, banyungisha minu bamba ne : « Nzambi wakalaya Abalama tunkanunuine tua bungi mene mene ».

## **3. KUIMBA NE KUJA**

Nansha Abalama kai muanji kuikala ne muana  
Nzambi wakamulaya ne tunkanunuine tuebe netuikale tua bungi

### **TSHITUHA 2**

TANGILA GENESE 15: 6

6. Yeye wakitabusha Yehowa, ne Yehowa wakabala kuitabusha kuandi ne, mbuakana buandi

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Tshikondo tshiakamona Abalama mulayi au, wakumvua mushindu kayi ? (Wakitabusha ne wakadi ne ditekemena) ;
- Bua ditabusha adi, Nzambi wakenza tshinyi ? (Yehowa wakabala kuitabusha kuandi ne mbuakana buandi) ;
- Tshikondo atshi tshinyi tshiakenzekela Abalama ? (Yeye wakasungidibua bua ditabusha diandi).



### 1.B. NIVEAU MUBANDILE (Secondaire)

- Ditabusha dia Abalama divua mu tshinyi ? (Mu di dia Nzambi. Bu muakambaye ne tshisamba tshinene ne tshihatuka mu yeye, Yeye wakadi ne ditekemena ne ne bienzeke nunku.
- Mukanda wa Nzambi udi wamba ne Abalama wakitabusha malu aa, Yehowa wakamubala muntu muimpe. Tuamba ne bidi bileja ne Abalama kakadi ne bubi anyi ? (Nansha kakese, tukadi bamane kumona muvuaye mushime mu Ejipitu. Yeye biende uvua muntu mubi bu tuetu kabidi, kadi Nzambi wakamubala muntu muimpe anu bua dibabusha).

### 2. THEATRE : NTSHINYI TSHIDI TSHIENZEKE ?

Sungula muyidi umue bu Nzambi. Bayidi bonso bakuabo ba Abalama. Abalama umue amba ne muyidi Nzambi ne: “Ndi nkutekemena anu wewe Nzambi”. Muyidi Nzambi andamuna ne : « Abalama, ngakubala kuitabusha kuebe ne mbuakane buebe ».

### 3. KUIMBA NE KUJA

Abalama wakatekemena ne kuitabusha  
Diyi dia Nzambi, ne Yeye wakasungidibua.

### 4. MIDIMU (DEVOIRS)

Mudimu wenu dituku dia lelu udi bua kulombela muntu umue udi kayi muanze kuitabuja mu milombo, kukeba tshikondo bua kumuyisha lumu luimpe lua Yesu Kilisto bua Yeye kusungidibuaye, bu muakasungidibua Abalama.

### 5. DIBIKILA (INVITATION)

Biwikala kuyi muanji kuitabuja Yesu to. Nzambi kena muanji kukuitabuja nansha. Nzambi kena ukubala bu muntu muimpe to. Nzambi udi utuambila dituku dia lelu eu ne udi mutume Muan’adi umuehele bua Yeye kutusungila. Biwikala umuitabuja, neusungidibue. Tshinyi tshidi tshikukandika bua wewe kunzulula mutshima webe ne kumuitabusha? Biwikala musue bua kumuitabuja dituku dia lelu, luaku usomba aha bua meme kukuleja tshiudi ne bua kuenza kunyima kua dilesona edi.

## DILESONA 54

**TEKESE: GENESE 15: 7 – 8**

**TSHIENA BUALU:** Abalama udi uhua mulayi moyi

**KENDELA KA DIYISHA:**

Kunyima kua dilesona edi, bayidi badi ne bua kujingulula ne, nansha Nzambi mutuambuluisha munyi, tudi anu tuhua moyo, tubanga kudiebeja ne mbia bulelela milayi eyi neyenzeke. Mukudiebeja eku balomba dikuatshisha kudi Nzambi.

**KUTANGULULA (DEVOIRS)**

Mu lumingu lushale, devoirs uvua bua kushiya muntu udi kayi muanji kuitabuja Yesu Kilisto mu milombo bua Yeye kukudimuna mutshima wandi ne kuenza monso bua kumuyisha lumu luimpe lua Yesu Kilisto. Nganyi udi muakutuleja nganyi udiye mushiye mu milombo ne kumuyisha.

**MVESE WA KUYILA**

MAKO 9 :24b

24b. Ndi ngitabusha ; unkuatshishe, umane mpata yanyi.

**MBANGILU WA DIYISHA**

Muyishi azola ha tshibasa mikuna ne bibanda ne bibatabata. Nsombelu wetu udi nunku kabidi hanshi ha buloba : Tudi ne bikondo bia ntatu, tunyinyanya, tshikondo tshitudi tutshimuna, tshia disanka etc... Tshikondo tshia disanka ne ditalala tshidiku, ke bualu kayi muntu udi mu valée anyi tshibatabata.

**BITUHA BINENE BIA DILESONA: 2****TSHITUHA 1**

TANGILA GENESE 15:7

7. Yeye wakamuambila ne, meme ndi Yehowa wakakumusha mu Ula wa bena Kasada, bua kukuha buloba ebu buakubuhiana.

**1. MUYISHI ELA BAYIDI MAKONKA AA****1. A. NIVEAU MUHUEKELE (Primaire)**

- Nganyi udi wambila Abalama ? (Yehowa) ;
- Yehowa wakumusha Abalama kunyi ? (Mu Ula wa bena Kasada).

**1. B. NIVEAU MUBANDILE (Secondaire)**

- Malu aa bu, mvita, kuhanga muana avua bu mukuna anyi tshibatabata ? (Bu mukuna).

**2 THEATRE: NTSHINYI TSHIDI TSHIENZEKE ?**

Bayidi bonso benza ne maboko abo baleja ne « Meme Nzambi, buloba ebu bonso, ndi mukuhesha wewe Abalama ».

### **3. KUIMBA NE KUJA**

Yehowa wakalaya Abalama

Buloba ebu bonso

#### **TSHITUHA 2**

TANGILA GENESE 15: 8

8. Yeye wakamba ne, Mukelenge Yehowa, ndi mumanye ne, nembuhiane munyi ?

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Nganyi udi webeja Nzambi ? (Abalama) ;
- Udi webeja tshinyi ? (Nembuhiana munyi ?) ;
- Lukonko elu ludi ne ditabusha anyi doute ? (Doute, kaluena ne ditabuja to).

#### **1.B. NIVEAU MUBANDILE (Secondaire)**

- Udi welangana menji munyi bua Abalama witabuja Nzambi bua bualu bua bana, kadi kunyima, wakikala ne ndambu (mpata) bua kuitabuja bualu bua buloba. (Bidi bualu bukole bua kujingulula bualu onso abidi akadi mushindu umue (ivuanu milayi ya Nzambi). Milayi eyi ivuanu diyi dia Nzambi).
- Udi welangana menji ne Abalama uvuanu ne bua kuitabusha bualu Yehowa uvua muakulu nanku anyi ? (Ee, Yeye wakitabusha ne tunkanunuine tuende ne tuikale tua bungu bu muakamba Yehowa. Kadi wakabanga ku douter bua kumona ne buloba abu neabuhiane. Kadi Yehowa wakalaya buloba abu bu muakalayaye kabidi bualu bua tunkanunuine.
- Tuamba ne dikonka dia Abalama divua dimpe anyi dibi (dia lungenyi anyi kuhanga lungenyi ? (Dia kuhanga kua lungenyi).

### **2. THEATRE : NTSHINYI TSHIDI TSHIENZEKE ?**

Bayidi bonso bateke maboko ha biadi biabo bamba ne doute mpata ya kutukuata. Netumanye munyi ne buloba ebu mbuetu.

### **3. KUIMBA NE KUJA**

Yehowa wakalaya Abalama

Buloba abu bonso

Udi ne bua kukumbaja

Anu muvuaye mulaya.

#### 4. NDEKELU WA DILESONA

Katuha kiki Abalama witabusha  
Katuha kiki « doute » mpata ibuela

Bidi mushindu umue ne tuetu bena kuitabuja ba lelu. Nzambi wetu udi wa luse lunene (patience), udi uleheja tshikondo. Tuetu, tuitabe, tuetu tubenga kuitaba.

#### 5. MIDIMU (DEVOIRS)

Wewe muena Kilisto, biwamona ne ditabusha diebe didi dikese, umanye mua wewe kulomba dikuatshisha kudi Yehowa. Ubanga kulomba mu lumingu elu nunku.

#### 6. DIBIKILA (INVITATION)

Misangu mikuabo kuena muanji kuitabuja Yesu Kilisto mu mutshima webe nansha. Manya ne udi ukokola ku tshibi tshia mutshima webe. Udi musue kubuela mu mutshima webe bua wewe udienze muana wa diku dia Nzambi. Nansha mpata mikalaku, nansha ndambu wa ditabusha diudi n'adi luaku Yeye neakusungila. Biwikala musue kumuitabuja dituku dia lelu, meme nengikale ne disanka bua kuyukilangana nebe kunyima kua dilesona edi. Somba aha. (Muyishi aleja muyidi muaba udibo mua kusomba ne kumuleja mushindu udiye mua kuitabuja Yesu Kilisto bu Mukelenge ne Musungidi wandi tshiendelele).

### DILESONA 55

**TEKESE: GENESE 15: 9 – 11, EBELU 10: 9 – 10**

**TSHIENA BUALU:** Nzambi udi ulomba mulambu wa mashi

**KENDELA KA DIYISHA:**

Kunyima kua dilesona edi, bayidi badi ne bua kujingulula ne, mu bikondo bia kale, Yehowa uvua ulomba milambu ya mashi. Kena uyilomba lelu to bualu Yesu uvua mulambu wa dihembu dimpe. Nunku tuetu lelu tudi tusemena ha buihi ne Nzambi mu Yesu Kilisto.

**KUTANGULULA (DEVOIRS) MIDIMU YA LUMINGU LUSHALE**

Devoir wetu wa lumingu lushale uvua bua ne biwikala umona ne ditabusha diebe didi dikese, ulomba bua Nzambi akukuatshishe. Nganyi udi mutete kulomba nunku? Nganyi udi muakutuleja muvuabio bienzeke.

**MVESE WA KUYILA**

EBELU 10:10

10. Mu disua edi tuetu tuakujadikibua bualu bua kufila kua mubidi wa Yesu Kilisto musangu umue tshiendelele.

## **MBANGILU WA DILESONA**

Mu bikondo bia kale, bikala muntu muenze bibi, bavua benza tshinyi? Bavua bafila mulambu wa mashi a nyama. Etshi tshivua mulambu wa kubuikidila bubu kudi Nzambi. Mu Mukanda wa Nzambi, banganyi batudi bamone bafile milambu kudi Nzambi? (Abele, Nowa ne Abalama).

## **TRANSITION WA DILESONA**

Lelu eu tudi tumona mushindu uvua Nzambi mulomba Abalama mulambu kabidi.

## **BITUHA BINENE BIA DILESONA: 3**

### **TSHITUHA 1**

TANGILA GENESE 15:9

9. Yeye wakamuambila ne, wangata lukungulu lua ngombe lua bidimu bisatu, ne dishina dia mbushi dia bidimu bisatu, ne tshimpanga tshia mukoko tshia bidimu bisatu, ne nyunyu wa nkutshi ne mputu nyunyu.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Nganyi udi wakula mu mvese eu? (Yehowa) ;
- Udi wambila nganyi ? (Abalama) ;
- Ne angata tshinyi ? (Nyama ne nyunyu) ;
- Ya bidimu bungi munyi ? (Bisatu) ;
- Nyama kayi ? (Ngombe, mbushi ne mukoko) ;
- Nyunyu kayi ? (Nkutshi ne mputu nyunyu).

### **1.B. NIVEAU MUBANDILE (Secondaire)**

- Nyama ayi ikale ne bidimu bungi munyi ? (Bidimu bisatu) ;
- Nyama ayi, balume anyi bakaji ? (Ibidi ya bakashi : Ngombe ne mbushi, umue mulume, mukoko) ;
- Udi welangana menji ne bua tshinyi, umue mulume ne mikuabo bakashi ? (Muyishi umvue mandamuna a bayidi bandi. Bidi mua kuikala ne mulambu eu uvua muakuikala bua tshisamba tshia Abalama mulume ne mukashi) ;
- Bua nyunyu, Nzambi kavua muleshe to mulume anyi mukashi. Kadi uvua muleje bua kutangila tshinyi? (Bunene : Umue munene, mukuabo mukese) ;

- Bua tshinyi umue munene, mukuabo mukese, elangana menji kakese) ? (Muyishi atelege mandamuna a bayidi. Misangu mikuabo mulambu eu uvua uleja ne uvua bua bantu banene ne bana bakese).

## **2 THEATRE: NTSHINYI TSHIDI TSHIENZEKE ?**

Bayidi babale nyama ayi yonso ivua Yehowa mulombe bua mulambu au. Bayibale yonso itanu.

### **3. KUIMBA NE KUJA**

Yehowa wakambila Abalama  
 Umpeshe mulambu wa nyama  
 Ngombe  
 Mbushi  
 Mukoko  
 Nkutshi  
 Mputu nyunyu  
 Umpeshe mulambu

## **TSHITUHA 2**

TANGILA GENESE 15: 10 – 11

10. Yeye wakangata bintu ebi bionso, wakabihanda nseke, wakateka luseke eku luseke kuaka ; kadi kakahanda nyunyu nseke.
11. Hakikila nyunyu ya bikololo ha bitalu ebi, Abalama wakayihata.

## **1. MUYISHI ELA BAYIDI MAKONKA AA**

### **1.A. NIVEAU MUHUEKELE (Primaire)**

- Abalama wakenza tshinyi ? (Wakangata nyama eyi yonso) ;
- Wakenza tshinyi ne nyama ayi yonso ? (Wakaihanda nseke). (Mbuena kuamba ne kumpala wakayishiha) ;
- Wakahanda nyama ayi bihese bungi munyi ? (Bihese bibidi);
- Nyama kayi ya kabenga Abalama kuhanda (Nyunyu);
- Nyunyu kayi yakikila ha bitalu ebi ? (Bikololo);
- Abalama wakenza nai tshinyi? (Wakaihata).

### **1.B. NIVEAU MUBANDILE (Secondaire)**

- Mushindu uvua Abalama ne nyama eyi uvua mushindu uvua bantu bahingaja malanda avua mafua mu malu makole. Bihese bia nyama bivua bibidi bibidi. Bidi bileja ne bantu bavua ne bua kulengejangana bavua bungi munyi ? Ne nganyi ? (Babidi : Abalama ne Nzambi).

## **2. THEATRE : NTSHINYI TSHIDI TSHIENZEKE ?**

Bayidi benze bu badi balue ne nyama, kumpala ngombe, hashishe mbushi, mukoko ne nyunyu wa nkutshi ne mputu nyunyu. Benze bu badi baishiha, bahanda ya minene ayi bihese bibidi.

## **3. KUIMBA NE KUJA**

Abalama wakenza bionso  
Biakamuambila Nzambi

### **TSHITUHA 3**

TANGILA EBELU 10 : 9 – 10

9. Hashishe yeye wakuamba ne, nakulua bua kuenza bu mu disua diebe. Udi umusha bualu bua kumudilu bua kujadika buibidi.
10. Mu disua edi tuetu tuakujadikibua bualu bua kufila kua mubidi wa Yesu Kilisto musangu umue tshiendelele.

## **1. MUYISHI ELA BAYIDI MAKONKA AA**

### **1. A. NIVEAU MUHUEKELE (Primaire)**

- To ne mpindieu tuvua mu Dihungila Dikulukulu mu Genese. Katataka tuakubuela mu Dihungila Dihiadihia mu Ebelu, tshituha tshibidi tshia Mukanda wa Nzambi. Mvese eyi idi mu Dihungila Dikulukulu anyi Dihiadihia ? (Ebelu udi mu Dihungila Dihiadihia, kunyima kua Yesu) ;
- Kihatshila kayi kavua Yesu muluile? (Bua kuenza disua dia Nzambi) ;
- Disua dia Nzambi divua tshinyi ? (Kumusha bualu bua kumudilu, bua kujadika buibidi). Kumusha milambu ya kale, kujadika mulambu mutambe buimpe wa Yesu Kilisto.
- Bua mulambu wa Yesu, Nzambi wakumusha tshinyi? (Milambu yonso ya kale);
- Ha muaba wa milambu eyi Nzambi wakenza tshinyi? (Yesu);
- Bua tshinyi Nzambi wakitabuja mulambu wa Yesu? (Bualu wakadi mu disua diandi, Yeye kakenza bualu bubu nansha bumue);
- Yesu wakafila mubidi wandi bu mulambu misangu bungi munyi? (Musangu umue tshiendelele);

- Mulambu eu wa Yesu Kilisto udi wenza tshinyi buetu tuetu? (Udi umusha mibi yetu).

### **1.B. NIVEAU MUBANDILE (Secondaire)**

- Mvese eyi idi yamba tshinyi bua milambu ya kale bu ivua Abalama ufila? (Kayenaku kabidi lelu to bualu Yesu Kilisto wakamana kufila mulambu wa dihembu ditambe buimpe mu disua dia Nzambi).

### **2. THEATRE : NTSHINYI TSHIDI TSHIENZEKE ?**

Bayidi bibidi benze bu Tatu Nzambi ne Yesu. Yesu wenza bu mufua ku mutshi mutshiamakane. Tatu Nzambi Umuakidila ne disanka dionso wamba ne: “Mulambu eu udi ne dihembu dimpe mene mene, udi usankisha”.

### **3. KUIMBA NE KUJA**

Mashi a Yesu adi luhandu

Mashi a Yesu adi luhandu

Mashi a Yesu adi luhandu

Kutumusha mibi yetu yonso.

### **4. NDEKELU WA DILESONA**

Nzambi wakambila Abalama bua kufila milambu ya nyama bua bobo kuikala mu buobumue. Tshikondo tshidi Yesu mudifile bu mulambu, Nzambi wakawitabuja. Bu mudi mulambu eu uvua mu disua dia Nzambi, wakajikija njiya yonso yakadi hankatshi ha Nzambi ne bantu. Ke bualu kayi milambu kayena kabidi ne muaba nansha kakese.

### **5. MIDIMU (DEVOIRS)**

Bu mudi Yesu Kilisto mutunzululila tshibi, tuye kudi Tatu kulomba tshionso tshitudi natshi bualu. Mu lumingu elu, devoir wetu udi ne, yaku kudi Tatu dituku dionso umutendelele mu dina dia Yesu Kilisto Amen!

### **6. DIBIKILA (INVITATION)**

Kadi wewe, biwikala kuyi muanze kuitabuja Yesu mu mutshima webe to, Nzambi kena mua kukuadila bu muanandi to. Njiya yebe ne Nzambi kayena mianji kujika to. Kadi Mukanda wa Nzambi udi wamba ne Nzambi udi musue bua bantu bonso bakudimuna mitshima yabu. Udi musue bua kukudimuna mutshima webe dituku dia lelu eu anyi? Netuikale ne disanka bua tuetu kuyukilangana nebe kunyima kua Ecodim. (Somba aha).

## **DILESONA 56**

**TEKESE: GENESE 14: 12 – 16**



**TSHIENA BUALU:** Nzambi udi wambila Abalama malu alualua

**KENDELA KA DIYISHA :**

Kunyima kua diyisha edi, bayidi badi ne bua kujingulula ne Nzambi udi mumanyi wa malu onso adialua. Ke bualu kayi katuena ne bua kuya kudi bena manga, bena mbuku nansha. Tulomba menji anyi dikuatshisha anu kudiye.

**KUTANGULULA MIDIMU YA LUMINGU LUSHALE**

Mu lumingu lushale, tuvua banuheshe mudimu bua kulomba Nzambi tshintu tshionso tshinudi natshi dijinga bualu Yesu ukadi mutunzulule tshibi. Nganyi ukadi muhete diandamuna mu kulomba kuandi ?

**MVESE WA KUYILA**

YESHAYI 46 :10a

10a. Ndi ndianjila kulesha bantu nshikidilu wa bualu ku tshibangidilu tshiabu.

**MBANGILU WA DIYISHA**

Tudi bayile ne Nzambi wakambila Abalama malu avua ne bua kulua. Nudi muakuvuluka malu aa anyi ? (Tunkanunuine tuende ne tuikale tua bungu ne Nzambi neamuheshe buloba bua yeye kushikamamu). Mushindu kayi udi Nzambi muakuamba malu bu nunku ? Mbia bushuwa ne udi mumanye malu onso alualua kumpala anyi ?

**BITUHA BINENE BIA DILESONA: 5**

**TSHITUHA 1**

TANGILA GENESE 15:12

12. Hakamba diba kubuela, tulu tukole tua kakuata Abalama ; monai bowa bua midima bua kamukuata.

**1. MUYISHI ELA BAYIDI MAKONKA AA**

**1.A. NIVEAU MUHUEKELE (Primaire)**

- Tshinyi tshiakakuata Abalama hakamba diba kubuela ? (Tulu tukole) ;
- Tshinyi tshiakamukuata kabidi ? (Bowa bua midima).

**1. B. NIVEAU MUBANDILE (Secondaire)**

- Bua tshinyi bantu badi ne bowa hadibo balala ? (Bua bilota bibi).

**2 THEATRE: NTSHINYI TSHIDI TSHIENZEKE ?**

Bayidi benza bu badi balala tulu, nunku babanga kuzakala ne bowa.

### 3. KUIMBA NE KUJA

Bowa bua kakuata Abalama mu tulu tuandi

### TSHITUHA 2

TANGILA GENESE 15: 13

13. Yehowa wakambila Abalama ne, Umanye biebe bimpe ne, tunkanunuina tuebe netuikale bendakanyi mu buloba budi kabuyi buabu, netukuatshile bena buloba mudimu, nebatukengesha to bidimu nkama inai.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Nganyi udi wambila Abalama ? (Yehowa) ;
- Yehowa udi wambila Abalama ne malu a nênzeke kudi banganyi? (Kudi tunkanunuina tuende) ;
- Yehowa udi umuambila ne tunkanunuina tuebe netuikale bendakanyi kudi kunyi ? (Mu buloba budi kabuyi buabu) ;
- Mu buloba abu nebenze tshinyi ? (Ne bakuatshile bena buloba abu mudimu = bahika) ;
- Mu buloba abu nebabenzele tshinyi kudi bantu abu ? (Ne babakengeshe) ;
- Ne babakengeshe bidimu bungi munyi ? (Bidimu 400).

#### 1.B. NIVEAU MUBANDILE (Secondaire)

- Kumpala, Nzambi wakambila Abalama ne, Yeye neamuhe buloba bua yeye kushikamamu. Mpindieu udi umuambila ne tunkanunuine tuebe ne tuikale mu buhika bidimu 400. Malu aa manene abidi nênzeke mushindu kayi (Kumpala ne bikale mu buloba bukuabo bu bahika, kunyima, Yehowa neabaheshe buloba buabo bobo nkayabo.
- Udi welangana menji ne, ebu buvua bualu buvua Abalama mumvua bowa anyi ? Udi muakumvua bualu ebu munyi ?

### 2. THEATRE: NTSINYI TSHIDI TSHIENZEKE?

Bayidi bonso benza bu badi ba Abalama mu tshilota. Ubambile lumu elu bu wewe udi Nzambi.

Bobo bonso babanga kuzakala ne bowa.

### 3. KUIMBA NE KUJA

Tunkanunuine tua Abalama  
 Netuikala mu buhika mu  
 Buloba bukuabo

### **TSHITUHA 3**

TANGILA GENESE 15: 14

14. Meme nendumbuluishe tshisamba tshia bantu baditu tukuatshila mudimu, hashishe ne tuhatuke ne biuma bia bungi.

#### **1. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Yehowa ne enze tshinyi ne tshisamba tshia badi tunkanunuine tua Abalama tukuatshila mudimu ? (Ne atshilumbuluishe) ;
- Netusombe aku kashidi anyi ? (To, netuhatuke) ;
- Netuhatuke bianza bituhu anyi ? (To, ne biuma bia bungi).

##### **1. B. NIVEAU MUBANDILE (Secondaire)**

- Mushindu kai udi Nzambi mumanye malu onso adi ne bua kubaluila kumpala ? (Bu mudiye Nzambi, yeye udi mumanyi wa malu onso, nansha atshilualua kumpala).

#### **2. THEATRE: NTSHINYI TSHIDI TSHIENZEKE?**

Bayidi bonso benze bu tunkanunuine tua Abalama tuhatuka mu buhika ne disanka ne bintu bia bungi.

#### **3. KUIMBA NE KUJA**

Tunkanunuine tua Abalama  
 Netuhatuka mu buhika !  
 Netuhatuka ne biuma bia bungi !  
 Disanka, O disanka !

### **TSHITUHA 4**

TANGILA GENESE 15: 15

15. Kadi wewe neuye kudi bankambua bebe holâ, neujikibue muntu mununu.

#### **1. MUYISHI ELA BAYIDI MAKONKA AA**

##### **1.A. NIVEAU MUHUEKELE (Primaire)**

- Yehowa wakambila Abalama tshinyi ? (Wewe neuye kudi bankambua bebe holâ) ;
- Neujikibue muana anyi mununu? (Mununu).

### 1. B. NIVEAU MUBANDILE (Secondaire)

- Yehowa udi wambila Abalama ne wewe neufue. Mulayi eu udi muakumuhesha ditalala anyi ? (Yeye kena ufua lukasa to, kadi kunyima kua bidimu bia bungi).

### 2. THEATRE: NTSHINYI TSHIDI TSHIENZEKE?

Bayidi benza gestes baleja bidimu bia bungi. Benza gestes bu bantu badi bajika Abalama. Benza gestes bu Abalama badi bamuakidila kudi bankambua bandi bakajikibua kale bu tatu wandi tela, bu Nowa, bu Abele, bu Adama, ...

### 3. KUIMBA NE KUJA

Abalama neashale ha buloba  
Bidimu bia bungi  
Yeye neafue, nebamujike

### TSHITUHA 5

TANGILA GENESE 15: 16

16. Mu tshikondo tshinai tunkanunuine tuebe netulue kunoko kabidi, bualu bua bubu bua Bena Amola kabuena buanji kukumbana.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Nganyi udi wakula mu mvese eu ? (Yehowa) ;
- Udi wambila nganyi ? (Abalama) ;
- Ne tunkanunuine tuende ne tuye henyi ? (Mu buloba bulaya) ;
- Mu tshikondo tshia bungi munyi ? (Tshinai) ;
- Bualu bua bubu bua bena nganyi budi kabuyi buanji kukumbana ? (Bena Amola)

### 1. B. NIVEAU MUBANDILE (Secondaire)

- Bua tshinyi Yehowa kakihata bena Amola mu buloba abu tshikondo atshi ? (Bivua bikengela ne bubu buabo buvulangane, bulue bua bungi).

### 2. THEATRE: NTSHINYI TSHIDI TSHIENZEKE?

Bayidi benze gestes bu badi bakidila bana bahia bahia mu meku abu.

### 3. KUIMBA NE KUJA

Tuncanunuine tua Abalama  
Netuikale tua bungi  
Nansha tuikale mu buhika  
Bena Amola ne bikale babi

Tshikondo ne tshikumbane  
Yehowa neabahatule  
Ne bahiane buloba buabo.

#### **4. NDEKELU WA DILESONA**

Nzambi uvua mumanye malu onso avua muakuluila Abalama ne tunkanunuine tuandi. Mu tshilota, wakamuleja malu onso avua ne bua kulua. Bikala Nzambi mumanye malu onso avua ne bua kuluila Abalama ne tunkanunuine tuende kunyima kua bidimu 400, tudi muakuamba ne Yeye udi mumanye kabidi malu etu bietu to ne mpindieu.

#### **5. MIDIMU (DEVOIRS)**

Bu mudi Yehowa mumanye malu etu onso tuetu bena Kilisto, Mudimu (devoir) wetu wa lumingu elu udi ne katuenta mua kuya kudi banganga, bena manga, bena majimbu, bena muhongo anyi bena mbuku bua tuetu kumanya malu alualua mu mioyo yetu (divination).

#### **6. DIBIKILA (INVITATION)**

Biwikala kuyi muanji kuitabuja Yesu Kilisto to, umanye ne kuena muanji kumanyibua kudi Nzambi to. Luaku kudiye dituku dia lelu bua Yeye akumanya mu njila wa Yesu Kilisto.

### **DILESONA 57**

**TEKESE: GENESE 15: 17 – 21**

**TSHIENA BUALU:** Yehowa udi uhunga tshihungidi ne Abalama

**KENDELA KA DIYISHA:**

Kunyima kua diyisha edi, bayidi badi ne bua kujingulula ne, Yehowa udi ukumbaja bihungidi biende bu mudiye ulaya. Bua nanku, mbimpe bua bobo batekemene bihungidi bionso bidibo bahunga nandi.

**MVESE WA KUYILA**

I TESALONIKE 5 :24

24. Yeye udi unubikila udi mua kueyemenyibua, Yeye kabidi ne enze bualu budiye munubikidile.

**KUTANGULULA (DEVOIRS) MIDIMU**

Devoir wa lumingu lushale uvua bua nuenu bena kuitabuja kanuyi kudi banganga to, nansha bena manga, nansha bena majimbu to. Nganyi udi mulombe dikuatshisha anu kudi Nzambi mu njila wa Yesu Kilisto ? Utuambile mushindu kayi udi mukebe dikuatshisha adi?

## **TRANSITION WA DIYISHA**

Lelu tudi tumona bualu buakambila Nzambi Abalama havuaye mulala. Netumone mushindu udi di dia Nzambi dikale dia bulelela.

## **BITUHA BINENE BIA DILESONA: 3**

### **TSHITUHA 1**

TANGILA GENESE 15:17

17. Hashishe, hakabuela diba ne midima yakadiku, tshikutu tshiakadi ne muishi wa kahia ne tshimunyi tshia kahia kakole bia kahita hankatshi ha nseke ya minyinyi.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Malu â akenzeka diba kai ? (Hakabuela diba) ;
- Tshinganyi tshiakadiku kabidi musangu eu ? (Midima) ;
- Bintu kai bibidi biakamueneka ? (1. Tshikutu tshiakadi ne muishi wa kahia, 2. Tshimunyi tshia kahia kakole) ;
- Bitu ebi bibidi biakahita kunyi ? (Hankatshi ha nseke ya minyinyi).

#### **1. B. NIVEAU MUBANDILE (Secondaire)**

- Bikala muishi muikale mu njila, butoke budi bu tshinyi ? (Bu Nzambi uleja njila) ;
- Eu udi mushindu uvua bantu bahingana mu bulela mu malu avua makole. Mushindu kayi udi bantu benza lelu bua kuhingaja malanda avua mafue ? Tshinyi tshidi tshileja ne malanda au adi majadikibue ne akuhingana bushuwa ? (Muyishi umvue menji a bayidi. Misangu mikuabo belangana mioyo ya ku bianza anyi badia anyi banu kaba kamue, anyi kabidi bafunda mu dibeki (signature)).

## **2 THEATRE: NTSHINYI TSHIDI TSHIENZEKE ?**

Muyidi ateka mabeji anyi tutuha tua mitshi anyi tuntu tukuabo ha mutu ha mesa mu milongo ibidi bu milambu. Muyidi mukuabu angata bu tshimunyi tshia kahia tshihita hankatshi ha bintu bidi ha mesa ne wamba ne bidi bifila mishi (imaginaire). Muyidi muisatu angata butoke, ahitshishe hankatshi nkatshi ha bintu abi. Bayidi bonso bamba ne : « Nzambi wakumvuangana ne Abalama ! Tangila tshimanyinu !

## **3. KUIMBA NE KUJA**

Nzambi wakumvuangana

Ne Tatu Abalama Oyée !

## **TSHITUHA 2**

TANGILA GENESE 15: 18

18. Mu dituku adi mene, Yehowa wakahunga ne Abalama tshihungidi ne, Ndi mpa tunkanunuine tuebe buloba ebu ku musulu wa mu Ejipitu tô ne ku musulu munene wa Pelata.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Nganyi wakahunga tshihungidi ne Abalama ? (Yehowa) ;
- Tshihungidi kayi ? (Ndi mpa tunkanunuine tuebe buloba ebu) ;
- Muaba kai ? (Hankatshi ha musulu wa Ejipitu ne musulu munene wa Pelata).

#### **1. B. NIVEAU MUBANDILE (Secondaire)**

- Musulu eu wa Pelata udi mu musoko kayi lelu ? (Iraki) NB : Mu mikanda ya Bible netumone mushindu uvua Yehowa muenzele tunkanunuine tua Abalama buloba buabu.

### **2. THEATRE : NTSHINYI TSHIDI TSHIENZEKE ?**

Bayidi bonso batangile luseke lumue, bamba ne : « Nzambi neaheshe buloba ebu, kubanga ku musulu wa Ejipitu udibo babikila ne Nil » Bayidi bonso batangila luseke lukuabu, bamba ne : « Nzambi neaheshe buloba ebu, too ne ku musulu wa Pelata ».

### **3. KUIMBA NE KUJA**

Tshihungidi tshia Abalama  
Ne Nzambi ntshiotshietsi « Buloba »

## **TSHITUHA 3**

TANGILA GENESE 15 : 19 – 21

19. Buloba bua Bena Kene, ne bua Bena Kenize, ne bua Bena Kadamona, 20. ne bua Bena Hiti, ne bua Bena Pelese, ne bua Bena Lefa, 21. ne bua Bena Amola, ne bua Bena Kanâna, ne bua Bena Gigashi, ne bua Bena Yebuse.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Yehowa wakalaya Abalama tshinyi bua buloba buvua bantu ba bungi bashikama ? (Ne Yeye neaheshe tunkanunuine tua Abalama buloba abu).

### **1. B. NIVEAU MUBANDILE (Secondaire)**

- Udi welangana menji ne bua tshinyi tunkanunuine tua Abalama tuvua ne bukokeshi (droit) wakuangata buloba abu? (Bualu Yehowa ke uvua mubalayabu).

### **2. NDEKELU WA DILESONA**

Havua malu aa enzeka, Abalama kavua muanji kulela to, kadi Nzambi ukavua mumulaya tshisamba tshinene. Havua milayi eyi yambibua, Abalama kavua muanji kushikama mu buloba abu to, kadi Yehowa ukavua mulaya tunkanunuine tuende buloba abu.tuamba ne Yehowa udi muena mashimi? (Nansha kakese). Tuamba ne Yehowa udi muena lukutukutu anyi? (Nansha kakese). Pa nanku, milayi Yandi yonso idi ne bua kuenzeka muvuaye muambe.

### **3. MIDIMU (DEVOIRS)**

Muyidi yonso mu lumingu elu, hadiye ubala Bible, wikala mumanye ne bionso biudi ubala bidi bia bulelela. Tshionso tshiwabala, ambila Yehowa Nzambi webe ne, « Ee, ndi ngitabuja. Bidi bienzeka anu mudi muamba ».

### **6. DIBIKILA (INVITATION)**

Kadi biwikala wewe kuyi muanji kuitabuja Yesu Kilisto mu moyo webe, umanye ne Mukanda wa Nzambi kawena ne bulelela buebe wewe to. Udi wamba ne wewe kuena muana wa mu diku dia Nzambi to. Udi wamba ne wewe udi mu midima. Udi wamba ne wewe kuena ubuela mu diulu to. Kadi Mukanda wa Nzambi udi wamba kabidi ne Nzambi udi musue bua wewe usungidibue ne uhete moyo wa tshiendelele. Udi musue ulue kudiye. Udi witabuja malu aa dituku dia lelu eu anyi? Tudi badilongolole bua kukuatshisha mu muanda eu. Tuambile ne kunyima kua diyisha edi udi witabuja bua Yesu abuele mu musthima webe. (Ungindile aha kunyima kua Ecodim) (Muyishi aleje muyidi muaba).

## **DILESONA 58**

**TEKESE: GENESE 16: 1 – 4**

**TSHIENA BUALU:** Abalama udi wambuluisha Nzambi bua kukumbasha mulayi

**KENDELA KA DIYISHA:**

Kunyima kua diyisha edi, bayidi badi ne bua kujingulula ne, Nzambi udi ne bukole bua kukumbaja bionso bidiye mulaye. Pa nanku badi ne bua kukolesha moyo ne kumanya ne Yeye neakumbaje mulayi wandi.

**MVESE WA KUYILA**



DUTELENOME 7:9b

9b. Nzambi utu walama dî diandi, utu watumikila tshihungidi tshiandi ne luse luandi kudi bantu badi bamusue ne batu batumikila mikenji Yandi tô ne ku bihungu tshinunu.

### **KUTANGULULA (DEVOIRS) MIDIMU**

Devoir wetu uvua bua kubala Mukanda wa Nzambi ne kuamba ne: “Ee ndi muitabuje, nebienzeka anu mûdi muambe”. Edi didi dî diebe. Nganyi udi muenze nunku? Atuleje mushindu udibio bimuambulishe.

### **TRANSITION WA DIYISHA**

Nzambi wakalaya Abalama tshisamba tshinene, kadi tshikondo tshiakaleha bikole Abalama kayi natshi to. Ne kabidi kayi nansha ne muana umue. Tshinyi tshidiye ne bua kuenza?

### **BITUHA BINENE BIA DILESONA: 3**

#### **TSHITUHA 1**

TANGILA GENESE 16:1

1. Salaï, mukashi wa Abalama, kakamulelela bana nansha; wakadi ne muakshi muena mudimu, Muena Ejipitu, dina diandi Hagâ.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Nansha Yehowa mumulaya tshisamba tshinene, nganyi uvua kai mulela to ? (Salaï, mukashi wa Abalama) ;
- Mu muanda eu Salaï wakelela nganyi menji ? (Wakelela Hagâ menji).
- Hagâ wakadi mukashi wa musoko kai ? (Muena Ejipitu).

#### **1. B. NIVEAU MUBANDILE (Secondaire)**

- Nansha malu aa akuangata mukashi muhika bu mukashi webe bu muvuabio bienzeka kudi bantu ba bungi mu tshikondo atshi, tuamba ne bivua mu disua dia Nzambi anyi ? (Nansha kakese, Nzambi wakenzela mulume umue bua mukashi umue).

### **2 THEATRE: NTSINYI TSHIDI TSHIENZEKE ?**

Bayidi babidi babakashi benze théâtre eu. Umue Salaï, mudikuata mu difu ne kanyinganyinga konso bualu kena ulela to, atangila mukashi mukuabo Hagâ, muena mudimu wandi. Hagâ udi anu wenza mudimu mu nsubu.

### 3. KUIMBA NE KUJA

Nzambi wakalaya tshisamba  
Kadi Salaï kena mulela to  
Bua nanku wakubanga  
Kuelela Hagâ menji  
Bua kulela ha muaba wandi.

### TSHITUHA 2

TANGILA GENESE 16: 2 – 3

2. Salaï wakambila Abalama ne, Mona Yehowa wakumpisha bua kulela ; ndi nkutendekena ne, uye biebe kudi mukashi, muena mudimu wanyi, binamanya mua kuheta bana kudiye. Abalama wakitabusha dî dia Salaï.
3. Hakashikama Abalama mu buloba bua Kanâna tô bidimu dikumi, Salaï, mukashi wa Abalama, wakangata Hagâ, Muena Ejipitu, muena mudimu wandi, wakamufila kudi Abalama, mulume wandi, amubake bu mukashi wandi.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Menji kai avua nau Salaï bua kuhesha mulume wandi Abalama mukashi eu Hagâ ? (Bua amubake bu mukashi wandi) ;
- Menji â, akahatuka kudi Abalama kumpala anyi kudi Salaï ? (Menji â, akabanga ne Salaï) ;
- Diandamuna dia Abalama diakadi tshinyi ? (Abalama wakitabusha dî dia Salaï) ;
- Malu â akenjibua tshikondo kai ? (Hakashikamabo mu buloba bua kanâna bidimu dikumi).

### 1. B. NIVEAU MUBANDILE (Secondaire)

- Udi welangana menji ne bua tshinyi Abalama wakitabusha dî dia Salaï ? (Muyishi umvua mandamuna a bayidi bandi ; Misangu mikuabo yeye wakelangana menji ne Yehowa udi mua kukumbaja mulayi wende mu mushindu eu) ;
- Bakindila mulayi eu wa kulela bidimu bungi munyi mu kanâna ? (Bidimu dikumi).

## 2. THEATRE : NTSHINYI TSHIDI TSHIENZEKE ?

Enza poupées isatu : Umue wa balume ne ibidi ya bakashi. Bayidi benza ne poupées eyi bu Salaï udi wambila Abalama bua kuangata Hagâ, bu Hagâ udi ubuela ne Abalama mu nzubu. Muyishi, ujikija théâtre ha muaba eu.

### 3. KUIMBA NE KUJA

Salaï wakahesha Abalama  
Mukashi mukuabo  
Mukashi eu Hagâ  
Amulelela muana.

### TSHITUHA 3

TANGILA GENESE 16 : 4

4. Wakaya kudi Hagâ ne yeye wakimita difu ; yeye wakalengulula mukelenge wandi mukashi.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Tshinyi tshiakenzeka hakaya Abalama kudi Hagâ ? (Yeye wakimita difu) ;
- Hakadimona Hagâ ne difu wakadiumvua munyi kumpala kua mukelenge wandi mukashi ? (Wakumulengulula).

### 1.B. NIVEAU MUBANDILE (Secondaire)

- Bua tshinyi Hagâ wakabanga kulengulula Salaï ? (Bualu yeye wakimita difu, kadi Salaï kavua muanji kuimita to) ;
- Udi welangana menji ne Salaï wakumvua munyi munda muandi hakabanga Hagâ kumulengulula ? (Tshiji ne dibungama).

## 2. THEATRE: NTSHINYI TSHIDI TSHIENZEKE?

Bayidi bakashi bonso benze mpala yabu bu badi ne mukau. (Tuetu katuenta tulengulula bualu katuenta basue kuleja malu aa kudi bayidi to. (Kuela nsenda). Bana ba balume bonso baleje mpala bu badi baleje bu mukuabo udi ubalengulula (ubela nsenda).

### 3. KUIMBA NE KUJA

Hagâ wakimita difu dia Abalama  
Wakabanga kulengulula  
Wakabanga kulengulula Salaï  
Dibungama, Dibungama  
Kudi Salaï ne Abalama  
Bualu kabavua bakolesha moyo to

Ne Nzambi nênze bivuaye mulaye  
Dikenge Dikenge

#### **4. MIDIMU (DEVOIRS)**

Wewe muena Kilisto, utu ukanga moyo mu bualu bua Nzambi anyi? Utu utekemena anu nansha tshikondo tshileha anyi? Mudimu (devoirs) wenu mu lumingu lonso, dituku dionso, ambila Nzambi ne ndi ntekemena diyi diebe ne didi dia bulelela. Tshikondo tshiudi ubala Mukanda wa Nzambi, itabusha nansha bia kumona lufu.

#### **5. DIBIKILA (INVITATION)**

Wewe kuena muanji kuitabusha Yesu munda muebe nansha. Biwikala mua kumuitabusha bu Mukelenge webe, Yeye wakamba ne muntu yonso udi umuitabusha, yeye neamusungile. Yeye neakumbashe mulayi eu. Udi witabusha bua wewe kusungidibue dituku dia lelu eu anyi? Biwikala udi uditshiha bua wewe kuenza bualu ebu lelu, luaku usomba aha meme negikale ne disanka bua meme kukuambuluisha. (Muyishi aleje muyidi muaba mujadika bua kuyukila nende kunyima kua Ecodim).

### **DILESONA 59**

**TEKESE: GENESE 16: 5 – 6**

**TSHIENA BUALU:** Ndululu ya Salaï ne Hagâ

**KENDELA KA DIYISHA:**

Kunyima kua diyisha edi, bayidi badi ne bua kujingulula ne, bituikala katuyi balonda njila anyi diyi dia Nzambi tulonda disua dietu, ndululu neibuele munkatshi muetu.

**MVESE WA KUYILA**

NSUMUINU 14:12

12. Nshila udiku udi mululame ku mesu kwa muntu, kadi nshikidilu wandi udi lufu.

**KULONDOLOLA MIDIMU YA LUMINGU LUSHALE**

Tuvua banulomba bua nuenu kubala Mukanda wa Nzambi ne ditabusha ne kuikala ne ditekemena kudi Nzambi nansha wewe mumona ne tshikondo tshiakuleha. Nganyi udi muteta bua kuenza nunku. Udi mutekemene Nzambi mu bualu kayi?

**MBANGILU WA DILESONA**

Salaï ne Abalama bakakeba kuheta muana mu menji abo bobo nkayabo. Kabavua balomba Nzambi bua yeye kubaleja tshivuabo mua kuenza to. Bakaheta muana Yishemaele, muana wa Abalama ne Hagâ. Kadi malu aa akafikisha Hagâ bua kulengulula Salaï.

### **BITUHA BINENE BIA DILESONA: 3**

#### **TSHITUHA 1**

TANGILA GENESE 16:5

5. Salaï wakambila Abalama ne, Bubi buanyi buikala kûdi wewe = nakafila mukashi muena mudimu wanyi mu tshiadi tshiebe, ne hakamonaye ne, nakuimita difu, yeye wakundengulula; Yehowa alumbuluile tshilumbu tshidi hankatshi hetu nebe.

#### **1. MUYISHI ELA BAYIDI MAKONKA AA**

##### **1. A. NIVEAU MUHUEKELE (Primaire)**

- Mu mvese eu Salaï udi umona ne bubi mbumukile kudi nganyi ? (Kudi Abalama) ;
- Tshikondo kayi tshiakabanga Hagâ kulengulula Salaï ? (Hakamonaye ne nakuimita difu) ;
- Salaï wakambila nganyi bua kubalumbuluisha ? (Yehowa).

##### **1.B. NIVEAU MUBANDILE (Secondaire)**

- Nansha Salaï mumona ne bubi ebubuhatuke kudi Abalama, bualu Yeye ke uvua mulale ne Hagâ bua kuheta muana, menji a kuenza bualu ebubuhatuke kudi nganyi bilondeshele 16 :2 ? (Avua menji ende yeye nkayandi, yeye kuambila bayende Abalama) ;
- Udi welangana menji ne Salaï wakaleheja menji ende kumpala kua kufila Hagâ kudi Abalama ne nebikale mushindu kayi hikalaye muhete difu ? (Bidi bimueneka ne wakelangana anu menji a muana, kakaleheja menji ende ku malu makuabo to) ;
- Bikala Nzambi mulumbuluisha malu â, udi welangana menji ne neambe tshinyi ? (Muyishi umvue kumpala menji a bayidi bandi. Bulelela bonso buabu bakenza bibi).

#### **2 THEATRE: NTSHINYI TSHIDI TSHIENZEKE ?**

Muyidi umue wa bakashi ikala Salaï, wambila Abalama malu â. Muyidi mulume mukuabo ikala Abalama umvua kunyingalala kua Salaï.

#### **3. KUIMBA NE KUJA**

Nansha meme Salaï mukuheshe  
Mukashi eu Hagâ  
Bubi budi kudi wewe, Abalama  
Bualu yeye wakundengulula!

O Dikenga dianyi O dikenga dianyi

## **TSHITUHA 2**

TANGILA GENESE 16: 6a

6a. Kadi Abalama wakambila Salaï ne, Mona, muena mudimu webe udi mu tshianza tshiebe, umuenzele bu mudi musue.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Abalama wakambila Salaï tshinyi ? (Mona, muena mudimu webe udi mu tshianza tshiebe, umuenzele bu mudi musue.

#### **1. B. NIVEAU MUBANDILE (Secondaire)**

- Udi welangana menji munyi bua diandamuna dia Abalama ? (Muyishi umvue mandamuna a bayidi. Mu luseke lumue, diandamuna edi divua dia lungenyi, bualu kunyima ne bikale bikole bua Salaï amone kabidi ne tshilema ntshumukile kudiye. Abalama uvua mumanye ne Salaï katu ne moyi mubi to ne bena mudimu bandi).

### **2. THEATRE : NTSHINYI TSHIDI TSHIENZEKE ?**

Muyidi umue ikale Abalama ne mukuabo wa bakashi ikale Salaï. Abalama ambila Salaï malu â.

### **3. KUIMBA NE KUJA**

Wewe Salaï Mukashi'anyi

Hagâ m' muena mudimu webe

Kosa malu â wewe nkayebe Mm mm mm.

## **TSHITUHA 3**

TANGILA GENESE 16 : 6b

6b. Salaï wakamuenzela bibi ne yeye wakanyema ku mesu kuandi.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Salaï wakenzela Hagâ tshinyi ? (Wakamuenzela bibi) ;
- Bua kumuenzela kua bibi eku Hagâ wakenza tshinyi ? (Wakanyema ku mesu kuandi) ;
- Udi welangana menji ne wakanyema bua tshinyi ? (Muyishi umvua menji a bana. Misangu mikuabo wakabanga kumvua bowa).

### 1. B. NIVEAU MUBANDILE (Secondaire)

- Tshinyi tshivua ne mua kuenza bu wewe muikala Salaï ? Bu wewe Hagâ ? (Muyidi umvue mandamuna a bayidi).

### 2. THEATRE: NTSHINYI TSHIDI TSHIENZEKE?

Bayidi bonso benze bu badi benzela bakuabo bibi. Hashishe bonso buabu banyema bu badi ba Hagâ. Kunyima bahingana mu miaba yabo.

### 3. KUIMBA NE KUJA

Salaï wakenzela Hagâ bibi,  
Hagâ kunyemai, Hagâ kunyemai  
Tshivundu ! Tshivundu ! Tshivundu !

### 4. NDEKELU WA DILESONA

Salaï wakahesha Abalama Hagâ mu menji akuheta muana. Biakenzeka nanku, kundekelu Hagâ wakanyema ne muanandi. Tshivundu tshia bungi tshiakabuela anu bualu Salaï wakalekela njila (disua) wa Nzambi ne kulonda disua diandi yeye nkayandi.

### 5. MIDIMU (DEVOIRS)

Nzambi udi mutuleja malu a bungi mu Mukanda wandi. Utu ulonda Nzambi dituku dionso bua yeye akulombole ne akuheshe bukole bua kulonda diyi diandi mu malu onso.

### 6. DIBIKILA (INVITATION)

Biwikale wewe kuena muanji kuitabuja Yesu Kilisto bu Mukelenge ne Musungidi webe. Umanye ne wewe kuena mua kulonda diyi dia Nzambi to. Wewe nkayebe kuena muakukumbana. Udi dijinga ne bukole bua Nzambi, Nyuma Muimpe mene. Nyuma eu udi muakulua kudi anu biwikala munitabuje Yesu Kilisto bu Mukelenge ne Musungidi webe. Udi musue kumuitabusha dituku dia lelu eu anyi ? Luaku usomba aha (Muyishi aleje bayidi muaba wa kusomba) biwikala musue kumuitabuja dituku dia lelu. Meme nenkuleje tshiudi ne bua kuenza.

## DILESONA 60

**TEKESE: GENESE 16: 7 – 10**

**TSHIENA BUALU:** Nzambi udi ulama Hagâ mu tshihele

**KENDELA KA DIYISHA:**

Kunyima kua diyisha edi, bayidi badi ne bua kujingulula ne Nzambi udi munange bantu bonso. Ha nanku baleje dinanga edi kudi Bantu bonso mu dina dia Yesu Kilisto.

**MVESE WA KUYILA**

BIENZEDI 10s:34b

34b. bulelela, ndi njingulula ne Nzambi kena ne kansungansunga.

### **KULONDOLOLA DEVOIRS (MIDIMU)**

Mu lumingu lushale devoirs wetu uvua bua kulomba Nzambi ne yeye akuheshe bukole bua kulonda dî diandi mu malu onso. Nganyi udi mulombe nunku lumingu elu? Nganyi udi mua kutuleja mushindu uvuaye muenze ne mushindu uvua Nzambi mumukuatshishe mu malu â.

### **KUTANGULULA (REVISION) DILESONA DISHALE**

- Nganyi uvua munyeme ? (Hagâ) ;
- Bua tshinyi Hagâ uvua munyema ? (Bualu Salaï wakamuenzela bibi) ;
- Tuamba ne Hagâ uvua ne musoko wende yeye nkayende anyi ? (To, yeye uvua muene Ejipitu, kadi yeye wakanyema mu buloba bua bantu ba Kanâna) ;
- Udi welangana menji ne Hagâ neahete muntu udi muakumuakidila aku ? (Nansha).

### **TRANSITION WA DILESONA**

Lelu tudi tumona tshinyi tshivua Hagâ mumona hakanyemai mu tshihele.

### **BITUHA BINENE BIA DILESONA: 3**

#### **TSHITUHA 1**

TANGILA GENESE 16:7

7. Muanjelo wa Yehowa wakamusangana (ha buihi) hehi ne mushimi wa mai wa mu tshihele ; mushimi eu udi mu nshila wa ku shû.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Nganyi wakasangana Hagâ ? (Muanjelo wa Yehowa) ;
- Muanjelo wa Yehowa wakasangana Hagâ kudi kunyi ? (Hehi ne mushimi wa mai wa mu tshihele mu nshila wa ku shû.

#### **1. B. NIVEAU MUBANDILE (Secondaire)**

- Bu mudi Hagâ muendakana bikole mu tshihele, udi welangana menji ne hakamonaye muanjelo wa Nzambi wa kumvua mushindu kayi ? (Muyishi umvua mandamuna a bayidi. Yeye ukavua muhungile ne nyota ya mai) ;



- Bu mudi Muanjelo wa Yehowa mulue kuhetangana ne Hagâ, bidi bisua kuleja tshinyi ? (Ne Yehowa uvua mumunange nansha yeye muikale muena mudimu) : Muhika).

## **2 THEATRE: NTSHINYI TSHIDI TSHIENZEKE ?**

Muyidi umue ikale bu Muanjelo wa Yehowa. Bayidi bonso bakuabo bu Hagâ. Bayidi aba bendakana bikole mu tshihele. Ba mona mushimi wa mai, baya lukasa aku, Muanjelo ulua kumueneka kudibo wamba ne “Meme ndi Muanjelo wa Yehowa”.

### **3. KUIMBA NE KUJA**

Hagâ wakanyema Salaï  
Wakendakana bikole  
Makasa mu tshihele,  
Makasa osha  
Wakafika habuihi ha mushimi wa mai  
Wakamona Muanjelo wa Yehowa.

### **TSHITUHA 2**

TANGILA GENESE 16: 8

8. Yeye wakebesha Hagâ, mukashi muena mudimu wa Salaï, ne, wakufuma kudi kunyi? Uyaya kudi kunyi? Yeye wakamuandamuna dî ne, Ndi munyeme ku mesu kua mukelenge wanyi mukashi Salaï.

## **1. MUYISHI ELA BAYIDI MAKONKA AA**

### **1. A. NIVEAU MUHUEKELE (Primaire)**

- Muanjelo wa Yehowa wakenza tshinyi? (Wakebesha);
- Tudi tumanya munyi ne Muanjelo wa Yehowa wakamona dikenga diandi? (Wakamubikila mu dina diandi, Hagâ, uvua mumanye kabidi mudimu wandi);
- Tela makonka abidi akelabo Hagâ kudi Muanjelo wa Yehowa? (Wakufuma kudi kunyi? uyaya kudi kunyi?);
- Tela diandamuna dia Hagâ kudi Muanjelo? (Ndi munyeme ku mesu kua mukelenge wanyi mukashi Salaï);
- Mu makonka â abidi, dikonka kai didiye muandamuna ne didiye kayi muandamuna? (Wakandamuna ku dikonka dia muaba uvuaye ufuma, bua muaba uvuaye uya kena muandamuna to).

### **1. B. NIVEAU MUBANDILE (Secondaire)**

- Udi welangana menji ne bua tshinyi kena mufila diandamuna dia muaba uvuaye uya bua tshinyi? (Kavua ne muaba mujadika uvuaye uya to. Uvua anu uya utshina, wendakana hatuhu);
- Yeye bu Nzambi mumanyi wa malu onso, bua tshinyi wakamuela dikonka edi? (Bua Hagâ elangana menji a kudiye uya).

## 2. THEATRE: NTSHINYI TSHIDI TSHIENZEKE?

Muyidi umue ikale Hagâ ne mukuabo ikala Muanjelo baleje tshinyi tshidi tshienzeka ne tshiambibue mu mvese eu.

### 3. KUIMBA NE KUJA

Muanjelo wakebeja Hagâ  
 Udi ufuma kudi kunyi ?  
 Muanjelo wakebeja Hagâ  
 Udi uya kudi kunyi ?  
 Hagâ wakandamuna ne  
 Ndi nyema Salaï o, o  
 Ndi nyema Salaï o, o

### TSHITUHA 3

TANGILA GENESE 16 : 9 – 10

9. Muanjelo wa Yehowa wakamuambila ne, hingana kudi mukelenge webe mukashi, udikokeshe mu tshianza tshiandi.
10. Muanjelo wa Yehowa wakamuambila ne, nenkumbashile tunkanunuine tuebe, tuikale tua bungi, kabena mua kutubala bua bungi buatu.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Muanjelo wa Yehowa wakambila Hagâ tshinyi ? (Hingana kudi mukelenge webe mukashi, udikokeshe mu tshianza tshiandi) ;
- Muanjelo wa Yehowa wakamulaya tshinyi? (Nenkumbashile tunkanunuine tuebe, tuikale tua bungi, kabena mua kutubala bua bungi buatu);
- Udi welangana menji ne Hagâ wakumvua mushindu kayi hakumvuaye malu â? (Muyishi umvue mandamuna a bayidi. Bivua bualu bukole bua Hagâ kumvua ne hingana kudi Salaï. Kadi bivua mua kumuhesha disanka bua kumanya ne Yehowa neankumbashile tunkanunuine tuende, tuikale tua bungi, kabayi muakutubala bua bungi buatu).

### 1. B. NIVEAU MUBANDILE (Secondaire)

- Bua tshinyi Yehowa wakambila Hagâ bua kuhingana kudi Salaï ? (Muyishi umvue menji a bayidi. Bu mudiye kayi kabidi ne bana babu mu Ejipitu to, nganyi mukuabo udi muaku muambuluisha bu Salaï) ;
- Kuhingana kua Hagâ kudi Salaï kudi kulomba tshinyi ? (Kudihuekesha, ne kujikija kuditambisha kuende kudi kulela ndululu munkatshi muabu) ;
- Fwanyikija mulayi wa Nzambi kudi Salaï ne Nzambi kudi Hagâ. (Milayi eyi ivua ya mushindu umue mu malu a tunkanunuine. Bakashi aba babidi ne bavuishe tshisamba tshinene, kabayi ne mushindu wakutshibala to).

## 2. THEATRE: NTSHINYI TSHIDI TSHIENZEKE?

Muyidi umue ikale muanjelo. Bayidi bonso bakuabo benza bu mudibo bela menji. Hagâ umvue meyi a Muanjelo au. Muanjelo amba ne: “Hagâ hingana kudi Salaï ne udikokeshe ku tshianza tshiandi ». (Bayidi baleje bu badi ne bowa). Muanjelo amba kabidi ne : « Hagâ, tunkanunuine tuebe ne tuikale tua bungi, mushindu wakutubala kawamba kuikalaku to. (Bayidi baleje disanka).

### 3. KUIMBA NE KUJA

Muanjelo wakambila Hagâ  
Uhingane kudi Salaï  
Muanjelo wakambila Hagâ  
Tunkanunuine tuebe netuikale tua bungi O! O! O!

### 4. NDEKELU WA DILESONA

Muanjelo wakambila Hagâ nansha lutatu luikalaku, Nzambi kena mukuhua moyi to. Yeye wakakulama mu buloba bua lutatu. Yeye wakatuma muanjelo bua kukumanyisha bua kuhingana kudi Salaï ne kumuambila ne neankumbashile tunkanunuine tuende. Tshisamba tshiahatika kudi Hagâ ne tshikale Alaba (Arabe). Nansha bobo bikala bantu badi kabayi muakutuhesha Mashiya ne Mukanda wa Nzambi, Nzambi uvua mubanange biabo. Yeye udi munange bisamba bionso.

### 5. MIDIMU (DEVOIRS)

Bu tuetu bena kuitabusha tudi bamanye ne Nzambi udi munange bantu bonso. Tuamba ne tuetu bietu tudi babanange anyi? Wewe udi ne njiya anyi mikalu ne bisamba kayi bikuabo? Anyi bantu bakuabo? Mu lumingu elu utete bua kubalombela Nzambi dituku dionso.

### 6. DIBIKILA (INVITATION)

Nansha wewe muikale muntu wa tshisamba kai, nansha wewe muhele, mubanji, nansha muntu wa lungenyi lua bungi nansha lukese, manya ne Nzambi udi mukunange. Yesu wakalua ha

buloba bua kukusungila. Bantu bonso badi ba muitabuja katataka anyi? Mubikila mpindiue mu milombo yebe. Muambila bua akusungile. Yesu udi habuihi nebe bua kukuadila kunyima kua dilesona utuleje bua tuetu kukuambuluisha.

## DILESONA 61

**TEKESE: GENESE 16: 11 – 16**

**TSHIENA BUALU:** Diledibua dia Yishamaele

**KENDELA KA DIYISHA:**

Kunyima kua diyisha edi, bayidi badi ne bua kujingulula ne nansha Yishamaele kai muana uvua Nzambi mulaya Abalama, Nzambi wakamunanga ne wakamulama bu muakanangayi bantu bonso. Bua nanku, bikalabo bajingulula nunku, nebaleje dinanga dia Nzambi kudi bantu bonso.

**MVESE WA KUYILA**

MATAYO 28: 18b – 19a

18b. Bakumana kumpa bukokeshi bonso mu diulu ne ha buloba.

19a. Bualu bua meme ndi ne bukokeshi ebu, yai bienu, nuvuishe ba bisamba bionso bayidi.

**KUTANGULULA (DEVOIRS) MIDIMU**

Devoirs wetu uvua bua tuetu kunanga bantu bakuabo anyi bisamba bitudi nabi njiya anyi mikalu mu nsombelu wetu. Tubalombele Nzambi. Tela dina dia muntu anyi tshisamba tshiudi mulombe Nzambi. Nganyi udi mulombe tshisamba anyi muntu mukuabo Nzambi nunku?

**TRANSITION WA DILESONA**

Tuvua bamone mu lumingu lushale ne Yehowa uvua mulaya bakashi babidi, Salaï ne Hagâ ne, nebikale ba mamu ba tshisamba tshinene. Hagâ wakimita difu kadi Salaï kavua muanji kuimita to. Hagâ nealele mushindu kayi ? Netulonde diyuki edi lelu.

**BITUHA BINENE BIA DILESONA: 4**

**TSHITUHA 1**

TANGILA GENESE 16:11

11. Muanjelo wa Yehowa wakamuambila ne, Tangila, wewe udi ne difu, neulele muana mulume, neumuidike dina ne, Yishamaele, bualu bua Yehowa wakumvua dikenga diebe.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Muanjelo wa Yehowa wakambila Hagâ tshinyi ? (Neulele muana mulume) ;
- Dina kayi didi ne Hagâ bua kuhesha muana walelaye? (Yishemaele) ;
- Dina edi didi diumvuija tshinyi? (Yehowa wakumvua dikenga diebe) ;
- Didi diumvuija ne Yehowa wakumvua dikenga dia nganyi ? (Dia Hagâ).

### 1.B. NIVEAU MUBANDILE (Secondaire)

- Udi welangana menji ne bua tshinyi Yehowa wakumvua dikenga dia Hagâ ? (Bualu udi munange bantu bonso) ;
- Ebi bidi bileja ne Yehowa udi umvua miadi ya bantu badibo bakengesha kudi bantu bakuabo. Tudi mua kuamba ne Yehowa udi umvua miadi ya bantu ba mishindu kayi lelu badibo bakengesha mushindu eu ? (Muyishi umvue menji a bayidi. Balomba bua bakujinguluile menji abo bimpe).

## 2 THEATRE: NTSHINYI TSHIDI TSHIENZEKE ?

Muyidi umue ikale bu Muanjelo wambila Hagâ malu â. Bayidi bakuabo bikale bu Hagâ, benza bu badi belangana menji bua lumu elu ludi muanjelo mubambile.

### 3. KUIMBA NE KUJA

(Bayidi banyungusha maboko bu badi banjelo)

Hagâ, wewe neulele muana wa balume

Neumuidike dina ne Yishemaele

Dina edi didi diumvuija ne

“Yehowa wakumvua dikenga diebe”

### TSHITUHA 2

TANGILA GENESE 16: 12

12. Yeye neikale bu nyama wa mpunda udi ne luonji munkatshi mua bantu; tshianza tshiandi netshiluishe muntu yonso, ne tshianze tshia muntu yonso, netshimuluishe kabidi; yeye neikale mutangilangane ne bana babo bonso.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Muana neikale mushindu kayi? (Bu nyama wa mpunda);
- Yeye neikale mushindu kayi ne bantu bakuabo? (Tshianza tshiandi netshiluishe muntu yonso, ne tshianza tshia muntu yonso netshimuluishe kabidi);

- Tuamba ne yeye neasombe kaba kamue ne bana babo anyi? (Nansha kakese, neikale mutambakanyi).

### 1. B. NIVEAU MUBANDILE (Secondaire)

- Udi umona muana eu wa Abalama Yishemaele ne afile disanka mu diku edi anyi? (Nansha kakese, yeye kamba kusomba nabu kaba kamue to, neabaluangishe mvita).

### 2. THEATRE: NTSHINYI TSHIDI TSHIENZEKE?

Muyidi wa balume umue aleje muikala Yishemaele ne nsombelu wende ne bakuabo. Bayidi bakuabo baleje mushindu udi bana babo bamumona (Ne bowa, ne dibungama).

### 3. KUIMBA NE KUJA

Yishemaele nealushe bantu  
Ne neasombe ha buende, Dikenge ee!

### TSHITUHA 3

TANGILA GENESE 16 : 13 – 14

13. Yeye wakidika Yehowa wakamuambila malu au ne, wewe udi Nzambi udi utangila; bualu bua yeye wakamba ne, Nakamana kumona Nzambi, munyi mundi nshala ne moyi?
14. Nunku yeye wakidika mushimi wa mai ne Bê-laha-loi (Kukudimuna kua muaku ne, Mushimi wa Nzambi wa moyo utu watangila) udi hankatshi ha Kadesha ne Beledé.

### 1. MUYISHI ELA BAYIDI MAKONKA AA

#### 1.A. NIVEAU MUHUEKELE (Primaire)

- Yeye wakidika Yehowa dina kayi? (Wewe udi Nzambi udi utangila) ;
- Yeye wakidika mushimi wa mai dina kai? (Bê-laha-loi);
- Bê-laha-loi udi umvuija tshinyi ? (Mushimi wa Nzambi wa moyo utu watangila).

#### 1.B. NIVEAU MUBANDILE (Secondaire)

- Tuamba ne Hagâ uvua welakana ne mei avua Muanjelo umuambila anyi ? (Nansha kakese, yeye uvua anu ukema bualu wakumona muanjelo wa Nzambi kadi kakafua nansha)

### 2. THEATRE: NTSHINYI TSHIDI TSHIENZEKE?

Muyidi mukashi umue enze gestes bu Hagâ uleja kukema kuandi bualu wakumona muanjelo wa Nzambi kadi kena mufua to.

### 3. KUIMBA NE KUJA

Hagâ uvua ne disanka  
Bua Muanjelo wa Yehowa Yeye wakakema  
Bualu kakafua nansha.

### TSHITUHA 4

TANGILA GENESE 16 : 15 – 16

15. Hagâ wakalelela Abalama muana mulume: Abalama wakidika dina dia muana wakamulelela Hagâ ne, Yishemaele.

16. Abalama wakadi muikala ne bidimu makumi muanda mukulu ne bisambombo, hakamulelela Hagâ Yishemaele.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Hagâ wakalelela Abalama nganyi? (Muana mulumu);
- Bidi bileja ne Hagâ wakahingana mu nzubu mua Abalama ne Salaï bu muakamuambila Muanjelo wa Yehowa ;
- Abalama wakadi muikala ne bidimu bungi munyi ? (86).

### 1. B. NIVEAU MUBANDILE (Secondaire)

- Enza muyuki ne bayidi bua kumanya ne mu diku dia Abalama bavua mushindu kayi mu diledibua dia muana eu. Abalama uvua mushindu kayi ? Salaï ? Hagâ ? (Muyishi umvue menji a bayidi. Misangu mikuabo menji abu avua bintshiompashiompa).
- Udi welangana menji ne Hagâ wakambila bantu bakuabo malu avua Muanjelo wa Yehowa mumuambile anyi ? Bua tshinyi wakamba anyi bua tshinyi kakamba to ?

## 2. THEATRE: NTSINYI TSHIDI TSHIENZEKE?

Muana wa Abalama wakuledibua, kadi kena muana uvua Yehowa mumulaya nansha. Mu dinaya edi, muana wa balume umue aleje mushindu uvua Abalama mumvue mu mutshima wandi (menji malu bintshiompashiompa).

### 3. KUIMBA NE KUJA

Muana wa Abalama muledibue kudi mamu Hagâ  
Kadi Nzambi wakalaya muana kudi mama Salaï

#### **4. NDEKELU WA DILESONA**

Diledibua dia Yishemaele kadivua mu disua dia Nzambi to. Divua mu bu muntu bua Abalama. Yishemaele kavua muana uvua Nzambi mulaya Abalama ne mukashi'andi Salaï to. Kadi nansha nanku, Nzambi wakalama mamu Hagâ ne muana eu Yishemaele. Nzambi udi mumanye bantu bonso nansha bobo baledibue mushindu kai.

#### **5. MIDIMU (DEVOIRS)**

Bualu Nzambi udi munange bantu bonso, Yeye udi utuambila tuetu bana bende bua tuetu kuyisha bantu bonso lumu luimpe lua Yesu Kilisto. Mu lumingu elu, devoir wetu udi bua kuleja bantu badi kabayi mu diku dietu dinanga dia Nzambi.

#### **6. DIBIKILA (INVITATION)**

Nansha wewe nganyi, nansha muledibue mu mushindu kai, nansha kudi nganyi. Umanye Yesu udi mukunange. Udi musue bua wewe usungidibue. Udi musue kukuvuija muana wa Nzambi. Biwikala kuyi muanji kumuitabuja to, udi mua kumuitabuja mpindieu, mu muaba eu, ne ulomba Nzambi ne mei â : « Tatu Nzambi, ndi mumanye ne ndi muenji wa malu mabi, ne ndi musue bua Yesu ansungile. Ndi ngitabusha ne Yeye udi Muana wa Nzambi, wakafua ku mutshi mutshiamakane bua mibi yanyi. Ndi ngitabusha ne wakabika ku lufu. Yesu Kilisto, buela mu mutshima wanyi mpindieu, umvuishe muena kuitabusha mujalame. Unkuatshisha bua meme kukulonda mu malu onso. Tuasakidila bua dibuikidila dia mibi yanyi mu dina dia Yesu Amen. Biwikale wakulomba nunku musangu wa kumpala, ungindile kunyima kua Ecodim.

### **DILESONA 62**

**TEKESE: GENESE 17: 1 – 14, 23 – 27**

**TSHIENA BUALU:** Nzambi udi ulaya kabidi Abalama

**KENDELA KA DIYISHA:**

Kunyima kua diyisha edi, bayidi badi ne bua kujingulula ne dî dia Nzambi didi ne bua kuenzeka mu tshikondo tshijalame, nansha diodi kadî dienzeke mu tshikondo tshitudi tutekemena. Pa nanku bobo badi ne bua kutekemena mu malu onso adi Nzambi wamba.

**MVESE WA KUYILA**

MISAMBU 19:8

8. Mei a Yehowa adi malelela, adi asankisha mutshima; mukenji wa Yehowa udi mulengele, udi utandula mesu a bantu.

**KUTANGULULA (DEVOIRS) MIDIMU YA LUMINGU LUSHALE**



Tuvua banulomba bua nuenu kuleja dinanga kudi bantu bakuabo, nansha ba tshisamba tshikuabo. Nganyi udi muakutuleja mushindu uvuaye muteta kuenza mu lumingu lushale.

## **TRANSITION WA DILESONA**

Milayi eyi idi ne mushinga wa bungi bualu dituku dia lelu ne tumone musangu muisatu udiye uyakula.

### **BITUHA BINENE BIA DILESONA: 6**

#### **TSHITUHA 1**

TANGILA GENESE 17:1 – 2

1. Hakadi Abalama ne bidimu makumi tshitema ne tshitema, Yehowa wakamueneka kudi Abalama, wakamuambila ne, Ndi Nzambi wa Bukole Bonso; wende kumpala kuanyi, wikale muakane.
2. Nenjadike tshihungidi tshianyi hankatshi hetu nebe, nenku kumbashe ba bungi.

#### **1. MUYISHI ELA BAYIDI MAKONKA AA**

##### **1. A. NIVEAU MUHUEKELE (Primaire)**

- Mu tshikondo etshi, Abalama wakadi ne bidimu bungi munyi ? (Bidimu makumi tshitema ne tshitema) ;
- Hakamueneka Yehowa kudi Abalama, wakamuambila dina kayi ? (Ndi Nzambi wa Bukole Bonso) ;
- Wakamuambila ne wende ne wikale mushindu kai ? (Wende kumpala kuanyi ne wikale muakane) ;
- Tela milayi ibidi idi mu mvese eu wa 2. (Nenjadike tshihungidi tshianyi nebe, nenkukumbashe ba bungi).

##### **1. B. NIVEAU MUBANDILE (Secondaire)**

- Elangana menji bimpe, dina dia Nzambi. Bua tshinyi Nzambi uvua windila to ne hakulakaja Abalama bua yeye kumuhesha muana ? (Muyishi umvue menji a bayidi. Misangu mikuabo uvua musue kuleja Abalama ne bantu bakuabo ne yeye udi ne bukole bua kuenza malu onso nansha adi bantu bamona ne kaena mua kuenzeka nansha kakese).

#### **2 THEATRE: NTSHINYI TSHIDI TSHIENZEKE ?**

Bayidi babidi benza dinaya dia malu avua Nzambi muakula. Umue Nzambi, mukuabo Abalama.

#### **3. KUIMBA NE KUJA**

Nzambi wakambila Abalama  
 « Ndi Nzambi wa bukole bonso »  
 Wende kumpala kuanyi, wikale muakane  
 Nenjadike tshihungidi hankatshi hanyi nebe  
 Nenkukumbashe ba bungi.

## **TSHITUHA 2**

TANGILA GENESE 17: 3 - 4

3. Abalama wakatua mpala hanshi, ne Nzambi wakayikila nandi ne, 4. Mona, tshihungidi tshianyi tshidi nebe, wewe newikale nkambua wa bisamba bia bungi.

### **1. MUYISHI ELA BAYIDI MAKONKA AA**

#### **1.A. NIVEAU MUHUEKELE (Primaire)**

- Hakambila Yehowa Abalama, yeye wakenza tshinyi? (Wakatua mpala hanshi) ;
- Nzambi wakayukila nandi tshinyi? (Wewe newikale nkambua wa bisamba bia bungi) ;

#### **1.B. NIVEAU MUBANDILE (Secondaire)**

- Mu mulayi eu, Nzambi wakasakidila ndambu mu ya kumpala. Wakasakidila tshinyi? (Yeye kakuikala nkambua wa tshisamba tshimue to, kadi wa bisamba bia bantu ba bungi).

### **2. THEATRE: NTSHINYI TSHIDI TSHIENZEKE?**

Tahulula bayidi mu bisumbu bibidi:

1. Tshisamba (bazola hanshi anyi mu buloba) tshinene;
2. Bazole bisamba binene (bazola mu buloba).

### **3. KUIMBA NE KUJA**

Tatu Abalama – Tatu munene; Nkambua Abalama – Nkambua munene  
 Yeye neikale nkambua wa bisamba binene

## **TSHITUHA 3**

TANGILA GENESE 17 : 5 – 6

5. Kabena babikila kabidi dina diebe ne Abalama, kadi ne bakuidika dina diebe ne Abalahama; bualu bua nakukuvuisha nkambua wa bisamba bia bungi.
6. Nenkuvudishangane ba bungi, nenkuvuishe bisamba bia bungi, bakelenge ne baledibue munda muebe.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Dina dia Abalama diakalua dina kai? (Abalahama);
- Bua tshinyi Nzambi wakakudimuna dina edi? (Bualu wakamuvuisha nkambua wa bisamba bia bungi);
- Yeye wakamba tshinyi tshikuabo? (Bakalenge ne baledibue munda muebe).

### 1. B. NIVEAU MUBANDILE (Secondaire)

- Bayidi bayukila bobo ne bobo mushindu udibo belangana menji bikala bantu bakuabo bumvua ne Nzambi wakuidika Abalama dina dikuabo ne Abalahama didi diumvujja ne yeye neikale nkambua wa bisamba bia bungi.

## 2. THEATRE: NTSHINYI TSHIDI TSHIENZEKE?

Funda ha dibeki ABALAHAMA ne maleta manene. Muyidi umue ikala bu Nzambi wambila Abalama ne yeye wakakudimuna dina diandi bualu yeye neikale nkambua wa bisamba bia bungi. Fila dibeki didi ne dina adi kudi muana umue ne amba ne dî dikole ne, « meme ndi mpindieu Abalahama ».

## 3. KUIMBA NE KUJA

Nzambi wakalesha Abalama dina dihia dihia  
Abalama wakalua Abalahama  
Nkambua wa bisamba bia bungi!

## TSHITUHA 4

TANGILA GENESE 17 : 7 – 9

7. Nenjadike tshihungidi tshianyi hankatshi hetu nebe ne tunkanunuine tuebe tô ne bikondo biatu bionso bu tshihungidi tshia tshiendelele, bua meme kuikala Nzambi webe ne wa tunkanunuine tuebe.
8. Nenuke wewe ne tunkanunuine tuebe buloba bonso bua Kanâna bûdi wendakanamu, bu buhianyi buenu bua tshiendelele; nengikale Nzambi wabo.
9. Nzambi wakambila Abalahama ne, wewe ne tunkanunuine tuebe mu bikondo biatu bionso, nenutumikile tshihungidi tshianyi.

## 1. MUYISHI ELA BAYIDI MAKONKA AA

### 1.A. NIVEAU MUHUEKELE (Primaire)

- Nzambi wakamba tshinyi bua tshihungidi hankatshi habu ne Abalahama ? (Ne tshikale kabidi to ne tunkanunuine tuandi tshiendelele) ;

- Nzambi wakamba ne neamuhe tshinyi ne tunkanunuine tuandi ? (Buloba bonso bua Kanâna bûdi wendakanamu) ;
- Nzambi wakambila Abalahama ne wewe ne tunkanunuine tuebe ne nuenze tshinyi ? (Nenutumikile tshihungidi tshianyi).

### **1.B. NIVEAU MUBANDILE (Secondaire)**

- Nzambi wakahesha tunkanunuine tua Abalahama buloba bua Kanâna tshiendebele. Tuamba ne to ne lelu eu « tshiendebele » udiku anyi ? Bua tshinyi ? (Ee, bualu « tshiendebele » kena ne ndekelu to.)

### **2. THEATRE: NTSHINYI TSHIDI TSHIENZEKE?**

Bayidi bonso benza (gestes) mineku baleja muaku eu TSHIENDELELE

### **3. KUIMBA NE KUJA**

Milayi ya Nzambi kayitu ibola ; Milayi ya Nzambi kayitu ikulakaja  
Itu ishala tshiendebele.

### **TSHITUHA 5**

N.B : Muyishi, tshitupa etshi tshia mvese eu (Genese 17 : 10 – 14) kayena mikumbana bua kuyisha bayidi bebe nansha. Udi bua kuyumusha mu dilesona edi, bualu bayidi bebe kabena mua kuenza pratique bimpe menemene to.

### **TSHITUHA 6**

TANGILA GENESE 17 : 23 – 27

23. Abalahama wakangata Yishemaele, muanandi mulume ne bana bonso bakaledibua mu nsubu wandi, ne bantu bonso bakasumbibua ku argent yandi ; bantu balume bonso ba mu nsubu wa Abalahama bakatengudibua mu dituku adi mene bu muakamuambila Nzambi.
24. Abalahama wakadi ne bidimu makumi tshitema ne tshitema hakamutengulabo.
25. Yishemaele, muanandi mulume, wakadi ne bidimu dikumi ne bisatu hakamutengulabo.
26. Abalahama ne Yishemaele, muanandi mulume, bakatengudibua dituku dimue.
27. Balume bonso ba mu nsubu wandi, baledibue mu nsubu wandi, ne basumbibue ku argent kudi babende, bakatengudibua nandi.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Abalahama wakenza tshinyi hakamuambila Nzambi ? (Wakanemeka mukenji eu ne bana balume bonso ba mu nsubu muandi ne yeye muine bakatengudibua anu mu dituku adi) ;

### **1. B. NIVEAU MUBANDILE (Secondaire)**

- Kutengula kuvua kumvuija tshinyi ? (Kutumikila, tshimanyinu tshia tshihungidi tshiabu ne Nzambi).

### **2. THEATRE: NTSHINYI TSHIDI TSHIENZEKE?**

Repetition rythmique

Abalahama wakatumikila

Abalahama wakatumikila

### **3. KUIMBA NE KUJA**

Nzambi wakalesha Abalahama tshimanyinu

Tshia tshihungidi. Mm ! Mm ! (Imba kabidi).

### **4. NDEKELU WA DILESONA**

To ne katataka, Abalahama kavua muanji kulela to. Kavua muanji kuikala mu buloba abu bua kamulaya Yehowa to. Kadi uvua anu kumpala kua malu makole – milayi ya Nzambi – Diyi dia Nzambi. Nzambi wakakudimuna dina diandi bua kumuleja bua itabusha milayi. Nzambi wakamuhesha tshimanyinu tshia kutengudibua kua bana ba balume bu tshihungidi tshiandi ne Abalahama. Nansha Nzambi muleheja tshikondo bua kukumbaja mulayi wandi, Abalahama wakadi muitabuja anu di dia Nzambi.

### **5. MIDIMU (DEVOIRS)**

Nuenu badi bitabuja Yesu Kilisto, Nzambi ukadi munuheshe di diandi, Mukanda wa Nzambi. Nudi numuitabusha anyi ? Nutu nutumikila diyi edi anyi? Tangila devoir eu: Mu lumingu elu, dituku dionso, bala anyi umvua diyi dia Nzambi. Lomba Nzambi, muambila ne « Ndi ngitabuja diyi diebe ».

### **6. DIBIKILA (INVITATION)**

Nuenu badi kabayi banji nuitabuja Yesu mu mitshima yenu, kanujanguluki to, mulayi wa Nzambi ngowewu (1 Yone 5 : 10b).

10b. Muntu udi kai witabusha Nzambi, wakumuvuisha muena mashimi, bualu bua kakuitabusha bumanyishi budi Nzambi umanyisha bua Muana wandi.

12b. Udi kai ne Muana wa Nzambi kena ne moyo.

Mukanda wa Nzambi udi wamba ne, biwikala kuena ne Yesu to, kuena ne moyo to. Neuhete moyo wa tshiendelele anu biwikala muitabusha Yesu Kilisto bu Mukelenge ne Musungidi webe. Udi wumuitabusha lelu anyi ? Kunyima kua diyisha luaku utuambila ne : « Ndi ngitabusha Yesu » Netuikale ne disanka dia bungi bua tuetu kukukuatshisha bua tshiudi ne bua kuenza.

### DILESONA 63

**TEKESE: GENESE 17: 15 - 22**

**TSHIENA BUALU:** Mulayi wa kulela kua Sala

**KENDELA KA DIYISHA:**

Kunyima kua diyisha edi, bayidi badi ne bua kujingulula ne Nzambi wakalaya Abalahama ne Sala ne Mashiya nealedibue mu diku diabu. Ke bualu kayi ne basankishe Bena Yuda (Diku dia Abalahama ne Sala.

**MVESE WA KUYILA**

GENESE 17 :19b

19b. Sala mukashi webe neakulele muana, wewe neumuidike dina ne Isaka, nenjadike nandi yeye ne tunkanunuine tuandi tshihungidi tshianyi bu tshihungidi tshia tshiendelele.

**TSHIA KUENZA KUMPALA**

Zola carte géographique ka buloba bua « Iselele ».

**KUTANGULULA (DEVOIRS) MIDIMU YA LUMINGU LUSHALE**

Mu lumingu lushale devoir yetu ivua bua kutendelela Yehowa ne kumuambila ne ndi ngitabusha diyi diebe.

**TRANSITION WA DILESONA**

Abalahama kenaku munkatshi muetu to, wakafua. Sala kabidi. Kadi bana babo badi ne moyo hanshi ha buloba ebu. Tshisamba tshia Abalahama ne Sala badi batshibikila ne “Bena Yuda”. Badi mu miaba ya bungi, kadi musoko wabo udi Iselele. (Muyishi aleje muaba udi Iselele mu carte géographique). Bitua basankisha, tudi tusankisha Abalahama ne Sala. Tudi tulonda mu Mukanda wa Nzambi wa kumpala utudi tubikila Genese tudi mu shapita 17 mu mvese wa 15.

**BITUHA BINENE BIA DILESONA: 6**

**TSHITUHA 1**

TANGILA GENESE 17:15

15. Nzambi wakambila Abalahama ne, kabena babikila mukashi webe, Salaï kabidi, nebamubikile ne Sala.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Nganyi wakambila Abalahama buakushintulula dina dia mukashi wandi ? (Nzambi) ;
- Tela dina diandi dia kale ne dina diandi dihia dihia ? (Dina dia kale Salaï, dina dihia dihia Sala).

### 1. B. NIVEAU MUBANDILE (Secondaire)

- Salaï udi umvuija ‘‘muana wa bakaji wa mukelenge wanyi’’ Sala udi umvuija ‘‘muana wa bakaji wa mukelenge’’. Edi didi dishilangana dinene, kadi Nzambi wakamona ne divua ne mushinga munene. Udi welangana menji ne Nzambi uvua musue kuleja tshinyi bua kushintulula dina edi ? (Yeye kamba kuikala muledi wa tshisamba tshiandi yeye kayatshi to, kadi neikale muledi wa bisamba bia bungi).

## 2 THEATRE: NTSHINYI TSHIDI TSHIENZEKE ?

Muyidi umue afunda dina dia kumpala dia mukaji wa Abalahama kulu kua dibeji dia mukanda anyi ku mbodi (Tableau) ne « Salaï » ne bayidi bonso ba ditela. Muyidi muibidi afunda dina dihia dihia ne « Sala » ne bayidi bonso ba ditela ne « Sala ».

## 3. KUIMBA NE KUJA

Salaï ukadi Sala

Nzambi wakushintulula dina diebe

### TSHITUHA 2

TANGILA GENESE 17: 16

16. Ne mmuvudishile disanka, yeye neakulelela muana mulume, ne mmusankishe bulelela, yeye neikale nkambua wa bisamba bia bungi, ne bakelenge ba bantu ne baluhuke munda muandi.

## 1. MUYISHI ELA BAYIDI MAKONKA AA

### 1. A. NIVEAU MUHUEKELE (Primaire)

- Nganyi walelela Abalahama muana wa balume? (Sala);
- Sala nealele mushindu kayi? (Nzambi neamusankishe);

- Yeye neikale nkambua wa bisamba bungi munyi? (Bia bungi);
- Banganyi baluhuka munda muandi? (Bakelenge ba bantu).

### 1. B. NIVEAU MUBANDILE (Secondaire)

- Bua tshinyi bivua bikengela ne anu Sala ke udi ne bua kulela? (Bualu yeye ke uvua mukashi wa dibaka).

### 2. THEATRE: NTSINYI TSHIDI TSHIENZEKE?

Bayidi bonso benza repetition rythmique

Mukashi webe Sala!

Mukashi webe Sala!

### 3. KUIMBA NE KUJA

Sala nealele muana mulume

Nzambi neamusankishe

### TSHITUHA 3

TANGILA GENESE 17: 17

17. Hashishe, Abalahama wakadishinda hanshi, wakaseka, wakamba mu mutshima wandi ne, Nebalelela muntu udi ne bidimu lukama muana anyi? Sala udi ne bidimu makumi tshitema nealele anyi?

### 1. MUYISHI ELA BAYIDI MAKONKA AA

#### 1. A. NIVEAU MUHUEKELE (Primaire)

- Musangu au, Abalahama wakenza tshinyi? (Wakadishinda hanshi) ;
- Wakenza tshinyi tshikuabo? (Wakaseka);
- Abalahama uvua ne bidimu bungi munyi? (Bidimu makumi tshitema).

#### 1. B. NIVEAU MUBANDILE (Secondaire)

- Kudi malu a bungi afikisha bantu bua kuseka anyi? (Eee);
- Udi welangana menji ne tshinyi tshivua tshifikisha Abalahama bua kuseka? (Bantu bakadi banunu nunku kabena mua kulela kabidi to).

### 2. THEATRE: NTSINYI TSHIDI TSHIENZEKE?

Bayidi bonso badishinda hanshi baseke bikole ne bamba ne : « Nzambi udi wa Bukole bonso ».

### 3. KUIMBA NE KUJA



Abalahama wakadishinda hanshi  
 Abalahama wakaseka bikole  
 Wakakema bua bukole bua Nzambi

#### **TSHITUHA 4**

TANGILA GENESE 17 : 18 – 19

18. Abalahama wakambila Nzambi ne, Mbimpe Yishemaele ikale ne moyo ku mesu kuebe.
19. Nzambi wakamba ne, nansha, Sala mukashi webe neakulelele muana, wewe neumuidike dina ne Isaka, nenjadike nandi yeye ne tunkanunuine tuandi tshihungidi tshianyi bu tshihungidi tshia tshiendelele.

### **1. MUYISHI ELA BAYIDI MAKONKA AA**

#### **1. A. NIVEAU MUHUEKELE (Primaire)**

- Abalahama wakambila Nzambi tshinyi bua Yishemaele ? (Mbimpe Yishemaele ikale ne moyo ku mesu kuebe) ;
- Nzambi wakamba tshinyi ? (Nansha, Sala mukashi webe neakulelele muana, wewe neumuidike dina ne Isaka) ;
- Nzambi nenzele Isaka tshinyi ? (Nenjadike nandi yeye ne tunkanunuine tuandi tshihungidi tshia tshiendelele).

#### **1. B. NIVEAU MUBANDILE (Secondaire)**

- Udi welangana menji ne Abalahama wakitabusha meyi a Nzambi anyi uvuanu ne ngenyi ibidi ? Bua tshinyi ? (Uvua anu ne ngenyi ibidi bualu to ne mpindieu, udi welangana menji ne Yishemaele neikale muana wa tshihungidi) ;
- Bikala Nzambi muenze tshihungidi ne Isaka ne tunkanunuine tuandi tshiendelele, ebi bidi bisua kuleja tshinyi ? (Mashiya nealedibue mu tshisamba tshiandi).

### **2. THEATRE: NTSINYI TSHIDI TSHIENZEKE?**

Bayidi bonso benza mineku (gestes) idi ileja meyi â :

- Yishemaele to ! Yishemaele to !
- Mukashi webe Sala ! Mukashi webe Sala!
- Yeye neakulelele muana wa balume!
- Dina diandi Isaka!
- Nenjadike nandi tshihungidi tshia tshiendelele.

### **3. KUIMBA NE KUJA**

Mukashi'ebe Sala neakulelele muana  
 Dina diandi Isaka, neahunga nanyi tshiendelele.

**TSHITUHA 5**

TANGILA GENESE 17 : 20

20. Nakukumvuila bualu bua Yishemaele kabidi, mona nakumusankisha; nemmuvishe bisamba bia bungu; Yeye nealele baminyampala dikumi ne babidi, nemmuvishe tshisamba tshinene.

**1. MUYISHI ELA BAYIDI MAKONKA AA****1. A. NIVEAU MUHUEKELE (Primaire)**

- Tuambe ne Nzambi wakumvua kulomba kua Abalahama bua Yishemaele anyi ? (Eee, Nzambi wakamumvuila) ;
- Tuamba ne Nzambi wakandamuna ne « ee » bu muvua Abalahama musue anyi ? (Nansha, Nzambi wakandamuna mushindu mukaubo) ;
- Tela malu manene abidi akalaya Nzambi bua Yishemaele (Nealele baminyampala dikumi ne babidi, neamuvishe tshisamba tshinene).

**1. B. NIVEAU MUBANDILE (Secondaire)**

- Udi welangana menji ne bua tshinyi Nzambi kakafila diandamuna bu muvua Abalahama musue ? (Bualu dihangadika dia Nzambi divua bua ne Mashiya nealedibue mu diku dia Isaka.

**2. THEATRE: NTSINYI TSHIDI TSHIENZEKE?**

Bayidi bonso hohamue babala ne bana ba bungu ne bikale ba Yishemaele (tshisamba tshinene). Hashishe, babale ne Yeye nealele baminyampala dikumi ne babidi.

**3. KUIMBA NE KUJA**

Nzambi uvua ne dihangadika dimpe bua Yishemaele  
Tshisamba tshinene ne baminyampala dikumi ne babidi kadi Mashiya to

**TSHITUHA 6**

TANGILA GENESE 17 : 21 – 22

21. Kadi nenjadike tshihungidi tshinyi ne Isaka, wakulelela Sala tshidimu tshialua hakumbana ngondo yandi.

22. Nzambi wakalekela kuyikila na Abalahama, wakamushiya, wakaya mu diulu.

**1. MUYISHI ELA BAYIDI MAKONKA AA****1.A. NIVEAU MUHUEKELE (Primaire)**

- Nzambi nejadike tshihungidi tshiandi ne nganyi ? (Ne Isaka) ;

- Diba kayi dialela Sala ? (Tshidimu tshialua, hakumbana ngondo yandi) ;
- Nzambi wakenza tshinyi? (Wakalekela Abalahama wakamushiya).

### **1. B. NIVEAU MUBANDILE (Secondaire)**

- Tshihungidi tshia Nzambi ne Isaka ne tunkanunuine tuandi tshidi tshiumvuija tshinyi ? (Mashiya nealedibue mu diku diandi).

### **2. THEATRE: NTSHINYI TSHIDI TSHIENZEKE?**

Bayidi bambe mu ditshi dia muyidi mukuabo ne dî dihuekele ne : « Sala nealele mu tshidimu tshilualua ».

### **3. KUIMBA NE KUJA**

Mu tshidimu tshilualua, malu manene, Sala nealele muana wa balume  
Nzambi neajadike nandi tshihungidi, buimpe buandi  
To ne tunkanunuine tuandi Mashiya nealue.

### **4. NDEKELU WA DILESONA**

Nzambi wakalaya Abalahama tshisamba tshinene. Mpindieu tshikondo tshikadi ha kukumbana. Muana wa balume Isaka, mu diku diandi Mashiya nealedibue. Diku dia Isaka diakalua Iselele (Bena Yuda).

### **5. MIDIMU (DEVOIRS)**

Utu ulomba Nzambi bua bena Iselele anyi? Utu ulomba bua bitabusha Yesu Mashiya anyi? Devoir wa lumingu elu udi: Kubanga kulomba Nzambi bua bena Iselele, kulomba Nzambi bua bena Yuda kuitabuja Yesu bu mukalenge ne musungidi wabo.

### **6. DIBIKILA (INVITATION)**

Biwikala kuyi muena kuitabusha to, umanye ne Nzambi, neakuitabusha bu muana wandi anu biwitabusha Yesu Kilisto Mashiya bu Mukalenge ne Musungidi webe. Tuamba ne udi musue kuenza nunku lelu eu mene anyi? Luaku kundi meme kunyima kua diyisha, meme nenkuleje tshiudi ne bua kuenza.